

# MGA KALAG NGA ANAA SA BILANGGOAN KARON



Salamat kanimo. Iduko nato ang atong mga ulo sa makadiyut lamang.

Langitnong Amahan, mapasalamaton kami Kanimo, karong adlawa, alang niining maong prebilihio sa panagkatigum sa makausa pang higayon, sa pagpakisayod nga sa umalabot nga adlaw kami managkatigum alang sa katapusan namong higayon, ingon nga mga mortal, ug dayon kami magmanagkatigum diha sa usa ka mahimayaong kahimtang uban Kanimo, ug ang tanang tinubos sa tanan nga mga kapanahonan managkatigum didto.

<sup>2</sup> Oh, ang among mga kasingkasing nagapitik sa makusog, sa...ug sa dakung pagpaabot, nagahulat alang sa nianang orasa nga moabot! Tungod niana, ang tanang mga kahadlok mangahanaw gikan kanamo. Wala na kami angay kahadlok, wala nay kalisang. Nagalaum kami ngadto sa saad nga gisaad sa Dayong Dios alang kanamo, ug kami nasayod nga kini Kamatuoran. Mao kanay hinungdan nga kami nagakinabuhi. Nagkinabuhi kami alang niana, alang nianang orasa, sa nianang panahona, sa diha nga kining pagka-mortal mamausab na, ug kami mamahimo nang sama Kaniya, ug diha wala nay balatian, wala nay kagul-anan, wala nay mga kasakit. Oh, kining tanan mangawala na dayon. Ug nga may kalipay sa kasingkasing, kami, diha sa pagtoo ug kadasig, nagapaabot kami nianang Adlawa.

<sup>3</sup> Mao nga ania kami nagkatigum karon, Ginoo, sa pagsugid sa among mga sayup ug sa pagpangayo'g kalooy. Mao kanay hinungdan nga kami nagaatubang ning altar niining buntaga, tungod kay kami nasayod nga kami mga mortal, ug dihay daghang mga sayup dinhi kanamo, ug kami puno sa kasaypanan. Apan kami mianhi sa pagsugid sa among mga kasaypanan, ug dayon nagapaabot sa among Langitnong Amahan uban sa bukas nga mga kasingkasing, alang sa mga panalangin ug sa pagbag-o ug kusog ug pagtoo, nga igahatag Niya kanamo niining orasa, samtang kami nagkatigum dinhi sumala sa maong saad, “diha sa Langitnong mga dapit ni Cristo Jesus.” Kay among ginaangkon nga kami nakalabang na gikan sa kamatayon ngadto sa Kinabuhi, pinaagi sa Iyang saad, ug kami nahiadto na diha sa usa ka Langitnong kahimtang, nga nagalingkod uban Kaniya karon. Hinaut nga tudloan Niya kami niining buntaga sa mga butang nga buot Niyang ipakisayod kanamo, ug hatagan kami ug Tinapay sa Kinabuhi, aron nga kami makalahutay alang sa

umalabot nga napahimutang diha sa among unahan. Itugot kini, Ginoo. Mao kini ang among pag-ampo nga among ginapangayo diha sa Ngalan ni Cristo Jesus. Amen.

Makapanglingkod na.

<sup>4</sup> Maayong buntag, sa matag-usa. Ug maayo kaayo kini ang makapaghiusa dinhi uban kaninyo pag-usab ning buntaga, diha niining Langitnong kahimtang sa pagsimba.

<sup>5</sup> Medyo nalangan lang ug diyutay, aduna kami usa ka . . . usa gyud ka, makasubo gyud nga tawag pipila lang ka mga minuto ang milabay; usa ka batang lalaki nga nagboy-od didto, himalasyon na. Ug sa kasigurado nga nagatindog ako dinhi, ang Ginoo mihikap sa iyang lawas ug gipapadayon siya sa paglakaw . . .

<sup>6</sup> Ug ang usa—usa—usa ka batang lalaki nga ania dinhi, kinsa maoy anak sa akong ig-agaw. Sila mga Katoliko gayud, sa sinugdanan pa, apan sila miadto sa misa niining buntaga ug adunay misulti kanila sa pagpaanhi. Ug busa sila . . . Adunay kausaban. Busa sila—sila nagaanhi karon dinhi sa balay, ug sa pag-andam alang sa bautismo sa tubig. Busa nianang higayona sila may usa—sila may usa . . . makahibulongang mga butang ang ginabuhat sa atong Ginoo sa tanang higayon. Siya nagapamuhat sa maong mga butang sa makanunayon. Mianhi sila sa pagsulod, ug dili na sila makasulod. Ingon nila wala nay paagi nga makasulod.

<sup>7</sup> Miingon ko, “Bueno, gusto ba ninyong makigsulti kanako,” ug ako miingon, “Bueno, pag-adto lang kamo sa balay, ug atong pagahisgotan kana, didto.”

<sup>8</sup> Busa akong nahunahuna, diha sa akong pag-adto sa New York karon, niining umalabot nga tigum, nga kini mamahimong maayo kaayo . . . Nasayod kong mapabaskog ako sa pag-hapit ug—ug matabangan sa pagpadilaab gikan sa kon unsay nagdilaab diha kaninyong tanan, ug mihapit kami alang sa usa ka adlaw, niining buntaga. Ug miabot kami kagahapon, sa miagi pang adlaw, sa udto.

<sup>9</sup> Ug unya kinahanglan kami nga mobiya. Ug ako nakaandam nang mobiya, karong hapon, apan mohawa ako siguro . . . Ug mogikan kami sa buntag, sa sayo, sayo kaayo sa . . . Tingali magkaaduna kami mga nyebe sa kadalanan, ug nianang mga butanga, gikan dinhi ug paingon sa New York. Kinahanglan moagi sa Virginia, lahus sa kabukiran, ug usab sa Allegheny’s, ug didto sa kinaubsang bahin lang sa—sa Adirondack.

<sup>10</sup> Busa mogikan kami sa, nakalimot ako, usa kini ka dulaanan didto, usa ka bag-ong dulaanan. Giguba na nila ang daang dulaanan sa San Nicolas didto, sa nasabtan ko. Gitukod nila kining bag-ong usa. Ug sumala sa akong nasayran, atong makuha ang pipila ka unang mga gabii niini sukad nga . . . nga gikatugot na. Busa mapasalamaton kita alang niana, alang sa

maong mga katawhang Pentekostal sa kadakuang New York. Ug sa pagtoo ko nga aduna kita'y ubay-ubay'ng mga kasimbahanan nga nagakooperar, ug malaumon kita sa usa ka dakung higayon.

<sup>11</sup> Ug mamalik kami, kon itugot sa Ginoo, sa umalabot nga sunod semana. Ug—ug kon kini kabubut-on man sa Dios, aba, malaumon kaming makahapit sa Dominggo, usa ka semana, alang—alang sa panimbahon sa Dominggo sa buntag.

<sup>12</sup> Ug unya mosulod na pud ako nga wala'y pananghid sa atong pastor, sama sa ginabuhat kanunay, nakita n'yo, ug—ug gihunahuna ko nga kon ako misulod tingali, ug bisan pa nga dili na ingnon. Ug unya ingon nga adunay usa ka maanindot nga pundok dinhi, ug mga tawong makita ko nga gikan pa sa gawas sa lungsod, ang ania dinhi; Naghunahuna ako nga tingali, unyang gabii, kon ang pastor wala nama'y espesyal nga inandam, nga kini mahimong magkaaduna kitay diyutay'ng serbisyo ning gabhiona, sa usa ka hamubo lamang, ug, bueno, tingali sa pag-ampo sa masakiton. [Si Igsoong Neville ug ang kongregasyon nagakalipay—Ed.] Salamat kaninyo.

<sup>13</sup> Nagalaum kita nga makapangampo alang sa masakiton ning gabhiona, makapanghisgot bahin sa Balaanong pagpang-ayo ug—ug sa pagpang-ampo alang sa masakiton. Mosugod nga sayo aron kita makapanggawas sa sayo. Ug kon kabubut-on sa pastor, sa unsay. . . Kasagaran nagasugod kamo diha sa alas siyete-traynta. Husto ba kana? Unsa kaha kon magsugod ta sa alas siyete unyang gabii, alas siyete? [Si Igsoong Neville nagaingon, "Amen."—Ed.] Ug tugotan akong magsugod sa alas siyete-trayenta, ug kana makapahigawas na kanako sa alas otso o alas otso-trayenta, ug kini makahatag pa sa mga tawo ug panahon sa pag—pagpanguli, kon kana'y—kanang tanan—husto man. Ang tanan mikatawa sa dihang ako—sa dihang ako miingon nga alas otso, o alas otso-trayenta. Ako—ako—ako malaumon nga makagawas na nianang orasa. Sa pagpang-ampo sa masakiton, kabalo na mo, dili nato mahibaw-an.

<sup>14</sup> Busa aduna kami usa ka—usa ka maayo kaayong higayon sukad sa pagbiya kaninyo niining miaging Tingtagak, sa sayo, ug gipanalanginan kami sa Ginoo sa daghan nga dinagtag mga butang. Nga. . . Ug unyang gabii, kon kabubut-on sa Ginoo, gusto kong sultihan kamo mahitungod sa maong miaging pagduaw kanako, sa Dios, sa Colorado, sa pipila ka mga semanang milabay. Ug mao kana'y nahunahunaan kong pagadad-on kaninyo karon, nga tingali makapadasig sa pagtoo alang sa usa ka maayong buluhaton sa pagpang-ayo unyang gabii, alang sa mga masakiton ug balatianon.

<sup>15</sup> Karon, niining buntaga, sa pag-adto na mismo sa bulohaton, Akong. . . Adunay butang nga misantop sa akong kasingkasing mga usa na ka bulan ang milabay. Ug kini tingali mamahimong, karon, siguro ilang. . . Ila bang gina-teyp kini? Ila bang gina-

teyp kini? Oo. Sige. Aron nga mahibaloan ko kung asa man, kon mogawas man ang teyp ngadto sa uban. Dili ko masulti nga kon unsa man ang igasulti ko ning buntaga. . . Dili ko makaingon nga kini—kini—kini. . . Nasayod ako nga husto kini, kita n'yo, ang Mensahe nga bahin maoy husto. Apan ang butang, nga gusto kong buhaton, mao'y usa ka pangutana diha sa akong hunahuna. Daw sa tinuod gayud kini tan-awon. Ug bisan pa niana sukad sa akong pagsulod, ug sukad sa akong. . . gipadayag kini kanako, nahadlok na gayud ako sukad nga makasulti ug sayup nga butang ug mamahimong magbilin ug sayup nga impresyon diha sa mga katawhan. Ug usa kini ka. . . Ug akong. . .

<sup>16</sup> Kon unsa may akong nahisulat na, mahitungod sa kon unsay akong isulti, akong giputol ang ubang bahin niini, aron dili ko kini mahimong bughat ra kaayo. Tungod kay, makita ninyo, kon ang usa—kon ang usa ka tawo. . . Akong—akong gihigugma ang Ginoong Dios, ug, ang bugtong paagi nga mahibaloan kong ginahigugma ko Siya, tungod kay kamo ginahigugma ko. Kita n'yo? Mao ra kanay bugtong paagi nga akong nahibaloan. Ug gani ako—ako dili gusto nga magkaadunay bisan unsang butang nga nahipadayag kanako ug unya dili ko igasulti diha kaninyo, kon kini angay man isulti diha kaninyo. Ug unya ako nahadlok nga kon ako makasulti man ug butang nga medyo mabug-at kaayo, makapasakit kini tingali sa uban kaninyo. Ug, nasayod kamo, kini usa. . . Kinahanglan mo lang nga sa hapit ka na gayud mosaka sa intablado ug dayon mabati na ang isulti kon unsay imong igasulti. Kana lang. Ug unya usahay aduna tingali ka'y masulti, ug adunay mosabot sa. . . sa laing pagsabot niini, ug mosimang sila diha *nianang* bahina; ug dayon adunay moingon, “O, kini ingon *niini*, tan-awa.”

<sup>17</sup> Apan gusto kong mahibaloan ninyo nga kon unsa may akong igasulti dinahum lamang, ug ang pulong *pagdahum* nagapasabot sa “pagpangahas nga wala'y kagahum.” Busa ako. . . Ako—ako wala nagaingon nga matuod kini, apan kini usa lang ka diyutay'ng panghunahuna nga mamahimo kong ibutang diha kaninyo, nga inyong matimbangtimbang kini ug makita kon unsay inyong panghunahuna bahin niini. Ug unya kini, siyempre, kini—kini Makasulatanon, kay ako dili man magawali sa wala'y. . .

<sup>18</sup> Apan mao na ba kaha kanang orasa? Kini ba miabot na niining taknaa, ug kini bang mga butanga nagpasabot na niana? Ako nagaampo, uban sa tanan nga ania kanako, nga kini dili pa. Kita n'yo? Nagaampo ako nga kini dili pa mismo, nga kini dili pa nianang orasa. Mamahitabo kini, apan miabot na ba kini sa nianang panahona? Kita n'yo, mao kana kon unsay akong ginahinuktokan. Karon, nasabtan na ba sa tanan, gayud, nga wala ako masayod? [Ang kongregasyon nagaingon, “Amen.”—Ed.] Ako lang. . . Mao na ba kining panahona? Kung

mao man kini, malooy unta ang Dios kanato. Apan, kon kini dili pa nianang panahona, itugot . . . kini magaabot.

<sup>19</sup> Karon, sa madali nga mahimo namo dayon, aduna kami nakaplanong daghang pagaadtoan sa umalabot, kon itugot sa Ginoo. Ug kinahanglan ko mopanaw ngadto sa gawas sa nasud, human mismo sa Pasko, sa Europa ug Asya; sa Europa, ilabina gayud. Ug dayon mobalik ako dinhi sa Estados Unidos, alang sa pipila ka mga bulohaton, ug dayon mobalik ako paingon sa Habagatang Africa. Magsugod ako sa petsa dos sa—sa Septyembre, didto sa Durban, ug mopadayon gikan sa petsa dos, siguro, hangtud sa mga petsa diyes, ug unya aduna pa ako’y tulo ka mga adlaw sa pag-adto gikan didto paingon sa Johannesburg ug magsugod pag-usab. Apan siguro sa bulan sa Abril, magsugod kami diha sa mga nasud sa Scandinavia, sa Norway ug Sweden ug—ug sa Finland, ug—ug sa Holland ug sa Switzerland ug Germany, ug—ug didto agi sa Europa. Busa iuban kami sa pag-ampo.

<sup>20</sup> Aduna kita’y pipila ka mga tigum dinhi, panahon sa Pasko karon, human mismo sa Pasko. Sa laing bahin, gusto namong maania dinhi hangtud mahuman ang Pasko, sa balay. Gusto sa mga bata nga manguli, hangtud mahuman ang Pasko. Ug among—among gimahal ang Arizona, apan nahibalo mo sa—sa butang nga among gikamingawan, ug dili gayud kami makalimot niini, mao kining iglesia ug kamong mga kaigsoonan. Bisan kon asa pa kami moadto, kon unsa may among ginabuhay, kini gayud. . . Ang mga bata, ako, ang asawa ko ug tanan na. Wala gayu’y dapit nga sama niini. Tinuod kana. Wala gayu’y dapit.

<sup>21</sup> Nalawig ko na ang pito ka mga kadagatan, ug ako—ako nakaadto na sa bisan asa, apan walay dapit nga daw sa napabalaan na kanako sama niining diyutay’ng dapit dinhi. Kini mao na. Pahilayo lang gikan niini sa makausa, kon gusto ninyong mahibaloan. Aduna gayu’y butang nga ania dinhi. Nakawali na ako sa tibuok kalibutan, halos, ug wala ko gayu’y, sa bisan unsang higayona, sa bisan unsang lugara, nabati sukad ang Espiritu sa Dios, nga may kagawasan ug ingon-anang mga butanga, sama sa akong ginabati sa pagbarug dinhi mismo. Mao na kini.

<sup>22</sup> “Dios, itugot kining. . .” Sama sa maong adlaw nga akong gipahimutang kanang ulohang bato dinha, giingon ko, “Ginoong Dios, ayaw itugot nga mapukan kini.”

Ang mga tawo nag-ingon na, “sulod sa duha ka bulan, mamahimo na kining grahianan.”

<sup>23</sup> Ako miingon, “Ayaw itugot nga mapukan kini, Ginoo. Itugot nga magabarug kini, ug nga ang mga katawhan dinhi nagadayeg Kanimo sa pagbalik ni Jesus.” Ako nagasalig niini nga mamahimong ingon niana.

24 Karon atong ablihan ang Biblia karon, ug—ug lauman nga ang Ginoo mohatag kanato sa Iyang mga panalangin. Ug gusto nato basahon ang pipila ka mga Kasulatan. Aduna ako’y pipila ka mga Kasulatan nga nahisulat dinhi nga gusto kong basihan, ug pipila ka mga nangalista na. Ug gusto kong mobasa gikan sa tulo ka mga bahin diha sa Biblia, ug akong ihatag kini kaninyo, una. Gusto kong mobasa diha sa Judas 5 ug 6. Ang Judas usa lang ka Basahon, nahibalo na mo. Ug unya gusto kong mobasa sa Ikaduhang Pedro sa Ika-2 nga kapitulo, 4 ug 5. Unya gusto kong mobasa sa Unang Pedro, 3:18 ngadto sa 20.

25 Ug ang akong hisgotanan niining buntaga, kon itugot sa Ginoo, mao’y: *Mga Kalag Nga Anaa Sa Bilanggoan Karon*. Uhhuh. *Mga Kalag Nga Anaa sa Bilanggoan Karon*, sinirhan na, hinukman na sa walay katapusan. Wala na gayud, wala nay paagi nga maluwas pa, kita n’yo, mga kalag nga sukad pa nabilanggo na karon.

26 Karon atong pagabasahon diha sa Basahon ni Judas, una. Sa pagtoo ko namarkahan ko na dinhi alang sa pang-unang bahin, diha sa Judas; ug dayon diha sa Ikaduhang Pedro, ug unya—unya diha sa Unang Pedro. Karon, sa Judas, gusto kong basahon kini tanan; aron sa pagdaginot sa oras, tungod kay alas diyes-trayenta na, akong sugdan sa Ika-5 nga bersekulo. Karon, si Judas maoy usa ka igsoon, igsoong minatuto, ni Jesus Cristo, sumala sa nahibaloan natong tanan. Kita n’yo? Anak siya ni Jose.

*Karon buot kong ipahinumdom kaninyo, bisan tuod inyong sa makausa ug sa dayon nasayran na ang tanan, nga ang Ginoo, nga nagluwas sa usa ka katawhan gikan sa yuta sa Egipto, siya sa kapulihay milaglag diha kanila niadtong wala managpanoo.*

27 Giluwas sila, una, gipahigawas sila sa Egipto, ug gikinahanglan nga laglagon sila tungod kay sila wala mipadayon diha sa ilang mensahe, kita n’yo.

*Ug ang mga manolunda nga wala managpabilin diha sa ilang nahimutangan, hinonoa nanagpamiya sa ilang angay nga puloy-anan, kini sila maoy iyang gikapahimutang diha sa pag-usab dili- . . . mga talikala nga dayon ilalum sa kangitngit alang sa panudya unya sa dakung adlaw.*

28 Ang mga manolunda nga sa makausa nanagpuyo diha sa Langit, ug wala nagpabilin sa ilang nahimutangan ug sa paagi nga diin didto sila, nangahulog, ug karon anaa na sa dayon nga talikala sa kangitngit, sa walay katapusang mga talikala sa kangitngit, gipabilin niining kahimtanga hangtud sa maong paghukom sa dakung Adlaw sa dihang pagahukman na sila kauban sa tanang mga dili-magtotoo.

29 Karon sa Ikaduhang Pedro, sa Ika-2 nga kapitulo, sugod diha sa Ika-4 nga bersekulo, nga maoy usa lang ka basahon o duha sa dili pa kini, tan-awa.

*Kay kon ang mga manulonda wala kaloy-i sa Dios sa diha nga nakasala sila, hinonoa iyang gitambog sila ngadto sa infierno, ug gibalhog ngadto sa mga lungib nga mangiob, aron igatagana hangtud sa pagpanghukom;*

*Ug ang karaang kalibutan wala kaloy-i sa Dios, bisan tuod giluwes niya si Noe, ug ang walo ka mga tawo, ang magwawali sa pagkamatarung, sa diha nga gipalunopan niya kadtong kalibutan sa mga dili diosnon;*

30 Wala kaloy-i ang mga manulonda; gibalhog sila diha sa mga talikala sa kangitngit, ug gihukman ang tibuk kalibutan pinaagi sa paglaglag, ni—ni Noe.

31 Karon diha sa Unang Pedro, sa Ika-1 nga kapitulo ug sa . . . Unang Pedro, sa Ika-3 nga kapitulo, ug sugod diha sa ika-18 nga bersekulo, atong pagabashon pag-usab. Karon, paminaw'g maayo karon.

*Kay si Cristo usab maoy namatay sa makausa alang sa tanan tungod sa mga sala, ang matarung alang sa dili matarung, aron kita iyang madala ngadto sa Dios, sa lawasnong bahin sa iyang kinaiya siya gipatay, apan nabuhi diha sa Espiritu: . . . gipatay diha sa lawasnon, apan nabuhi diha sa Espiritu:*

*Nga niini siya miadto ug miwali sa mga espiritu nga didto sa sulod sa bilangoan; siya miwali ngadto niining maong mga tawo diha sa bilangoan;*

*Nga kaniadto wala managpanoo, nga diha sa mga adlaw ni Noe ang pailub sa Dios nagpaabot, samtang gibuhat pa ang arka, nga niini pila lamang ka buok, sa ato pa, walo ka tawo ang naluwas latas sa tubig.*

*. . . agig hulad niini ang bautismo usab nga nagaluwas kaninyo karon (dili ingon nga paghugas sa buling gikan sa lawas, kondili ang pangaliyupo ngadto sa Dios gikan sa usa ka hinlo nga konsensya,) pinaagi sa pagkabanhaw ni Jesus Cristo:*

*Nga miadto sa langit, ug anaa karon sa tuo sa Dios; ug nga kaniya nailalum ang mga manulonda ug mga langitnong kamandoan ug kagahaman.*

Mag-ampo ta pag-usab.

32 Karon, Langitnong Amahan, ingon nga usa—usa ka laray sa Kasulatan dinhi, tulo ka mga saksi, tulo ka mga bahin sa Kasulatan nga nagahatag ug pagpamatuod. Ug Ikaw nag-ingon sa Imong Pulong, nga, “Diha sa baba sa duha kon tulo ka mga saksi, pagalig-onon ang kada Pulong.” Karon ako naga-

ampo Kanimo, O Dios, nga Ikaw mokunsad sa mga tawo ug magahubad niining Pulong, niining Mensahe, sa kahayag nga kinahanglan maania niini, nga ang matag lalaki, babaye, batang lalaki, o batang babaye, mahimong makasabot sumala sa kasarang nga Imo nang gikatagana kanila sa pagsabot, ug karon sa pagkahibalo nga kining tulo ka mga saksi nagapamatuod sa Kamatuoran.

<sup>33</sup> Ug ako nagaampo nga Ikaw magapadala sa Balaang Espiritu diha kanamo karon. Ug magapaabot kami Kaniya Kinsa maoy among Hari, sa among taliwala niining buntaga, ang Ginoong Jesus Cristo; kon diin kami gibuhi na karon pinaagi sa pagtoo, napahimutang na niining mga Langitnong dapit diha Kaniya. Nagahulat kami sa Iyang Mensahe. Isulti kini pinaagi kanamo, Ginoong, dunggon kini pinaagi kanamo, samtang among ginapangayo Kanimo ang pagsirkunsidar sa mga ngabil nga nagasulti ug sa mga dalunggan nga nagapatalinghug, aron kini mamahimong kadungganang ug kahimayaan Kaniya nga Kinsa mao ang Kasulatan. Kay amo kining ginapangayo diha sa Iyang Ngalan. Amen.

<sup>34</sup> Karon, hinumdomi ang mga bulohaton karong gabii, usa ka bulohaton sa pagpang-ayo. Siguro dili na kinahanglan niini ang pagpanghatag pa sa mga prayer card, mao nga ampoan na lang nato ang mga masakiton. Aduna ako'y usa ka butang nga gusto kong isulti diha kaninyo, ug ako—ako nagalaum nga dalhon kini ang kongregasyon ngadto sa usa ka kahimtang nga magkaaduna gayu'y tanang matang sa kaayohan. Nasayod ako nga mahitabo kini kon ato lang toohan kini sa ingon niana.

<sup>35</sup> Karon kini, mga kalag sa bilangoan karon, mga kalag nga karon anaa na sa bilangoan!

<sup>36</sup> Karon, ang kalag sa tawo dili maoy lawas sa tawo, kini'y kalag. Kita n'yo? Ug ang kalag maoy butang nga—nga kinaiya sa espiritu. Ug unya sa diha nga ang kinaiya sa usa ka tawo. . . Sa dihang siya nag-ingon, “kita mga patay na,” ang Kasulatan sa tin-aw nagasulti kanato nga, “kita mga patay na, ug ang atong mga kinabuhi natago na diha sa Dios pinaagi kang Cristo, gitimrihan na pinaagi sa Balaang Espiritu.” Karon, dili kini nga ang imong lawas namatay; dili kini nga imong espiritu ang namatay. Ang kinaiya sa imong espiritu mao ang namatay; kita n'yo, ang kinaiya, nga mao ang kalag. Ang kinaiya sa imong kalag mao'y—mao'y Dios, kon ikaw natawo pag-usab. Kon kini dili, kini iya sa kalibutan. Ang bisan unya nga may sinugdanang kinahanglan may katapusan, ug busa ang bugtong paagi lamang nga makabaton ka'g Kinabuhing Walay Katapusan mao ang pagkaadunay Kinabuhi nga wala gayu'y kinasugdanang. Ug unya ang imong kinabuhi nagsugod sa dihang ikaw natawo, sa diha nga ang Dios mihuyop sa gininhawa sa kinabuhi sa imong ilong ug nahimo kang usa ka buhing kalag, unya nagsugod ka nianang tungora. Apan sa dihang ikaw. . .



37 Kanang kinaiyaha nga anaa diha kanimo, sa kinaiyahan iya ka sa kalibutan, nahilayo gikan sa Dios, ikaw sa tinuod usa ka mananap. Mao gyud kana ang tinuod. Ang matag-usa nasayod nga kita mga mammal. Pila ba'y nasayod niana? Kita, kita mga mammal, kita mga mainit ug dugo nga mga mananap, apan mao kana kon unsa kita pinaagi sa atong yutan-on nga pagkabuhat. Apan, nakita ninyo, kon unsa ba'y nakapalahi kanato gikan sa ubang mga mammal, nga—nga ang Dios mibutang ug usa ka kalag dinhi kanato. Kita n'yo? Karon, ang ubang mga mammal wala nagkinahanglan pagsuot sa mga bisti. Walay laing mananap ang kinahanglan nga magsuot sa mga bisti sa pagtago sa iyang kaulaw, kondili kita. Kita lamang ang mga nagahimo niana, tungod kay aduna kita'y kalag. Apan, kita n'yo, ang Dios, sa kinasugdanan, nasayod kon unsay mahisama ang usa ka tawo. Ug Iyang gibuhat ang kalibutan, ug gipatungha ang tanang mga matang sa mga mananap, gikan sa pinakaubos paingon sa pinakataas; ug ang pinakataas nga mananap nga mitungha, mao ang tawo.

38 Ug niadtong tungora, una, gibuhat ang tawo, siya maoy usa ka tawong espirituhanon, diha sa hulagway sa Dios.

39 Nga, “ang Dios Espiritu,” San Juan 4. Karon, “Siya usa—usa ka Espiritu. Ug sila nga nagasimba Kaniya, nagasimba Kaniya diha sa Espiritu ug sa Kamatuoran. Ug ang Imong Pulong mao ang Kamatuoran.” Karon, kita nagasimba Kaniya diha sa Espiritu ug sa Kamatuoran. Siya'y usa—usa ka Espirituhanong Persona.

40 Dayon wala'y tawo nga mougmad sa yuta, ug unya giumol sa Dios ang tawo gikan sa abug sa yuta.

41 Dayon mikuha Siya gikan sa iyang kilid, usa ka laing binuhat, sa gusok; ug, gikan niana, gibulag kining lalaki nga may duruha ka kinaiya, nga pareho pagkababaye ug pagkalalaki. Ug Iyang gikuha ang sa pagkababaye, 'kay kadto mao'y gugma, ug Iyang gibutang kini ngadto sa usa ka tawo nga gitawag ug Eva, nga gitawag ni Adan nga Eva, nga maoy iyang asawa. Diha kon diin ang iyang gugmang, natural, gugmang phileo, nahisumpay ngadto sa iyang asawa. Mao kana angay sa lalaki karon, ug mao pud sa babaye ngadto sa iyang bana. Sa lalaki, ang pagkalalaki; sa babaye, ang pagkababaye.

42 Ug unya, kita n'yo, human nga Iyang nabuhat na ang tawo diha sa Iyang Kaugalingong dagway, “Gibuhat Niya sila, lalaki ug babaye,” wala'y tawo niadto ang mougmad sa yuta. Ug Iya siyang gibutang sa abug sa yuta, ug busa siya nahimong . . . siya mao kadtong tawo. Mammal kining tawhanong tawo, kita n'yo, usa siya ka mananap; apan Iyang gibutang kining maong espiritu sa Dios, usa ka kinabuhi, sa sulod kaniya, ug gihimo siya diha sa basihanang nga siya makahimo ug pagpili. Ug dayon sa diha nga kining tawo . . .

43 Karon kita magpanghunahuna nga daw si kinsa. Hinumdomi lang, unsa ba kita? Usa lang ka pinudyot nga abug. Kana ra. “Ug tungod kay abug ka man, sa abug ikaw mopauli.” Busa sa dihang makita mo kining tawhana nga nagalakaw sa dalan, nga nagahunahuna nga daw si kinsa siya, nahibalo na mo, ug nakabaton ug gamayn’g edukasyon ug mga butang; hinumdomi, usa kini ka pinudyot nga abug sa Indiana. Mao ra kana. Ug kanang bayhana nga nagasuot ug mga purol, ug nagapanigarilyo ug nagalaroylaroy diha sa kadalanan, nagakiaykiay nga daw siya’y tag-iya sa tibuok nasud, usa kini ka pinudyot nga abug sa Indiana, ug sa ingon niana kini nagabalik. Busa kamo wala gyud diay sa sinugdanan pa, kita n’yo. Busa niana, tinuod kana, mao kana kon unsa kamo.

44 Apan, kanang kalaga nga anaa diha, kita n’yo, nianang kalag diha ang Dios nagapanglihok, kita n’yo. Kon Iya lamang mamahimo kanang kinaiyahana, kanang maong espiritu, sa pag-uyon diha Kaniya, nan kanang kinaiyahana nagakamatay, ang maong kinaiyahan ug ang gugma sa kalibutan nagakamatay, ug ang mga butang nga iya sa kalibutan patay na. Kita n’yo? Tungod kay, “Kon imong gihigugma ang kalibutan, o ang mga butang sa kalibutan, ang gugma sa Dios wala diha kanimo.” Kita n’yo? Ug ang tawo kinahanglan matawo pag-usab. Busa, kining kinaiyahana kinahanglan nga mamatay, ug ang kinaiya sa Dios nagaabot ug nagapuyo diha kaninyo. Ug ang Dios lamang ang bugtong nga walay kinasugdanan o nga dili gayu’y mahimong may katapusan.

45 Busa, tungod niini, Iyang gipanagkumbuyahay, nakita n’yo, ug gikuha kining tawo, nga yutan-on, ug kining Dayon nga Espiritu, ug gikumbuyahay kini. Tungod kay, ang Dios mipakita sa Iyang Kaugalingon pabalik dinha, nga Siya’y nagpakatawo sa dihang Siya’y nahimong si Cristo Jesus, ug Siya’y Dios, kita n’yo. Ang Dios anaa kay Cristo; nga, kita n’yo, mipuyo Kaniya, nagapasig-uli sa kalibutan ngadto sa Iyang Kaugalingon. Ug, pinaagi nianang maong hingpit nga Tawo, ang matag-usa kanatong dili-hingpit nga nagatoo sa Dios ug midawat Niana, nahimong pagkahingpit Niya.

46 Ug wala gayud Niya gitugotan nga ang Iyang lawas makakita’g pagkadunot, ni gibiyahan ang Iyang kalag sa hades, apan gibanhaw Siya diha sa ikatulo ka adlaw, ug Siya karon buhi hangtud sa kahangturan. Ug Kita magkaadunay usa ka lawas sama sa Iyang Kaugalingong mahimayaong lawas.

47 Mao nga kita gibautismohan diha sa Iyang Ngalan, aron nga kita managpamangon diha sa Iyang Ngalan, sa Iyang kamatayon, diha sa Iyang pagkabanhaw, nga kita mangabanhaw pag-usab, nga nagapamatuod ngadto sa kalibutan nga aduna kita’y bag-ong Kinabuhi, nga ang karaang pagkatawo patay na. Ato nang gilubong kanang maong unang kinaiyahan. Kita n’yo? Kanang unang kinaiyahan wala na, ug karon kita ang

kinaiyahan Niya. Siya nagapuyo sulod kanato, ug kita wala na nagapamuhat sa atong kaugalingong kabubut-on. Atong ginabuhat ang Iyang kabubut-on. Wala na nato ginahunahuna ang atong kaugalingong panghunahuna. Ang hunahuna, ang maong hunahuna mao nay nagahunahuna. Ang hunahuna nga anaa kang Cristo Jesus anaa sa matag magtotoo. Kita n'yo, kana—kana mao ang kalag, ug mao kana ang atong ginahisgotan. Karon, mao kana'y bahin nga akong ginahunahuna karon, nga kanang sa sulod nato, ang kalag.

<sup>48</sup> Karon, kon atong mamatikdan, diha niini, adunay daghang mga butang nga nagakahitabo usahay, ug kita mahibulong kon nganong nagakahitabo sila, ug atong ginapangutana ang atong mga kaugalingon, ug atong ginapangutana ang uban. Apan sa katapusan, sa dili madugay, atong mahikaplagan nga, kon kita mga Cristohanon, kining tanan nagapamuhat lang sa maayo, bisan pa. Nakita na ninyo kana. Makita kana sa tanang Cristohanon. Nagakatingala kita kon nganong nabuhat nato kadto.

<sup>49</sup> Nahibulong ako usahay, sa una kong pagbasa sa Biblia, “Nganong gitugot man sa Dios kang Abraham, kanang kahalangdong tawo, ang pagbarog didto ug ingnon nga si Sara dili iyang asawa?” Ug kon giunsa nga Iya man siyang gitugotan sa pagbarog didto ug sa pagpamakak bahin niana, ug sa maong mga butang nga iyang gibuhat, ug dayon kon giunsa nga Iya man gayud gitugotan si Abraham sa pagbiya sa yutang saad diin nga Iya siyang gisultihan nga dili biyaan. Ang si bisan kinsang Judeo nga nagabiya sa yutang saad nagabalik sa pagpakasala, 'tungod kay ang Dios gihatag kana ngadto kanila ug misaad kanila sa pagpabilin lang didto, kita n'yo, ug ilang gibiyaan kini. Busa siya milugsong paingon sa Gerar. Apan kon dili pa tungod niana . . .

<sup>50</sup> Ug unya si Abimelek, kadtong hari didto sa Filistihanong nasud, nahigugma kang Sarah ug makigminyo kaniya, ug usa kadto ka buotang tawo, usa ka matarung nga tawo. Ug sa hapit na tingali niyang. . . Daw usa ka kataw-anan kini sa pagdungog, apan sa paghimong tininuod kini diha kaninyo. Human sa iyang pagligo sa gabii ug misul-ob na sa iyang pajama, ug human sa iyang pag-ampo ug miadto na sa higdaanan, ang Ginoo nagpakita kaniya ug miingon, “Mahimong isipon kang usa na ka patay nga tawo,” ug ang maong tawo wala ma'y nahimong bisan unsa. Kita n'yo? Nalingla gayud siya, nilang duha ni Abraham ug Sarah. Tinuod kana. Miingon Siya, “Anaa kanimo ang asawa sa laing tawo, nasabtan mo. Ug Ako—Akong dili dunggon ang imong mga pag-ampo, bisan unsaon pa nimo sa pag-ampo. Mahimo kang isipong patay na. Apan kanang tawhana maoy Akong propeta.” Kita n'yo?

<sup>51</sup> Tan-awa, malisod kana sabton, kita n'yo. Apan kon kini dili pa tungod niana, dili gayud nato masayran kon unsa ang grasya.

<sup>52</sup> Nganong iya man giadtoan ug giminyoan si Hagar, human sa pagkaadunay mahigugmaong asawa sama kang Sarah? Ug dili niya gustong himoon kadto, kita n'yo, apan gisultihan siya ni Sarah. Ug dayon ang Dios misulti kaniya, “Patalinghugi kung unsay gisulti ni Sarah kanimo.” Ngano man? Kinahanglan gayud magkaadunay mamahimong Ismael, “nga ang ulipon nga babaye ug ang iyang anak dili magapanunod kauban sa babaye nga may kagawasan ug sa iyang anak.” Nasabtan ba ang buot kong ipasabot?

<sup>53</sup> Tanan niining mga butanga mga katipohan lamang. Nganong kinanghalan man niadtong propeta makig-ipon sa usa ka bigaon ug magkaadunay. . . uban niining mga anak, magkaadunay duha ka mga anak pinaagi kaniya? Ingon nga usa ka timaan. Ngano nga ang usa mihigda man sa iyang tuong kilid sulod sa tulo ka gatus ug kap-atan ka mga adlaw, ug unya mihigda sa ingon kadaghang mga adlaw diha sa pikas kilid sama niana? Ingon nga usa ka timaan. Ang usa mihukas sa iyang bisti ug milakaw sa atubangan sa Israel. Ug, karon, tanan niadtong mga butanga, maoy mga katipohan ug mga landong, kita n'yo; ug kinahanglan magkaaduna kita niadtong mga butanga, sa pagsangkap niini.

<sup>54</sup> Ug, sa daghang mga higayon, dunay mga butang nga nagakahitabo kanato nga mahibulong kita kon ngano ingon niini. Dios kini nga paunang ginapakita kanato ang usa ka butang.

<sup>55</sup> Karon, ingon nga usa pa ka batan-ong lalaki, ug kamo nasayod na sa kasaysayan sa akong kinabuhi, ako—dugay ko nang gitooan, sukad sa una ko pang pagkahinumdom. . . Usa sa unang mga butang nga akong mahinumdoman. . . Karon niini, karon, tingali aduna kamo'y nasulti kanako kagahapon, ug kini ako nang nahikalimtan karon. Apan adunay pipila ka mga butang, kanhi, nga nahitabo kaniadto sa atong mga adlaw sa pagkabatan-on, kadaghanan kanato ingon niana, nga kanunay gayud natong mahinumdoman. Ug kini daw halos kataw-anan sa pagsulti niini, apan akong mahinumdoman sa dihang ako nagakamang pa, nga sul-ob ang hataas nga bisti. Mga gagmay'ng bata, karon ang uban kaninyong mga tawong kaedad ko makahinumdoman niana, nga ang gagmay'ng mga bata kasagaran nagasuot kaniadto ug tag-as gyud nga mga bisti. Ug akong mahinumdoman nga nagakamang ako, ug nagapamudyot ug yelo sa mga tiil sa akong uyoan ug ginakaon kini, diha sa pagsulod niya ug nagatindog duol sa halinganan.

<sup>56</sup> Ug unya ang sunod nga butang nga akong mahinumdoman nga nahitabo sa akong kinabuhi, mao ang usa ka panan-awon, ang unang usa nga nagkaaduna ako, ug misulti kanako nga ang dakung bahin sa akong kinabuhi igapuyo ko sa usa ka lugar haduol sa siyudad nga ginganla'g New Albany. Ug usa ako ka batan-ong taga-bukid didtong dapita, wala gani ni usa ka doktor

sa dihang ako natawo. Ug—ug ako—ako... Abi ninyo, sila... Nagpuyo ako dinhi mga sulod na sa kalim-an ka mga katuigan, dinhi mismo; ang panan-awon.

<sup>57</sup> Ug dayon sa una ko pang nasayran nga aduna gayu'y Dios kon asa man, ug ingon nga usa pa ka gamay'ng bata misulti Siya kanako'g, "dili gayud manigarilyo, o mag-inum, o hugawan ang akong lawas," kanay pagpanghimo'g kalaw-ayan kauban sa mga babaye ug ingon nianang mga butang. Sa una pa akong may kahadlok niini, ug usa pa ka batan-ong lalaki niadto.

<sup>58</sup> Ug dayon nagapangayam ako sa makausa niadto, nga daw maoy nahimo kong ikaduhang kinaiyahan, ang pagkagusto sa pagpangayam. Ug ako nagapangayam niadto kauban ang usa ka batan-ong lalaki, si Jim Poole, usa ka makahimuut nga batang lalaki. Sa pagtoo ko ang iyang bata ania dinhi nagasimba, ang gamayn'g Jim, ug maayong pamilya sa mga tawo. Kaila ko ang mga Poole. Ako ug si Jimmy nagkauban sa pagpangatulog ug magkauban na sukad pa sa gagmay'ng bata pa kami sa eskwelahan. Mga unom ka mga bulan ang among gintang, sa edad. Ug si Jimmy napabuto niya ang iyang posil, ug naigo niini ang duha ko ka mga batiis, duol pa gayud kanako, gigamit ang shotgun. Gidala dayon ako sa hospital, ug, didto, nagahigda didto nga himalatyon na, wala pa'y penicillin o wala pa gayud niadtong mga adlaw. Ug, karon, adunay ilang gibutang nga gomang banig sa ilalum kanako, ug nasayod ako niadtong gabhiona... Operahan ako nila sa pagkasunod buntag.

<sup>59</sup> Ila lamang gikuha ug gihinloan ang samad, ug dagkung mga bahin sa unod ang nangabungkag, ug ilang gikuha ang mga gunting ug gigunting kini, ug gikinahanglan kong mokapyut sa kamot sa usa ka tawo. Ug diha sa ila si Frankie Eich, nga nagpakamatay siya dili pa lang dugay, ug gikinahanglan nilang kuptan, puwason ang akong mga kamot para makabuhi gikan sa iyang mga bukton, sa dihang—sa dihang nahuman na sila. Ako misiyagit ug mihilak, ug nagakapyut nga sama niana, ug nga ilang ginagunting ang nianang bahin sa batiis. Napulog upat pa ka tuig niadto ang akong edad, usa pa lang ka batan-on.

<sup>60</sup> Ug niadtong gabhiona gipaninguhaan kong makatulog, ug sila... Ako nakamata, dunay butang nga milagsik. Ug dihay dugo, mga hapit sa tunga sa galon, siguro, nagagikan niadtong mga kaugatan. Ug ilang... ilang gikuhaan ug X-ray, ug ilang giingon nga ang pinusilan anaa duol kaayo nianang dakung ugat, sa matag kilid, nga bisan sa gamay lang nga pagkagaras maputol na kini sa duha, ug mosugod na sa pagdugoay. "Bueno," nahunahunaan kong, "mao na kini ang akong katapusan." Ug gipaubos ko ang akong mga kamot ingon *niini* ug gipataas kini, ug ang dugo miagas sa akong mga kamot, kaugalingon ko nang dugo kadtong akong ginahigdaan. Nanawag ako, gibagting ang

bagtingan. Miabot ang nars, ug gipasunop niya lang kini diha sa tualya tungod kay wala na gayud sila'y mahimo pa.

<sup>61</sup> Ug sa pagkasunod buntag, ilalum niadtong nagakaluya na nga kahintang, wala gayud sila naghatag ug paghulad ug mga dugo niadtong mga panahona, nasayod na mo, busa ila—ila akong gioperahan. Ug ila akong gi-injeksyunan ug ether. Ug sa dihang ako. . . Ang karaang ether, siguro nakahinumdom mo, karaan kining anestisya. Ug ilalum niadtong maong ether, sa dihang ako naulian na, naulian na ako niadto gikan sa ether human sa walo ka oras. Gikinahanglan nila akong tupokan ingon niadto kadaghan, abi nila dili na ako, dili na ako momata. Dili nila ako mapamata.

<sup>62</sup> Akong nahinumdoman si Mrs. Roeder nagbarug sa akong kiliran, didto sa hospital. Dili ko gayud mahikalimtan ang maong babaye. Bisan unsa pa'y mahitabo, dili ko gayud siya malimtan. Siya'y batan-on pa lamang nga babaye kaniadto. Ang iyang bana usa dinhi ka superintendente sa buhatan ug sakyanan. Ug akong—ako siyang nahinumdoman nga nagabarug sa akong kiliran, siya ug si Mrs. Stewart. Ug sila mao ang mibayad sa akong balayronon sa hospital. Akong. . . Wala kami bisan pagkaon nga makaon, sa balay, busa unsaon man namo ang pagbayad sa balayronon sa hospital, gatusan ka mga dolyares? Apan siya, pinaagi sa iyang kapunungan sa simbahan ug sa Ku Klux Klan, gibayaran ang balayronon sa hospital alang kanako, sa Mason. Dili gyud ko makalimot kanila. Kita n'yo? Bisan unsa pa'y ilang himoon, o unsa man, sa gihapon akong. . . adunay butang, ug kana nagapabilin kanako, kita n'yo, kon unsay ilang nabuhat alang kanako. Ug ilang gibayaran ang balayronon ngadto kang Doktor Reeder. Siya buhi pa sa gihapon, nagapuyo dinhi sa Port Fulton, ang makasugilon kaninyo sa panghitabo.

<sup>63</sup> Sa dihang naulian na ako gikan sa epekto niadtong ether, adunay butang nga nahitabo kanako didto. Sa una ko pang gitooan nga usa kadto ka panan-awon. Tungod kay, maluya na ako kaayo niadto, ug ako. . . Nagdahum sila nga ako mamatay na. Ang maong babaye nagahilak na. Sa dihang gibuka ko ang akong mga mata, nga matan-aw, akong madunggan siyang nagasulti, ug dayon mibalik ako sa pagkatulog, ug nakamata, sa makaduha o makatulong higayon. Ug dayon aduna ko'y panan-awon. Ug unya aduna ko'y. . .

<sup>64</sup> Mga pito ka bulan ang milabay, gikinahanglan kong moadto ug ipakuha ang mga nasampong nga kapsula sa shotgun ug ang mga grasahong mga saput sa pagpangayam gikan sa akong mga batiis; wala kini nakuha sa doktor. Ug busa nahiloan ang akong dugo, ang duha ko ka batiis nanghubag na ug kadoblihon ang sa likod ilalum nako, ug gusto nilang kuhaan ang duha ko ka mga batiis hangtud diha sa akong mga bat-ang. Ug ako lang. . . Ako miingon, "Ayaw, ipataastaas lang ug diyutay ug putli lang

kutob *dinhi*.” Dili ko na gayud maantos kadto, kita n’yo. Ug gani sa kaulahian, si Doktor Reeder ug si Doktor Pirtle, nga gikan sa Louisville, gihimo ang operasyon, ug naghiwa diha niini ug gitangtang kini; ug karon aduna na ko’y maanindot nga mga batiis, sa grasya sa Dios.

Apan ilalum sa—sa ulahing panan-awon nga nagkaaduna ko . . .

<sup>65</sup> Ang unang panan-awon, sa dihang naulian ako, ug dayon midangat ako niining panan-awon. Ug abi nako atua ako sa infierno, sa ingon ka tin-aw kaayo . . .

<sup>66</sup> [Usa ka igsoon sa kongregasyon nagaingon, “Pasayloa ko, sir.”—Ed.] Uh-huh. [“May usa ka babaye dinhing dapita nga nakuyapan, didtong dapita.”] Sige, usa kaninyo ang magapandong sa mga kamot diha kaniya, ug siya . . . tingali dalhon siya sa mahangin. Karon kon kinsa man ang nagatindog diha, ipandong ang imong mga kamot kaniya.

Mag-ampo ta.

<sup>67</sup> Minahal nga Ginoong Jesus, hinaut nga ang among igsoong babaye nga nagmasakiton ning buntaga, ug nga siya nakuyapan sa maong lawak, hinaut nga ang Imong grasya ug kusog ug gahum . . . may mga kamot karon nga nakapandong kaniya, nga nagarepresentar Kanimo. Ug ang Kasulatan nag-ingon, “Kining mga ilhanan maganunot kanila nga nagatoo. Kon ilang ipandong ang ilang mga kamot sa masakiton, mangaayo sila.” Ug karon hinaut nga ang among igsoong babaye mahigawas na niining maong balatian, ug mamaayo sa kahimayaan sa Dios. Sa Ngalan ni Jesus Cristo among ginapangayo kini, ug ginatugyan siya diha Kanimo. Amen.

<sup>68</sup> Karon dad-a siya sa mahanging lugar. Kini’y—kini’y maalimuut kaayo. Ako kining mabati dinhi, gayud, nga dili gayud maayo. Makalipong kini nga bation, dinhi sa intablado. Nabati ko kini, sa makaupat o makalimang kapiloon dinhi. Kon aduna may . . . sa dihang maarang-arang na’g diyutay ang iyang gibati, aba, dad-a siya sa kon diin makahanggab siya ug hangin. Kana’y maayo. Uh-huh. Tan-awa, maalimuut karon kaayo, nasayod na mo. Ang mga tawo nagapagula, ang matag-usa kanato, ingon ka daghang kwadradong mga balatian lamang. Kon aduna mo’y, usa nga may tubig diha, o unsa man nga mahimong ibutang sa igsoong babaye. Siya’y—siya’y, maayo na karon. Kita n’yo? Sige. [Usa ka igsoon sa kongregasyon nagaingon, “Abrihan lang gihapon nato ang mga pultahan, Igsoong Branham.”—Ed.] Oo, tingali kon mahimo ninyong maablihan ang mga pultahan, tingali, o nga makahatag lang ug diyutay’ng hangin, sumala sa atong kaya nga mahimo, sa unsa mang pamaagi, kita n’yo.

69 Karon niining higayona, sa dihang anaa ko niining pananawon, ug nagadahum nga ako—ako milabang na gikan niining kinabuhia ngadto sa kasakitan.

70 Ug paglabay sa pito ka bulan, diri sa Clark County Memorial Hospital, nagkaaduna ko'y ikaduha nga operasyon. Ug niadtong higayona, sa dihang naulian ako, nagdahum ko nga nagatindog ako didto sa Kasadpan. Aduna na pud ko'y usa ka pananawon. Ug nga may usa ka dakung krus nga bulawan diha sa kawanangan, ug ang Himaya sa Ginoo nagadagayday gikan nianang maong krus. Ug mitindog akong nakabukhad ang akong mga kamot nga ingon *niini*, ug kadtong maong Himaya nagakahulog paingon sa akong dughan. Ug ako. . . Ang maong pananawon mibiya na kanako. Ang akong amahan nagalingkod didto nga nagatan-aw kanako, sa dihang miabot kadtong maong pananawon.

71 Kanunay ko nang gibati kini, inyong. . . Ang tanang tawo nasayod na kanako niining mga tuiga, nahibalo nga sa una ko pang gusto moadto sa Kasadpan. Nahibalo na mo kung giunsa kini. Sa una pang aduna na'y butang ngadto sa Kasadpan. Apan tungod sa astronomo nga misulti kanako sa usa ka higayon, ang mao rang butang, nga kinahanglan kong moadto sa kasadpan. . . Ang mga bitoon, sa dihang sila nagalabang na sa ilang ginaliyokan ug uban pa, natawo ako ilalum nianang maong timaan, ug dili gayud ako magmalamboon sa Sidlakan; gikinahanglan kong moadto sa Kasadpan. Ug sa miaging tuig ako miadto didto, sa Kasadpan, aron tumanon ang kon unsay dugay nang gitinguha sa akong kinabuhi, kita n'yo, sa pagbuhat—pagbuhat niini.

72 Nganong atua man ko didto? Pinakakataw-anan kini nga butang. Ang mapahimutang didto sa disyerto, nagabayad ug usa ka gatus ug napulo ka mga dolyares matag bulan, sa pagarkila, ug ania may balay dinhi, usa ka puluy-anan sa pastor, nga gihatag alang kanako, kita n'yo. Apan mao kini ang pagsunod sa Ginoo, kita n'yo, kana—kana lang ang nahibaloan kong buhaton. Ug nasayod kamo sa maong mga pananawon ug kon unsa ang nahitabo didto. Karon—karon diha niini gusto kong isulti aron nga. . .

73 Karon kon ang atong igsoong babaye nagabati ug diyutay'ng kaluya, Igsoong Roy, ug siya'y. . . gusto niyang mogawas kon asa man ug ipalingkod siya sa usa ka lawak diring dapita, diin makahanggab siya ug mas daghang hangin o sa ingon niana, ug maayo gayud, tungod kay, mabati kong mahimong maayo na siya karon, tan-awa. Maayo na kini. Maluya lang gyud siya, may gibati. Ug busa akong—akong ginasulti kaninyo, kon siya. . . kon gusto ninyong dad-on siya dinhing dapita diin ang hangin. . . abrihi kining mga bintana, Igsoong Roy, ug kon ang maong igsoon gustong moagi, kana—kana'y wala'y kabilinggan. Kita



n'yo, kon gusto niyang mo—moari dinhing dapita, bueno, ayaw lang ikahadlok kana.

<sup>74</sup> Gusto ko siyang pandongan sa kamot sa dihang molabay na siya duol dinhi. Pasayloa ko ninyong tanan sa kadali lang. Ug pasayloon ako sa Dios tungod sa . . . Kana, husto kana, igsoon.

<sup>75</sup> Langitnong Amahan, kining Imong anak nga babaye diri nga nagalingkod dinhi niining buntaga, ug siya mianhi sa pagpatalinghug sa Mensahe, ug nagkaadunay. . . Si Satanas nagapaninguha'g pugngan siya gikan niini, apan dili niya kini mahimo. Dili niya kini mahimo. "Si Satanas dili makahimo, diha sa Ngalan ni Jesus Cristo."

Sige. Bueno, kanang pultahan, tingali kon may pipila ka. . .? . . .mga kaigsoonan, nan ang hangin makalahus diri, kaninyo.

<sup>76</sup> Oh, kon inyong hisgotan ang bahin sa pagkaalimuut, angay ninyong maadtoan kining mga lugar latas sa kadagatan kon diin ila lang ginapanghapnig ang usa ibabaw sa usa, nga may mga sanla ug kanser. Ug, oh, sus, halos dili ka makaginghawa, kabalo mo, sa mga butang nga ingon niana. Napahimutang sila sa dagkung mga gambalay, kontaminado na kaayo sa—sa sa mga balatian. Ug kamo nasayod na kon unsa ang sanla. Didto, nanghigda didto nga wala nay mga dalunggan, ug ang katunga sa ilang nawong gikaon na, ug wala nay mga bukton, ug gagmay'ng mga kahoy ingon nga mga tiil, ug mga butang nga ingon niana, nanghigda, ang usa ibabaw sa usa. Ug daghan kanila ang naghimalatyon na mismo niadto, nanggilubog na didto, gikan sa pagpahiluna kanila ibabaw sa usa'g usa, nagapaningkamot sa pagsulod kon asa man, nahibalo mo, aron makapatalinghug sa Mensahe.

<sup>77</sup> Ug karon—karon dinhi niini, sultihan ko kamo sa kon unsay nahitabo. Sa maong panan-awon nga nagkaaduna ko, akong balikon, kay akong nasulti na kana, ang duha ka mga panan-awon, aron ipakita kaninyo ang bahin sa usa kanila. Ako mopaingon na kaniadto sa Kasadpan. Dugay ko nang gipangandoy kana.

<sup>78</sup> Ug karon, ang katuyoan sa Mensahe ning buntaga mao'ng pagpahibalo sa iglesia, sa tanan nga itugot Niya kanako nga ibalita sa iglesia, sumala sa akong nahibaloan, hangtud sa . . . sa akong pagpadayon. Ug misantop kini kanako, busa gusto kong pahibaloon ang iglesia. Karon, kini alang lang niining tabernakulo, kita n'yo, alang dinhi. Karon, ug sa niining maong panan-awon, ang usa nga una, ania kon unsa ang nahitabo.

<sup>79</sup> Human nga miabot ang panan-awon kanako, ug luya na ako kaayo, ug ako nawad-an na niadtong dugo, ug nahiadto. . . Naghunahuna ko nga nagakaunlod na ako ngadto sa walay-kinutubang Eternidad. Kadaghanan kaninyo ang nakadungog na kanakong nag-ingon niini kaniadto, ug—ug nga nagakaunlod

ngadto sa walay kinutubang Eternidad. Una, nagalahus ako niadtong daw sa mga panganod, ug dayon lahus sa kangitngit, ug padayong nagakaunlod, paubos, paubos. Ug ang unang butang nga mahibaloan mo, nakaabot ako sa mga dapit sa mga nangalaglag na, ug didto ako—ako misiyagit. Ug ako mitan-aw, ug didto, ang tanan gayud, walay sukaranan niini. Wala gayud ko’y kahunongan sa pagkahulog. Ngadto sa Eternidad, daw sa, ang akong pagkahulog. Wala gayu’y kahunongan, wala gayud.

<sup>80</sup> Ug dayon daw sa unsa ang kalainan kadto kaysa niining panan-awon nga akong nabatonan dinhi, sa dili pa lang dugay, ang mahiadto sa Himaya kauban sa mga tawo, ang maong kalainan! Apan dinhi niini, samtang ako nagakahulog, ako sa katapusan, ako—ako misangpit ngadto sa akong amahan. Natural, ingon nga usa ka batan-on, kana ang buhaton ko. Ako’y misangpit alang sa akong papa, ug ang akong papa wala didto. Ug ako’y misangpit alang sa akong mama, “Salu-a ninyo ako!” Wala’y mama didto. Ug dire-diretso ako niadto. Ug dayon ako misangpit niadto alang sa Dios. Walay Dios didto. Wala gayud bisan unsa didto.

<sup>81</sup> Ug sa wala madugay akong nadungog ang nagaagulong tingog nga kaniadto ko lang nadungog, pinakamakalilisang kadto nga pagbati. Wala’y paaging. . . Bisan ang literal nga daub sa kalayo mahimong mahayahay pa kaysa mahitungod sa kung unsa kadto. Karon kadtong mga panan-awon wala pa gayud nasayup. Ug kadto maoy usa lang sa pinakamakalilisang nga pagbating nagkaaduna ko, ug unsay. . .

<sup>82</sup> Nakadungog ko’g kasaba, tingog nga daw sama sa usa ka matang sa—sa—sa minultohang hitabo. Ug nga nagakahitabo kadto, ako mitan-aw, may nagapangabot, ug kadto’y mga kababayen-an. Ug dunay mga berdeng butang sila, nga mahimo lang nga makita gayud ang ilang nawong, ug adunay berdeng butang nga anaa sa ubos sa ilang mga mata. Ug ang ilang mga mata daw nanggipikat, sama sa mga kababayen-an karon nga nagpintal sa ilang mga mata, pikat nga ingon *niana*, ug sa ilang mga mata ug nawong gayud. Ug sila naga ingon-ani, “Ooh, ooh, ooh, ooh!” Oh, sus!

<sup>83</sup> Ako misiyagit gayud, “O Dios, kaloy-i ako. Kaloy-i ko, O Dios! Asa na ba Ikaw? Kon tugotan Mo lang ako nga mobalik ug mabuhi, Ginasaad ko Kanimo, magbinuotan na gayud ako nga lalaki.” Karon, mao lamang kana nga butang ang masulti ko. Karon, ang Dios nasayod, ug sa Adlaw sa Paghukom, Iya akong pagahukman alang nianang maong pag-asoy. Mao kana’y akong giingon, “Ginoong Dios, tugoti akong makabalik, ug akong isaad Kanimo nga ako magbinuotan na nga batang lalaki.”

<sup>84</sup> Ug sa dihang napolisilang ako, nakapamakak na ako, nabuhat ko na ang halos tanan nga mahimong buhaton, usa ka butang lang ang masulti ko. . . Tingali maayong tin-awon ko na lang kini

samtang ania pa ko mismo dinhi karon. Ug sa dihang midungo ako ug nakita nga ako mabahin na sa katunga sa pagkaposil, halos, miingon ko, “Dios, kaloy-i ako. Nasayod Ka nga ako wala gayud nakabuhat ug pagpanapaw.” Mao ra kadtong butanga ang akong masulti ngadto sa Dios. Wala ko pa gayud gidawat ang Iyang pagpasaylo, ug sa tanan niadtong mga butanga. Ingon ko lang, ang maingon, “Wala gyud ko’y nahimong pagpanapaw.”

<sup>85</sup> Ug unya ila akong gipagawas didto. Ug pagkahuman, niana, ako mihilak, “Dios, kaloy-i intawon ako. Magbinuotan na ako nga lalaki, kon Imo lang ako tugotan sa pagbalik,” kay ako nasayod nga may usa ka Dios kon diin man. Ug busa nga tabangan ako, kadtong maluya nang mga binuhat sa tibuok palibot, usa pa lamang ako ka bag-ong abot. Ug ang pinakamakalilisang, mangil-ad, ug di-diosnong pagbati niana. . . Daw sa dagku’ng mga mata, dagku’ng mga pilok nga sama *niana*, ug nangapikat sama sa iring, nangapikat sama *niini*; ug ingong anang butang nga berde, ug kini nga daw sa gikutkut na o butang nga ingon niana.

Ug sila—sila padayong naga, “Ooh, ooh, ooh!” Oh, daw unsang pagbati! Karon sa dihang ako. . .

<sup>86</sup> Dayon sa kalit, mibalik ako pag-usab sa kinabuhing natural. Kadtong butanga nakapabalaka kanako. Naghunahuna ko, “Oh, dili unta gayud mahimo nga ako mahiadto sa usa ka lugar nga ingon niana; walay si bisan kinsa pa man ang kinahanglan mahiadto sa usa ka dapit nga ingon niana.”

<sup>87</sup> Pito ka bulan ang milabay, aduna ko’y panan-awon nga nagatindog didto sa Kasadpan, ug nga makita kadtong bulawang krus nga nagakunsad kanako. Ug ako—ako nasayod nga adunay mga lugar sa mga hinukman na sa usa ka dapit.

<sup>88</sup> Karon, wala ko kini namatikdi ug maayo hangtud mga upat na ka semana ang milabay. Ang asawa ko. . . Wala gayud nakahunahuna niini sa maong kahimtang. Sa miaging upat na ka semana, ang asawa ko ug ako miadto sa Tucson, aron sa pagpamalit. Ug samtang kami nanaglingkod. . . Ang asawa ko, nangadto kami sa ubos, ug—ug may grupo sa bayotong mga lalaki nga gisalapid ang ilang buhok, nasayod na mo, sama sa ginahimo sa mga babaye, ug—ug mga bangs nga sinudlay paubos sa agtang, ug nangsul-ob niining ubos kaayong mga pantalon, nga daw sa, siguro mga beatniks, o kon unsa man ang tawag ninyo kanila. Ug sila anaa didto, ug ang tanan na mitan-aw kanila, ug ang ilang mga ulo ingon *niana* kadagku, sama sa mga babaye nga nagpauso dinhi niining “waterhead” nga mga alut, nasayod na mo. Ug atua sila didto.

<sup>89</sup> Ug milabay ang usa ka batan-ong babaye, ug miingon siya, “Unsa bay imong hunahuna bahin niana?”

<sup>90</sup> Ako miingon, “Kung ingon-ana angay kang maulaw sa imong kaugalingon, kon nakahunahuna ka niana.” Miingon ko,

“Aduna siya’y ingon-anang katungod sa paghimo niini sama kanimo. Wala ni usa sa inyo ang adunay katungod.”

<sup>91</sup> Busa misaka ko sa ibabaw, ug ako milingkod. Ug sa nakalingkod na ko, adunay usa ka eskilitor, sa J.C. Penney’s Store kadto, ug ang maong eskilitor nagadala sa mga tawo paibabaw. Bueno, nagkasukaon gayud ako niadto, sa pagtan-aw niadtong mga babaye nga nagasaka didto; mga batan-on, tigulang, ug walay pagsapayan, kunoton na, batan-on, ug tanan na, nga ningsul-ob ug gagmay’ng mga purol; ang ilang malaway nga mga lawas, ug kadtong mga babayeng nanggibisti’g makihilawason, uban sa kadtong mga pinaulbo nga mga buhok sama niana, ug ania sila nga nagaabot. Ug ang usa nga mismong nagalakaw pagawas niadtong eskilitor, nagapahiduol sama niana, kon diin ako nagalingkod niadto sa usa ka lingkuranan, nagalingkod didto nga pinaduko ang akong ulo.

<sup>92</sup> Ug ako miliso ug mitan-aw. Ug ang usa kanila nga nagasaka sa maong hagdanan nagaingon, “Ooh,” Kinatsila nga pagkasulti, ngadto sa laing babaye. Usa siya ka puting babaye nga nagaestorya ngadto sa Katsilang babaye. Ug sa dihang ako mitan-aw, [Si Igsoong Branham nagapapitik sa iyang tudlo—Ed.] sa kalit lang ako’y nausab. Didto, akong nakita na kana daan. Ang iyang mga mata, nasayod na mo kung ginaunsa sa mga babaye sa paghimo niini karon, ginapamintalan ang ilang mga mata, bag-ohay pa, nga sa daw iring, nahibalo na mo nga ginabutang kini sama *niini*, ug nagasuot ug mga antipara’ng daw iring ug tanan na, nahibalo na mo, uban sa mga mata nga pinataas sama *niini*, ug kanang berdeng butang ubos sa ilang mga mata. Kadto mao ang butang nga akong nakita sa batan-on pa ako. Didto ang maong babaye sa tukma gayud. Ug naminhod ang tibuok kong lawas, ug misugod ko’g pagtan-aw sa palibot, ug didto kadtong mga tawo nga nagayamyam, kabalo na mo, naga-inistoryahanay bahin sa mga presyo ug mga butang sulod sa maong gambalay. Ug gayud ako . . .

<sup>93</sup> Daw sa ako nausab sa usa ka kalit. Ug ako mitan-aw, ug napamalandongan kong, “Mao kanay akong nakita sa inferno.” Mao gayud sila, kadtong kinutkut. Nahunahunaan kong tungod kay didto na sila sa inferno mao kon unsay nakapahimo kanilang ingon niana, maberdehong asul ubos sa ilang mga mata. Ug ania kining mga bayhana nga napintalan sa maong maberdehong asul, sa maong pamaagi gayud nga giingon sa panan-awon nga kap-atan na ka tuig ang milabay.

<sup>94</sup> Kita n’yo, mga kap-atan na ka tuig ang milabay, mao kon unsa na kini. Ako’y kalim-an na ug upat ka tuig ang panuigon; katorse pa ako niadtong tungora. Busa mga kwarenta na ka tuig ang milabay, Ako . . . Ug mao kana ang—ang . . . Mao kana ang ihap, bisan pa, sa paghukom, kita n’yo. Karon adunay . . .

<sup>95</sup> Ako nang nakita kadto ug dili ako makasulti sa akong asawa sa iyang pag-abot. Siya atua didto sa pagpaningkamot nga mapalitan si Sarah ug ang mga bata ug mga butang, daw sa—sa bisti o butang nga alang sa eskwelahan, ug ako—ako dili makahimo bisan...dili gani ako makasulti kaniya. Siya miingon, “Bill, unsa bay nahitabo kanimo?”

Ako miingon, “Honey, ako’y mora’g...halos daw sa patay na ako nga tawo.”

Ug Ingon niya, “unsa bay nahitabo? May sakit ka ba?”

Miingon ko, “Wala. Aduna la’y butang nga nahitabo.”

<sup>96</sup> Karon wala siya masayod. Ginapaabot niya nga mobalik kining teyp. Wala ko pa gayud kini masulti ni bisan kinsa man. Ug akong gihunahuna nga ako magpaabot, ingon sa akong gisaad, nga dad-on kini ngadto sa iglesia una. Kita n’yo? Dad-on kini ngadto sa iglesia. Mao kana’y akong saad. Ug inyong masabtan, human karong gabii, ang hinungdan nganong ako naninguha sa pagtuman sa akong saad. Kita n’yo?

<sup>97</sup> Akong nahunahuna niadtong tungora, sa dihang akong namatikdan sila nga daw may mga mata nga kinutkutkut kadtong mga bayhana. Didto aduna ang mga Katsila, ang taga-Pransya, ug taga-India, ug mga puti, ug tanan na nga nagkatipon, apan kadtong mga pinaulbo nga mga buhok, nahibalo na mo, gipaulbo, pinaagi niadtong mga pagsudlay, sa pamaagi sa ilang pagsudlay nga pinabalik, nga pinabukhad gayud, ug unya pinabusyad. Kamo nahibalo na, nahibalo na mo kon ginaunsa nila kini sa paghimo, ginaayo’g maayo sama sa ilang pagbuhat niini. Ug unya ang ilang mga mata nga daw kinutkut tan-awon, ug ang mga mata nga may pintal, gipangpikat kini sama sa mga mata sa iring. Ug sila naga-estoryahanay, ug didto na usab ako, nagatindog didto sa tindahan sa J. C. Penney, nahibalik na sab sa inferno.

<sup>98</sup> Ako—ako—nahadlok ako’g maayo. Ako naghunahuna, “Ginoo, siguradong wala ako namatay, ug gitugot Mong mahianhi ako niining dapita bisan pa.”

<sup>99</sup> Ug didto atua sila, nagahimo’g...sa palibot lang ingon niana, sa niadtong maong panan-awon nga mora’g, halos dili mo kini madungog sa inyong mga igdulongog, nasayod na mo. Ang mga pagyamyam lang ug mga lihoc, sa mga tawo, ug kanila nga mga kababayen-an nga nagasaka niadtong eskilitor ug nagalakaw-lakaw didto, ug kadtong, “Ooh, ooh!” Atua sila didtong mga berdeng, kataw-anan tan-awon nga mga mata, ug puno sa kabangotan.

<sup>100</sup> Ug miduol ang asawa ko. Ug miingon ko, “Pasagdi lang sa ko sa makadiyut, honey.” Ako miingon, “Kung okay ra sa imo, Ako—ako—ako gusto nang mopauli.”

Ug siya miingon, “May sakit ka ba?”

101 Ako miingon, “Wala man, adto nalang, honey, kon aduna ka pay pamaliton.”

Siya miingon, “Wala na, human na ko.”

102 Ug miingon ako, “Pasagding gunitan ko ang imong bukton.” Kita n’yo? Ug ako migawas.

Siya miingon, “Unsa bay nahitabo?”

Ako miingon, “Meda, ako—ako—ako . . . Adunay butang nga nahitabo didto.”

103 Ug samtang ako atua didto niadto, akong nahunahuna kini, “Unsa na bang adlaw ang atong ginapuy-an? Mao na ba kaha kini ang Ikatulong Pagbira?” Karon aduna ko’y pipila ka gilista dinhi.

104 Si Jesus. Atong makaplagan nga, si Jesus, sa Iyang ministryo, human nga miwali siya sa mga tawo. Karon angay nga mahiuon gayud kita sa Kasulatan bahin niini. Human nga natapus ni Jesus ang Iyang ministryo, ug ang Iyang maong ministryo gisalikway sa mga katawhan. Karon pagasabton ninyo ang maong mga linya, paghan-ay sa inyong kaugalingong pagsabot. Hinumduma kon unsay akong giingon kaninyo sa sugod pa. Human nga Siya miwali na . . .

105 Miabot Siya ingon nga ang maong Usa nga gisaad alang niadtong adlaw. Kitang tanan nasayod niana. Ang mga Kasulatan mipaila kang Jesus Cristo ingon nga Mesias. Tinuod kana. Sa hingpit gayud, nga malig-on, gipanghimatud-an sa Dios ug sa Iyang Pulong, nga Siya mao ang Mesias. Sa walay duhaduha. Kon aduna ma’y nagaduhaduha niini, kon nagaduhaduha ka man, nan kinahanglan kang moduol sa altar, nga, “Siya dili mao ang Mesias.” Klaro kaayo Siyang gipaila nga mao ang Mesias. Apan sa human nga Siya klarong gipa . . . Gipaila Siya sa Dios.

106 Sama sa gipamulong ni Pedro sa adlaw sa Pentecostes, sa dihang nagsulti siya ngadto sa Sanhedrin didto, sa upat . . . mga upat ka mga adlaw’ng nanglabay. Siya miingon, “Si Jesus nga Nazareton, usa ka Tawo nga gipamatud-an sa Dios diha kaninyo pinaagi sa mga ilhanan ug mga kahibulongan, nga gihimo sa Dios pinaagi Kaniya diha sa taliwala, nga kitang tanan mga saksi niini. Kita n’yo? Inyong gidakup, ug pinaagi sa dautang mga kamot, ug gilansang ang Prinsipe sa Kinabuhi; nga kinsa gibanhaw sa Dios, ug gipadayag kining mga butang nga inyong makita.” Kita n’yo? Si Cristo buhi. Siyempre, buhi sa gihapon karon.

107 Karon human nga si Jesus sa dayag miabot, nagpaila sa Iyang Kaugalingon; ang Dios mipaila Kaniya, ug Siya’y nagpropesiya. Ug human sa mga adlaw sa Iyang pagpropesiya, bisan pa’g Makasulatanong gipaila, gisalikway Siya sa mga tawo. Tinuod kana. Ug Siya miwali kaniadto human nga ila

Siyang gisalikway dinhi, kadtong mga may posibilidad nga mamaluwas. Himumdumi, sa dihang Siya'y nagapangwali pa, adunay posibilidad si kinsa man nga maluwas. Wala kita masayod kung kinsa man sila. Sila mga pinili nang daan. Apan Siya mipadayon gayud sa pagwali.

<sup>108</sup> Apan human sa mga adlaw sa Iyang pagwali, ang Iyang ministeryo nagpadayon, kay ang katapusang pundok nga Iyang giwalihan mao kadtong mga kalag nga atua sa infierno, nga dili na gayud mapasaylo pa. Klaro kong gibasa kana gikan sa Biblia dinhi, gikan sa Ikaduhang Pedro. Kita n'yo? Miadto Siya ug miwali ngadto sa mga kalag nga atua sa bilanggoan, nga mao ang infierno, kinandaduhan hangtud sa Adlaw sa Paghukom.

<sup>109</sup> Kay, makita ninyo, ang Paghukom dili pa karon, ug wala pay nagakalayo nga infierno karon. Adunay moingon kaninyo, “Ang maong tawo anaa na sa nagakalayong infierno karon,” kana'y sayup. Kita n'yo? Ang usa ka maghuhukom sa yuta makiangayon lang nga dili gayud hukman ang usa ka tawo hangtud nga siya gidala na sa paghusay. Ug dili gayud igatambog sa Dios ang usa ka tawo ngadto sa—sa hudno nga nagadilaab sa kalayo hangtud nga siya una mahukman pinaagi sa Kaugalingong mga balaod sa Dios. Gisalikway niya ang kalooy, busa, tan-awa ninyo, siya kinahanglan una may paghusay, ug ang paghusay mao ang Dakung Maputi nga Trono sa Paghukom. Apan karon siya anaa sa usa ka lugar nga gitawag ug usa ka balay'ng bilanggoan.

<sup>110</sup> Ingon nga nakita ko ang maong panan-awon sa maong duha ka mga lugar, ug sa grasya sa Dios. . . Akong ginaingon kini nga dili aron nga mahimong mapasipad-on, ug, kon kini sayup man, pasayloon ako sa Dios. Nagatoo ako nga ako nahiadto na sa maong duha ka mga dapit, kita n'yo, sa maong duha ka mga dapit. Ug ako nang nakita ang mga tinubos, ang mga bulahan; ug akong nakita ang mga nangalaglag na, ug kon asa sila dapit. Ug mao nga kon nganong ako nagabarog ingon nga inyong igsoon, karon, sa pagpasidaan kaninyo sa pagkalagiw gikan nianang paubos nga dalan. Ayaw gayud kamo'g adto nianang dalana. Ug aduna na kaninyo ang tanan aron magkinabuhi alang, nianang dalaygong dalan pataas, diin ang mga tinubos anaa diha sa kalipay ug kalinaw, ug dili na sila makasala. Sila dili—dili na mamahimong magmagul-anon pa. Dili na gayud. Didto, wala nay bisan unsa; hingpit na sila. Nakita ang maong duha ka lugar! Nasayod ako nga usa kana ka makalilisang nga pahayag nga himoon sa usa ka tawo, apan, ang Dios ingon nga akong Maghuhukom, mahinuklugon kong ginatooan nga nakita ko ang maong duha ka mga lugar. Ako—akong ginatooan kana.

<sup>111</sup> Ug, oh, ipahilayo unta kang bisan kinsa ang pagpakasulod nianang mga dapita sa mga nangalaglag na! Kon kamo man nagatindog nga may mainit nga mga alambring gitusok diha kaninyo, gisakit ug maayo sa tanang paagi, dili kini mamahimong sama nianang yawan-ong pagpaantus nga aduna

nianang lugara. Wala gayu'y mamahimong. . . Ang tawhanong panghunahuna dili makahimong, dili mahimong matugkad sa tawhanong panghunahuna kon unsa gayud kanang lugar sa mga nangalaglag na. Walay paagi aron isaysay kini. Ug walay paagi aron isaysay kon unsa gayud ang dapit sa mga bulahan, maanindot kini kaayo. Kadto makalilisang kaayo, ug Kini maoy—maoy maanindot kaayo, gikan kini sa pagkatalamayon ngadto sa pagkahalangdon. Busa kon kinsa man ang nakadungog kanako. . .

<sup>112</sup> Ug ako nagkatigulang na nga tawo. Wala ako masayod kon unsa pa ka kadugayon ang igadugay ko. Hapit na akong mahimong kalim-an ug lima ka tuig ang kagulangan. Ug ako—ako wala masayod, sumala sa kinaiyahan, wala na ako'y daghan pa kaayong mga katuigan. Wala ko masayod kon asa kining teyp mopaingon. Apan itugot sa matag-usa nga makadungog, dinhi ug sa teyp, o kon asa man kini mopaingon. Ayaw gayud kamo'g paingon nianang mga lugar sa nangalaglag na. Dili ninyo mahulagway ang inferno nga ingon niana kadautan. Ug kon unsa may inyong ginabuhay, ayaw gayud pagkuha sa bisan unsang. . . kalimti kini, niana ang mga lugar sa mga bulahan. . . Akong isulti kini, kauban si San Pablo, “Wala makita sa mata, wala madungog sa igdulungog, o ni mahimong mosantop kini sa kasingkasing sa tawo, kon unsay giandam sa Dios kanila nga nagahigugma Kaniya.” Busa paghunong, kon ikaw ma'y nagapaminaw diha sa teyp, palunga ang maong galamiton, ug paghinulsol kon wala ka pa naluwas, ug pagpasig-uli ngadto sa Dios.

<sup>113</sup> Akong ginasulti kini pinaagi sa kaugalingong kasinatian, ingon nga akong ginatoohan sa akong kasingkasing. Ug akong ginaingon, kon kining, kon ang maong mga panan-awon naglingla kanako, kaluy-an unta ako sa Dios sa paghimo'g pamulong nga ingon niana. Apan uban sa pagkamatinuoron sa akong kasingkasing, nahibalo nga wala gayud bisan usa kanilang mga panan-awon ang napakyas, nagatoo ako nga ako nakaabot na nianang duha ka lugar. Ug pahilayo unta ang bisan kinsang tawo nga mahiadto nianang paubos nga dalan!

<sup>114</sup> Karon, si Jesus, human nga natapus na ang Iyang ministryero, miwali niadtong mga kalag nga dili na mahimong maluwas, nga dili na gayud maluwas pa. Karon ang Biblia nagasulti kanato niana. “Miadto Siya ug miwali ngadto sa mga kalag nga didto sa bilangoan, nga wala managhinolsol.” Samtang ang kalooy gikahatag ngadto kanila, ilang gisalikway ang kalooy, ug karon sila nagahulat na alang sa Paghukom. Oh, daw unsa kahang panahon kana! Oh, hinaut kong may pamaagi untang matay-og ko ang kalibutan pinaagi niana, aron ipakita kanila kon unsa gayud ang realidad.

<sup>115</sup> Ug si Jesus miingon, Siya Mismo, “Maingon nga gipadala Ako sa Amahan, mao man usab igapadala Ko kamo.” Ug



maingon nga gipadala Siya sa Amahan sa pagwali ngadto sa—sa mga buhi, niadtong may paglaum pa, ug dayon itanyag ang mao gihapong Mensahe niadtong kinsa wala nay paglaum, maingon nga daw sa makiangayon kini, niining panahona, nga kana kinahanglan pagahimoon, kay ang Espiritu ni Cristo nga nagapuyo sulod kanato wala naga-usab sa Iyang kinaiyahan, o dili naga-usab sa sistema sa Dios. Siya kinahanglan nga mao ra gihapon sa matag kaliwatan. Kinahanglan mao ra Siya gihapon. Ingon pa, “Maingon nga gipadala Ako sa Amahan, mao man usab igapadala Ko kamo.”

<sup>116</sup> Ang mga ministeryo kinahanglan nga mao ra, sa ingon nga giingon Niya. . . Nakita ko ang pipila kaninyo nga ginalista ang mga Kasulatan. San Juan 14:12, “Siya nga nagatoo Kanako, ang mga buhat nga Akong ginabuhar pagabuhaton man usab niya.” Kita n’yo, “ang mga buhat,” ang pagwali ngadto sa mga nangawala, pagpang-ayo sa masakiton, ug dayon ngadto sa mga imposible na gayud nga maluwas pa. Kita n’yo? Ang bulohaton nagpadayon pa gayud nga mao ra sa gihapon. Busa, mao na kini sukad pa, (sukad pa ba kini?) pagaingnon ko kini nga sama niini, ang ministeryo ni Jesus Cristo mipakatawo pag-usab diha sa Iyang Iglesia niining katapusang adlaw. Mao kana kon unsa ang ginatoohan sa kadaghanan kanato. Nagatoo ako uban kaninyo. Nagatoo ako niini. Kon ako man wala mitoo niini, mohimo ako ug laing butang bahin niini. Tungod kay, human niining tanan, ako kini ang maong may. . . ang maong may kalabutan niini. Ug kon ang Espiritu sa Dios maanaa kaninyo, may pagkabalaka kamo sa mga tawo.

<sup>117</sup> Adunay usa ka Kasulatan nga kanunay’ng nakapalibog kanako, kon ngano nga si Moises makasulti sa Dios sa usa ka mas maayo pang idiya kaysa aduna sa Dios, hangtud nga akong nakaplagan nga kadto mao’y Espiritu ni Cristo nga atua kang Moises. Kita n’yo?

<sup>118</sup> Ang Dios miingon, “Moises, ibulag ang imong kaugalingon gikan kanila. Akong pagalaglagon ang maong tibuok butang, ug pagasugdan diha kanimo.”

<sup>119</sup> Siya miingon, “Ginoo!” Iyang gipatunga ang iyang kaugalingon, miingon, “Kuhaa ako. Pagapalaa ang akong ngalan.” Sa niining mga katawhan nga mingsupak, nagkahingawa siya kanila. Kita n’yo?

<sup>120</sup> Ug sa diha nga ang ministro may pagbati alang sa mga tawo sa iyang kasingkasing. . . unsaon ko man nga mabating nahitarung ngadto sa akong. . . sa atubangan sa Dios, ug sa akong kaugalingon, nga ihikaw ang mga butang sa mga tawong imong gihigugma nga labaw pa kay sa imong paghigugma sa imong kaugalingon. Unsaon man sa paghimo sa tawo nga dalhon ang usa ka tawo pasulod sa iglesia pinaagi sa paglamano, o sa pipila ka pagwisik, o sa pipila ka mini nga bautismo, o

unsa pa man, ug tugotan nga mapahimutang sila ilalum sa—sa impluwensya sa usa ka bakak ug nasayod nga ang Biblia anaa man dinha, ug ingnon nga iyang ginahigugma ang maong tawo?

<sup>121</sup> Bisan pa'g magpakilimos ako alang sa akong pagpanginabuhi, o unsa pa kini, hinaut nga magmatinud-anon ako sa Dios ug sa mga tawo, sa pagsulti kanila sa Kamatuoran. Hinaut dili ako mamahimong usa ka malimbungon. Unsaon ko man paglimbong sa akong gihigugma? Bisan pa'g ako silang kinahanglan pagapasakitan, sa gihapon ako silang gihigugma. Mao kana'y hinungdan nga imong bunalan ang imong anak, tungod lagi kay imo siyang gihigugma. Dili tungod kay ikaw wala magkagusto kaniya; apan tungod kay imo siyang gihigugma. Kon siya'y sayup, mahimong mapatay siya kon dili mo siya ginatul-id.

<sup>122</sup> Karon, sukad ingon niana usab ang ministeryo. Maingon kaniadto, mao usab karon. Kini giwali na, ug hingpit nga gipanghimatud-an pinaagi sa Pulong sa Dios, nga kini dili mahimong iya sa tawo, iya gyud kini sa Dios. Iya gayud sa Dios. Himatikdi, ang mao ra nga espirituhanong mga ilhanan nga gibuhay ni Jesus, nahitabo usab sa yuta ning katapusang mga adlaw. Ang mao gayud nga mga espirituhanong ilhanan nga Iyang gipaila ang Iyang Kaugalingon ingon nga Mesias, ang mipaila Kaniya karon. Mesias Siya sa gihapon! Ang mao rang materyal nga mga ilhanan nangtungha sa ibabaw sa yuta, nga nangtungha pinaagi Kaniya, kon unsa Siya kaniadto. Ang mao rang Haligi nga Kalayo nga nakita ni San Pablo, ang mao rang Usa, ang maong tanan nga nahitabo pag-usab pinaagi sa mao ra nga kinaiyahan ang ania niini, nagabuhay sa mao gihapong butang.

<sup>123</sup> Si Jesus nagpahayag nga Siya wala gayu'y nahimong bisan unsa hangtud nga gipakita sa Amahan Kaniya. Ug ang Amahan mao ang Balaang Espiritu, nasabot nato kana. Kini'y opisina lang sa Dios. Kon kini dili pa, nan kinsa man diay sa ila ang Amahan ni Jesus Cristo? Si Jesus miingon nga ang Dios maoy Iyang Amahan, ug ang Biblia miingon nga ang Balaang Espiritu maoy Iyang Amahan. Karon, dili mo Siya mahimong usa ka anak sa gawas, busa ang Balaang Espiritu Dios, mao man si Jesus Dios. Busa, ang Dios, Amahan, Anak, ug ang Balaang Espiritu mao'y . . . Kini mao ang . . . Mao kana'y tulo ka mga opisina sa usa ka Dios. Kini'y tulo ka mga kinaiyahan, ang mao ra nga Dios.

<sup>124</sup> Kabahin ka sa Dios, ug ako kabahin sa Dios, kita n'yo; apan dili ako kinatibuk-an sa Dios, ug ni kamo dili kinatibuk-an sa Dios. Kita n'yo? Kita n'yo? Mga kinaiyahan kini sa Dios diha kanato, ingon nga mga anak nga sinagop pinaagi kang Jesus Cristo. Nga, ang Dios Mismo nahimong tawo, aron mamatay alang kanato.

<sup>125</sup> Karon, ang Balaang Espiritu kanunay'ng nagpakita Kaniya sa mga butang nga moabot, ug wala gayud Siya masayup. Kanunay kadtong hingpit. Husto ba kana? Wala Siya miangkon ug kadungganan sa Iyang Kaugalingon. Iyang gihatag ang kadungganan ngadto sa Dios. Siya miingon, “Ang Anak walay mahimo sa Iyang Kaugalingon gawas sa Iyang makita nga ginabuhat sa Amahan kana.” Ug ang Amahan, ang Balaang Espiritu, maoy Iyang Amahan. Husto ba kana? “Jose, anak ni David, ayaw pagpanuko sa pagpangasawa kang Maria nga imong asawa, kay Kanang iyang gisamkon iya sa Balaang Espiritu,” Nga maoy Iyang Amahan. Ug ang Balaang Espiritu mipakita kang Jesus sa mga butang nga magaabot, misugilon Kaniya sa mga butang pag-una.

<sup>126</sup> Ug Siya maoy Dios nga Propeta. Tungod kay, ang Pulong sa Ginoo nagaabot lamang ngadto sa Propeta; nagapakita nga ang mga Pulong miabot, diha sa ubos nga porma, ang mga propeta misulat sa unsay gisugilon sa Ginoo kanila. Apan wala gayu'y bisan unsa nga Iyang gisulat, tungod kay Siya mao ang Pulong. Siya ang Pulong.

<sup>127</sup> Himatikdi, ang mao ra nga Balaang Espiritu nga mipuyo Kaniya, “Sa dili madugay, ug ang kalibutan dili na makakita Kanako; apan kamo makakita ra Kanako, tungod kay Ako magauban man kaninyo, bisan sa sulod ninyo, ngadto sa katapusan sa kalibutan. Ako moanha ra kaninyo,” miingon Siya. “Ako,” mao ang Amahan nga anaa Kaniya, “nga moanha diha kaninyo.” Ug Siya miingon, “Sa diha nga ang Balaang Espiritu nagaabot kaninyo, Iyang igapadayag kining mga butanga nga Akong gikatudlo kaninyo, ug magapakita kaninyo sa mga butang nga umalabot.” Anaa na karon.

<sup>128</sup> Karon mamatikdan nato, nga sama sa Balaang Espiritu nga nagpamuhat sa Iglesia kaniadto, ingon usab ang maong Balaang Espiritu nagpamuhat sa tukma gayud sa samang mga butang karon; nagapahibalo pinaagi sa Haligi nga Kalayo, sa tukma gayud nga nahitabo kaniadto sa sinugdan, ang samang butang. Ug sa nakita kini nga nagakunsad kang Jesus, gipahibalo kini ni Juan didto sa suba sa Jordan. Ug nagpamatuod sa matag butang, bisan pa sa mga syentipikong litrato niini. Dili kini mahimong malalis. Syentipikanhon kini. Kini'y materyal. Dili kini sulogilanong panghunahuna. Dili kini sikolohiya. Sama sa giingon ni George J. Lacy, “Ang mekanikanhong mata sa maong kudak dili kakuha sa sikolohiya. Ang maong Kahayag miigo gayud sa lente.”

<sup>129</sup> Ug unsa man sa inyong bahin, iglesia, nga mga unom na o walo ka bulan ang milabay dinhi, ug nagabarog dinhi, nagaingon, “Kini'y MAO KINI ANG GINAINGON SA GINOO, nga ako moadto sa Tucson, Arizona. Magkaadunay pagbuto, ug pito ka mga Manulonda ang magatungha.” Nahinumdoman ba ninyo? [Ang kongregasyon nagaingon, “Amen.”—Ed.] Wala bisan

pa sa... Ang Dios nga nagahimo niini sa ka tinuod kaayo hangtud nga ang *Look* nga magasin mikuha ug mga litrato niini. Espirituhanon, nakita na pag-una, nahitabo sa tukma gayud, ang pito ka mga Manulonda, nga mao'y naghatud sa pagtapus sa tanang Kasulatan. Tungod kay, ang tanang mga tinago sa tibuok Biblia napahimutang sa Pito ka mga Selyo. Kita nasayod nga Kana mao ang—ang Basahon, ang selyo Niini, nangahapsay pinaagi Niana. Kini ang tinago sa maong tibuok Basahon, nga napahimutang diha sa Pito ka mga Selyo, nga gitugot sa Ginoo nga mahatud nato.

<sup>130</sup> Ug may mga tawo nga nagalingkod dinhi, karon, nga atua mismo didto uban kanako sa dihang nahitabo kini. Gipamatud-an sa *Look* nga magasin ang mao gihapong butang, nga kini—kini tinuod gayud nga nahitabo. Tungod kay, Dios kadto ang misugilon niini. Dios kadto nga mao'y nagapaluyo sa Iyang Pulong, sa pagtuman Niini sa diha nga ginaingon Niyang pagabuhaton Niya kini. Busa, dili kini sa kung kinsang tawo, karnal nga tawong sama kanako, nga anaa sa taliwala kaninyong mga katawhan. Kini mao ang Dios nga Walay Katapusan.

<sup>131</sup> Nagagamit Siya sa mga tawo. Tinuod kana. Dili Siya nagabuhat ug bisan unsa gawas sa kon unsay Iyang ginabuhat pinaagi sa tawo. Napamalandongan nato kana. Siya, kana mao'y Iyang—kana mao'y Iyang igpalihok. Mao kana'y Iyang gipili. Ngano man, wala ko masayod. Mahimo Niya ang adlaw nga mowali sa Maayong Balita. Mahimo Niya ang hangin nga mowali sa Maayong Balita. Mahimo Niya ang hangin nga buhaton ang mga butang, apan gipili Niya ang tawo.

<sup>132</sup> Mao kana'y Iyang laraw, nga ang tawo mosulti'g balik ngadto sa tawo; dili sa iyang kaugalingon, apan, “Ang Pulong sa Ginoo miabot ngadto sa mga propeta,” sa mga tigpanagna, sa mga magwawali. Ug ang usa ka tigpropesiya nga nagalimod sa orihinal nga Pulong, unsaon man niya pagkahimong usa ka matuod nga propeta? Kita n'yo? Dili siya mamahimo, tungod kay iyang ginapanghimakak ang Kamatuoran sa Pulong. Ug niana nga kini dili man, nan kining Pulong, Mismo, ingon nga ginawali Kini pinaagi sa pagkatinuod sa Pulong ug pinaagi sa pagkatinuod sa Balaang Espiritu, igapadayag Kini ang matag saad nga gisaad Niini. Mao kana kon unsaon nato pagpakisayod kung husto ba kini o dili. Mao kana'y giingon ni Jesus, “Kung wala Ko ginabuhat ang kon unsay nahisulat na mahitungod Kanako nga pagabuhaton, nan ayaw pagtao Kanako.” Kita n'yo? Karon nakita na nato kining mga butanga.

<sup>133</sup> Hinumdomi, ang Pito ka mga Selyo natuman na, ug sa dihang kadtong pitong gipadayag na nga mga Kamatuoran. . .

<sup>134</sup> Ang usa niini, dili Niya itugot ipakisayod kanato. Kita. . . Pila ba ang ania kaniadto dinhi sa Pito ka mga Selyo, ug nakadungog? [Ang kongregasyon nagaingon, “Amen.”—Ed.]

Tanan kamo, siguro. Kita n'yo, ang—ang Ikapitong Selyo, dili Niya itugot kini.

<sup>135</sup> Siya mitindog mismo didto sa lawak ug gipadayag ang matag-usa niini. Ug kon ako miwali man ug bisan unsa sa akong kinabuhi, nga dinihogan, mao kadto. Ug kini angay'ng matinuod, diha kaninyo. Sa pagtindog dinhi ug sa pagsulti kaninyo nga mahitabo kini, ug mipaingon mismo didto, ug bisan pa ang siyensya ug tanang uban pa, ang siyentipikong pagsusi ug tanan na, tinago ngadto sa mga tawo, gipamatud-an nga kini nahitabo mismo didto. Ug mibalik mismo ug nadunggan kining gipadayag, ug gipamatud-an nga ang matag Pulong husto gayud. Unsa na bang adlaw ang atong ginapuy-an? Asa na ba kita?

<sup>136</sup> Ug hinumdomi, nianang Ika-unom nga Selyo, nga diin, ang tanang Pito ka mga Trumpeta nagatingog ilalum nianang Ika-unom nga Selyo. Pag nakaabot na kita diha, inyong makita kana. Ang matag (pito) ka Trumpeta nahitabo diha sa Ika-unom nga Selyo.

<sup>137</sup> Ang pito kanunay gayuy'ng misteryo. Bantaye kanang pito, mao kana ang pagtapus. Mao kana ang Pag-anhi sa Ginoo. Ang Langit walay kasaba, mahilum, walay usa nga naglihok. Tungod kay, si Jesus Mismo miingon, “Walay ni bisan usa ka manolunda sa Langit ang nasayod kon kanus-a Ako mobalik. Wala gani Ako masayod niini, sa Akong Kaugalingon, kon unsang orasa. Gibutang na kana sa Amahan diha sa Iyang hunahuna.” Ang Dios lamang ang nasayod niini, ang Espiritu. Miingon, “Wala Ako nasayod niini.” Kung ingon-ana, wala kini gipadayag. Sa dihang kanang Ikapitong Trumpeta nagtingog. . . o ang Ikapitong Manolunda, ang—ang Selyo nabuksan, dayon adunay kahilum sa Langit. Kita n'yo, wala kini gihatag, kung unsay mahitabo.

<sup>138</sup> Apan ilalum sa Ika-unom nga Selyo, diin kining mga trumpeta gibuksan. Hinumdomi, ilalum dinha, atong makaplagan nga ang Cordero miadto, mitungha sa maong esena. Iyang gibiyaan ang Lingkuranan sa Kalooy. Ang Iyang pagpamuhat sa pagtubos natapus na. Ug Siya miduol ug gikuha ang maong Basahon gikan sa tuong kamot Kaniya nga naglingkod diha sa Trono, ug “ang panahon natapus na.” Ug diha dayon ang usa ka manulonda mitungha sa ikapitong kapitulo, o sa Ika-10 nga kapitulo ug sa Ika-7 nga bersikulo, nagaingon. . . Kining maong Manulonda mikanaug ug nanumpa, nga, “ang panahon natapus na.”

<sup>139</sup> Apan, nakita n'yo, diha niining Basahon mao ang kon unsay gitubos. Kadto mao ang Basahon sa Katubsan. Ug ang tanan nga Iyang gitubos nahisulat nianang maong Basahon. Tanan nga Iyang gikamatyan nahisulat na sa maong Basahon, ug dili Niya mahimong biyaan ang Iyang Lingkuranan sa pagpatigpataliwala hangtud nga Siya hingpit

na nga nakapangtubos. Ug dili Niya kini matubos sa krus, tungod kay sila predestinado na sa Basahon sa Kinabuhi sa Cordero, ug gikinahanglan Niyang magpabilin Didto aron sa pagpangaliyupo hangtud mahuman kanang katapusang tawo. Pagkahimaya!

<sup>140</sup> Apan usa niana ka adlaw Siya mitindog gikan Didto, mihawa. Asa na ba ang maong Basahon? Kini atua pa gihapon sa abstract nga Tag-iyá, ang Dios nga Makagagahum sa tanan. Ug si Juan mitan-aw sa palibot, ug mihilak siya, tungod kay walay tawo nga takus bisan sa pagtan-aw diha sa maong Basahon ug, ilabina gyud, ang pagbukas sa mga Selyo, aron ipadayag ang kon unsay tinago nga nalilong.

<sup>141</sup> Ang mga tinago anaa sa Pito ka mga Selyo. Sa diha nga kining Pito ka mga Selyo gibuksan na, nagbukas kana sa tibuok Biblia. Ang Pito ka mga Selyo; Giselyohan kini sa Pito ka mga Tinago, ug diha niining Pito ka mga Selyo napahimutang ang tibuok tinago Niini. Ug kini mao ang Basahon sa Katubsanan, Bag-ong Testamento.

<sup>142</sup> Dili ang maong Daan. Gipahayag lamang kini alang sa Bag-ong Testamento. “Sila’y gihimong . . .dili sila mahingpit kon wala kita,” Sa Mga Hebreohanon 11. Kita n’yo? Kita n’yo? Karon, ang katubsanan moabot lang sa diha ang Manunubos mamatay na. Ug sila kaniadto potensyal nga anaa ilalum sa dugo sa mga carnero, dili sa Manunubos; dili pa natubos, hangtud miabot ang Manunubos.

<sup>143</sup> Himatikdi karon sa diha nga kining Manunubos . . .Si Juan mitan-aw sa palibot, ug ania ang Dios naglingkod sa Trono, nga aduna ang Basahon sa Iyang kamot, nga naselyohan sa Pito ka mga Selyo, ug ang kinatibuk-ang plano sa katubsanan ania niini.

<sup>144</sup> Ug kini naiwala sa tawhanong kaliwatan, ni Adan. Ug ang Dios . . .Asa kini mibalik? Dili mahimong kuhaon ni Satanas kini; gipahigayon lang niya nga mawala niya kini. Apan diin ba ang Basahon mipaingon kung ing-ana? Dili man iyaha sa tawhanong kaliwatan. Ang mga panalangin dili alang dinhi; dinhi ang tawhanong kaliwatan maoy nagwala niini. Busa kini mibalik mismo ngadto sa orihinal nga Tag-iyá, nga mao ang Dios.

<sup>145</sup> Ania Siyang nagalingkod kauban Niini, ug Siya’y nagtawag sa kinsa mang tawo, usa ka tawo, nga moduol ug kuhaon Kini.

<sup>146</sup> Mitan-aw si Juan sa palibot, ug walay tawo sa Langit, walay tawo sa yuta, walay usa, walay Manulonda, walay bisan unsa nga makakuha sa maong Basahon o sa pagtangtang sa mga Selyo, o bisan sa pagtan-aw Niini. Walay tawo nga takus. Si Juan miingon nga siya mihilak sa hilabihan gayud.

147 Unya usa ka Manulonda ang miduol kaniya, miingon, “Ayaw paghilak, Juan, kay ang Leon sa Banay ni Juda nagmadaugon, ug Siya’y takus.”

148 Ug si Juan milantaw nga makita ang sa usa ka carnero . . . o nga makita ang usa ka leon, ug unsa bay iyang nakita? Usa ka Cordero, ug usa kini ka Nagkadugong Cordero, usa ka Cordero nga daw gipatay. Unsa na ka dugay? Sukad pa sa pagkatukod sa kalibutan.

149 Ang Cordero miadto, miduol ngadto Kaniya nga aduna ang Basahon diha sa Iyang tuong kamot, ug gidawat ang Basahon; misaka ngadto sa maong Trono ug milingkod. Mao na kana. Natapus na (kanus-a man?) sa diha nga ang mga Selyo napadayag na. Sa diha nga ang katapusang usa, nga mao na ang tanan nga Iyang gitubos, wala nay . . .

Mianhi Siya aron pagtubos.

150 Moingon, “Nganong wala man Niya tubsa sila sa miaging kwarenta ka mga katuigan? Sa milabay nga duha ka libong mga katuigan?”

151 Kita n’yo, ang ilang mga ngalan anaa na sa Basahon sa Kinabuhi, nianang maong Basahon. Ug gikinahanglan Niyang mobarug dinhi, tungod kay katuyoan kini sa Dios sa pagtubos kanila. Ang ilang mga ngalan gibutang na diha sa Basahon sa Kinabuhi sa Cordero sa wala pa ang pagkatukod sa kalibutan. Ang Cordero gibutang na didtong kauban niini, aron pagapatyon. Ania na ang Cordero, sa dihang gipatay, nagbalik sa paghimo’g mga pagpangaliyupo.

152 Bantayi Siya! Magkaadunay daghang pagpanundog, daghang uban pa, apan aduna gayu’y maluwas, kay Iyang . . . Ang Iglesia gitakda nang daan nga mamahimong walay buling o kunot. Mamahiadto gayud siya Didto. Ug ang Cordero namatay alang nianang maong katuyoan. Ug dayon sa diha nga ang katapusang ngalan nianang Basahona natubos na, ang Cordero migula ug mikuha sa maong Basahon, “Ako Mao ang nagbuhat niini!”

153 Ang mga Manulonda, ang mga Querubin, ang kaluhaan ug upat ka mga Anciano, ang mga Buhing Binuhat, ang tanan na, gitangtang ang ilang mga purongpurong, mihapa sa atubangan sa Trono, ug miingon, “Takus Ikaw!”

154 Si Juan miingon, “Ang tanan sa Langit ug sa yuta nakadungog kanako nga nagasingit, ‘Amen,’ nagasingit, ‘Aleluya,’ ug mga pagdalayeg ngadto sa Dios.” Ang pagsinggit misulbong. Ngano man? Kay ang ilang mga ngalan atua sa maong Basahon, nga igapadayag, ug gipadayag na kini sa Cordero.

155 Gitubos na kini sa Cordero, apan dili Siya mahimong moduol hangtud ang matag ngalan nahipadayag na, ug kana

nagakahitabo ilalum sa Ikaunom nga Selyo, sa wala pa nabuksan ang Ikapito. Dayon ang walay lama... Dayon ang Cordero mianhi alang sa kon unsay Iyang gitubos. Miabot Siya sa pag-angkon sa unsay Iyang gitubos. Ania na kini Kaniya, dinhi mismo sa Basahon, gikuha Kini gikan sa Iyang kamot. Karon nagaabot Siya aron dawaton kon unsa nay Iyang gitubos. Mao kana ang Iyang bulohaton. Iya nang nahimo. Mianhi Siya aron sa dawaton na kini. Oh, daw sa unsang—unsang higayona! Gipamatud-an na kini, ang Ikapitong Selyo ang nagpamatuod niini. Mibalik ug gikuha ang Basahon sa Katubsanan!

<sup>156</sup> Himatikdi, kini ang mahimong Mensahe sa ikapitong manulonda nga maoy mopadayag sa ikapito, sa Pito ka mga Selyo. Sa Pinadayag 10:7, karon, makaplagan ninyo kini. Kita n'yo?

<sup>157</sup> “Ug iyang nakita kining maong Manulonda nga mikunsad, mitunob sa Iyang tiil sa yuta ug diha sa dagat,” kana mao si Cristo, “dihay balangaw ibabaw sa Iyang ulo.” Himatikdi Siya, inyo Siyang makaplagan diha sa Pinadayag 1, pag-usab, “nga may balangaw ibabaw sa Iyang ulo; kon tan-awon ingon sa mahalong batong jaspe ug kornalina,” ug uban pa. Ania Siyang nagakunsad, gitunob ang usa ka kamot... “Usa ka tiil diha sa yuta, ang usa diha sa tubig; gibayaw ang Iyang kamot. Aduna Siya’y balangaw ibabaw sa Iyang ulo,” pa. Usa kana ka pakigsaad. Siya mao ang Manulonda sa Pakigsaad, nga mao si Cristo; gihimo’g ubos diyutay kay sa mga Manulonda, aron moantus. Anaa Siya nagaabot, “Ug mibayaw sa Iyang mga kamot ngadto sa Langit, ug nanumpa Kaniya nga nagapabiling buhi hangtud sa kahangturan,” ang Usang Walay Katapusan, ang Amahan, ang Dios, “nga ang panahon matapus na,” sa dihang mahitabo na kini. Wala na kini. Human na. Tapos na.

<sup>158</sup> Ug dayon ang Kasulatan nagaingon, “Ug diha sa—diha sa Mensahe sa ikapitong manulonda sa yuta,” ang mensahero sa yuta, ang ikapito ug katapusang Kapanahonan sa Iglesia, “sa sinugdanan sa iyang ministerio,” sa dihang nagasugod na kini sa yuta, nianang higayona, “ang tinago sa Dios, mahitungod niining Pito ka mga Selyo, angay nga ipadayag na nianang panahona.” Karon atong makita kung asa na kita. Mao na ba kaha kini, mga higala, mao na ba kaha? Himatikdi, ang tanan posible.

<sup>159</sup> Ang tanan nga gitubos diha sa maong Basahon, Siya mianhi alang sa pagtubos. Ang tanan nga tubosunon anaa nianang Basahona, gipili nang daan sa wala pa ang pagkatukod sa kalibutan. Siya mianhi sa pagtubos Niini. Ang tanan nga Iyang gitubos nahisulat na diha sulod niini.

<sup>160</sup> Gusto kong pangutan-on kamo sa usa ka pangutana karon. Ug kaninyong mga tawo diha sa teyp, paminaw’g maayo. Kadtong mga makahahadlok nga mga mata, kadtong



makahahadlok nga ulo, mahimong kana kaha kon ngano nga kining Mensahea sukad supak na kaayo sa mga babaye niining modernong panahon? Kini na ba kaha ang Mensahe nianang katapusang manulonda? Unsa bay Iyang giingon didto sa suba, mga katloan ug tulo na ka mga katuigan ang milabay? “Maingon nga si Juan gipadala,” kita n’yo, “aron imantala ang nahaunang pag-anhi ni Cristo, ang imong Mensahe magamantala sa ikaduhang Pag-anhi.” Sa tibuok kalibutan, ug mao kana kon unsa ang gihimo, nan ang Pag-anhi haduol na kaayo. Bantayi kon unsa nay nagakahitabo karon.

<sup>161</sup> Ngano? Nagpangatol ko sa akong ulo. Naglubog ko sa akong unlan. Naglakaw-lakaw ako sa salog. “Unsa na bay nahitabo kanimo?”

<sup>162</sup> Pipila ka mga adlaw nanglabay, akong gipangutana ang duha ka mga lalaki nga akong kasakay. Akong gipangutana si Jack Moore usa ka higayon. Ug tanan kamo nakaila kay Jack Moore. Moadto ako kaniya sa Shreveport. Ako miingon, “Igsoong Jack, nahimo ka nang suod kong higala nga nagkaaduna ako sa kalibutan.” Ug sa wala ko pa siya gipangutana, akong gipangutana ang akong asawa.

<sup>163</sup> Kon aduna may nasayod sa bisan unsa bahin kanako, ang akong mga pagkadili maayo ug—ug tanan na, mao’y akong asawa, kita n’yo, usa ka minahal. Ug akong giingnan siya usa ka adlaw, miingon ako, “Honey, ingon nga imong bana, nga usa ako ka ministro sa Maayong Balita. Dili ko gusto nga magadala ug bisan unsa nga pagpakaulaw sa Usa nga akong gihigugma. Dili. Dili ko gusto nga mopasakit kanimo. Dili ko buot nga magadala ug bisan unsa nga pagpakaulaw diha kanimo. Hinaut dili itugot sa Dios nga makabuhat man lang ako ug bisan unsang butang nga makapasakit kanimo. Ug unsa ka labaw pa sa bisan unsang butang nga makapasakit sa Dios, daw sa unsa ko Siyang labaw pang gihigugma! Asawa ko ikaw; Siya ang akong Manluluwas ug Dios. Gusto kong pangutan-on ka sa usa ka pangutana. Ayaw pagpugong-pugong. Sultihi ko sa kamatuoran.” Miingon ko, “Nasobrahan na ba gayud ang pagtuon ko. . .”

<sup>164</sup> Ug ako nahibulong. Ako’y, ako—ako’y usa ka kinaiya, nga kataw-anan, salikwaot. Nasayod ako niana. Ang matag-usa miingon, “Unsang matanga sa pagkatawo!” Bueno, kita n’yo, dili mo mahimong buhaton kung unsa ka. Ikaw maoy ikaw, sa grasya sa Dios.

<sup>165</sup> Ug ako—ako—ako miingon, “Nawad-an ba ako’g diyutay’ng pangisip, nahibalo na mo, ug—ug daw wala na ba?” Ako miingon, “Nganong pagabadlongon ko man ang maong mga babaye, sa walay undang, nga ako man gihigugma sila?”

<sup>166</sup> Ang ilang tawag, giingon nga ako usa ka “masuk-ano’g babaye,” wala gyud ako masuko. . .Ako nga “suko sa mga

babaye.” Kita n’yo? Sayup kana. Akong gihigugma ang mga babaye, ang pasabot ko, ingon nga akong mga igsoong babaye.

167 Dili ako mopikipik sa imong likod, nga nakitang sayup ka. Masulti ko kana sa inyo. Gihigugma ko kamo’g labaw pa kaysa niana. Ang ubang tawo nga himoon kana, kana’y laing matang sa gugma. Kita n’yo? Gihigugma ko kamo tungod kay ako nahigugma kung unsa kamo; kamo’y katabang ngadto sa anak nga lalaki sa Dios, ug kamo kabahin kaniya. Kita n’yo? Ug ako—ako nahigugma kaninyo tungod nga—nga kamo gibuhat diha sa hulagway sa lalaki, ug ang lalaki gibuhat diha sa hulagway sa Dios, busa, sa paghiusa, kamo usa ra diha kang Cristo. Mao nga ako nahigugma kaninyo. Bisan unsa pang, laing butang, wala kaysa niini. Nasayod ang Dios niana, sa tibuok kong kinabuhi. Kita n’yo? Husto kana. Gihigugma ko kamo. Ngano man nga mobarog ako ug sa walay pag-undang. . .

168 Sa dihang ilang ginaingon, “Sultihi ang tanang mga babaye, nga, kung sila moanhi man aron maminaw kang Igsoong Branham nga nagawali, ipasudlay ug lahi ang ilang mga buhok. Pabutangi’g kalo o unsa man o lain pa, kay iya namang sugdan ang pagpang-atake bahin sa mughong mga buhok, ug ang inyong. . . Ayaw pagbutang ug bisan unsang mek-ap,” ug uban pa nga ingon niana. Mao kana’y ilang gibuhat. “Ang tanan na lang nga iyang ginahisgotan!”

169 Adunay miingon, “Nganong dili man nimo. . .” Miingon, “Ang mga tawo nagatoo kanimo nga usa ka propeta. Nganong dili man nimo tudlo-an ang mga babaye kung unsaon sa pagdawat sa dakung espirituhanong mga gasa, ug mga ingon-anang butang, inay nga paningkamotan sila nga tudloan sa mga butang nga ingon niana?”

170 Miingon ko, “Kung ayaw nila tun-an ang ilang ABC, unsaon man nila pagkahibalo sa algebra?” Kita n’yo? Tul-ira, una.

171 Ug sa dugang ko pang iwali, nagkasamut pa hinoon niini. Dayon kamo moingon, “Nganong dili man ka moundang?” Dili, sir. Kinahahanglan adunay usa ka tingog, usa ka saksi batok niini.

172 Usa sa pinakabantugan nga tawo sa pagpang-alagad karon, mipandong sa iyang mga kamot kanako dili pa lang dugay, miingon, “Ampoan ta ka, Igsoong Branham, kung tugotan mo ako sa paghimo niini, nga pagatangton kana sa Dios sa imong kasingkasing.” Miingon, “Pasagdi silang mga babaye, nianang mga butanga.”

173 Miingon ko, ako miingon, “Nagatoo ka ba niana, sir? Usa ka ka magwawali sa pagkabalaan.”

174 Siya miingon, “Tinuod gyud. Wala ako nagatoo niini, apan,” miingon, “kana—kana’y anaa ra. . .”

Miingon ko, “Dili.”

Siya miingon, “Anaa ra kana sa mga pastor.”

Miingon ko, “Wala man nila ginabuhat kini.”

<sup>175</sup> Kinahanglan aduna gayu’y mobuhat niini. Ang suba kinahanglan pagalabangon. Kinahanglan ang panit pagapaniton. Dili ko gustong buhaton kini. Nasayod ang Dios nga dili ko gustong buhaton kini. Daghan kanilang mga kababayan-an nagapakaon sa akong mga anak, ug ila nang igahalad kanako ang ilang kinabuhi, halos. Inyo bang nahunahuna, ug ang grasya sa Dios gibubo sa Espiritu Santo, nagadahum ba mo nga mahimo kong mohilum ug makita kanang looy’ng tawo nga mahagbong paingon ngadto sa Eternidad nga walay paglaum, kon dili ako mosinggit batok niini?

<sup>176</sup> Dili sa pagpakamaalamon; apan ang espiritu niining nasura, ang espiritu sa iglesia, dili ang Espiritu ni Cristo, karon; ang espiritu sa iglesia, sa denominasyon, maoy misalibay niining mga kababayan-an ngadto nianang kadautan dinha. Ug ako usa lamang ka tingog, nga nagasinggit, “Panggawas niini. Kalagiw gikan nianang maong kahugawan.” Ayaw tugoti ang yawa sa paghimo sa usa ka butang nga ingon niana diha kaninyo. Sayup kini!

<sup>177</sup> Ug kamong mga Assembly of God, ginatugotan silang kababayan-an, mubong pagpapatul sa ilang buhok, apan ginadid-an sila sa pagpangmek-ap. Wala gayu’y Kasulatan batok sa mek-ap, apan adunay batok sa pagpapatul sa inyong buhok. Dili man gani siya mahimong takus sa pag-ampo sa atubangan sa Dios, ang ginaingon sa Biblia. Ang iyang bana may katungod sa pagpakigbulag kaniya ug biyaan siya. Husto. Nagapaila siya sa iyang kaugalingon sa kalibutan ingon nga usa ka dili putli nga babaye. Mao ang giingon sa Biblia. Iyang ginapakaulawan ang iyang kaugalingong bana sa dihang iyang ginabuhat kini. Mao kana ang tukma gayud nga gisulti sa Biblia. Kita n’yo?

<sup>178</sup> Bueno, apan ang babaye nga nagapangmek-ap, makaplagaan nato ang usa ka babaye nga naghimo niini diha sa Biblia, usa lang. Si Jezabel kadto. Mao kana kung kinsa kadto. Ang bugtong tawo sa Biblia nga nagmek-ap, si Jezabel, ug ang Dios dayon nagpakaon kaniya ngadto sa—sa mabagsik nga mga iro. Nahimo siyang kaulawan, ug bisan ang iyang . . . Ang tanan, ang tanan nga maingong dautan gitawag nga Jezabel.

<sup>179</sup> Dili n’yo kinahanglan buhaton kana. Dili n’yo naman kinahanglan buhaton kini. Unsa may nagapahimo kaninyo nga buhaton kini kung ingon-ana? Ang espiritu sa yawa.

<sup>180</sup> Wala ninyo napamalandongan kini. Nasayod akong wala n’yo. Kamo—kamo maayo kaayong mga tawo. Kamo’y maayo. Nagapakiglamano kamo kanako, nagapakig-estorya kanako.

<sup>181</sup> Ug ako nahigugma kaninyo. Tinuod kana. Apan kung makita ko kana, dili ba mahimo akong tigpakaaron-ingnon . . . Si Pablo

miingon, “Wala ako magpanuko sa pagpahayag kaninyo sa kinatibuk-ang Katuyoan sa Dios.” Hinaut nga walay dugo sa babaye nga pagapaninglon kanako nianang Adlaw, o iya man sa lalaki. Ako nang gisulti kaninyo ang Kamatuoran. Ug wala ko gigusto ang pagbuhat niini; dili nga wala ko gigusto tungod kay dili ko buot buhaton kon unsay ginasulti sa Dios kanako nga buhaton, kondili kay gihigugma ko kamo. Dili ko gusto nga mapasakitan kamo, busa unsa may akong pagabuhaton? Apan ang putli, Langitnong Gugma maoy mopahigayon kanimo sa pagbuhat niini.

<sup>182</sup> Si Jesus gani nangamuyo man sa paglikay sa krus. “Mahimo bang ipalabay ang maong kopa sa pag-antus?” Miingon, “Apan, dili sa Akong pagbuot, sa Imo.”

<sup>183</sup> Ako ba gayud ang tawong mahimong kinahanglan mosulti niini? Ako ba gayud kinahanglan pangkasab-an silang mga bililhong kababayan-an nga mga buotan kaayo ug tanan na, ug pangkuniskunison sila? Ako ba gyud kinahanglan buhaton? Ako ba gyud kinahanglan badlongon ang akong mga igsoong ministro, ug nga motindog diha ug sultihan sila nga sila nahigugma sa kwarta ug sa—sa denominasyon labaw pa kay sa ilang gihigugma ang Dios? Ako, ngadto sa akong bililhong mga igsoon nga nagaagbay sa ilang bukton . . . Oh, kinahanglan ko ba gyud buhaton kana? O Dios, ayaw tugoting himoon ko kini.

<sup>184</sup> Apan wala ako magpanuko sa pagpahayag kaninyo sa maong tibuok Pagbulot-an. Tinuod nga Gugma ang mao’y nagpahimo niini kanako.

<sup>185</sup> Mao ba kana kon ngano nga kining Mensahe sukad ingon na niini? Wala nay niini bisan diin sa kalibutan. Asa na ba kini karon? Bueno. Sila nangahadlok. Kita n’yo? Apan kini sukad walay pagkahadlok. Mao gayud. Ang Dios kanunay ingon na niana, kita n’yo. Bueno. Mao ba kini kon nganong kining kababayan-an nabadlong gyud kaayo pinaagi niining Mensahea? Wala nasayod, nga wala kini gipadayag. Kini gipakita kanako, apan wala kini miabot kanako hangtud sa miaging adlaw lang. Kita n’yo? Tan-awa didto. Bueno. Nagatakdo gayud sa maong ministryo.

<sup>186</sup> Karon sa makadiyut lang. Diha na bay usa ka panahon nga nahimong usa ka kalibutan sa babaye kaniadto? Oo. Sumala sa kasaysayan, sa maong mga adlaw ni Elias, adunay babaye nga ginganla’g Jezabel. Ug nagkaaduna siya’y pagmando sa iglesia sa Dios, nga ang Biblia nagaingon nga iyang buhaton usab sa katapusang mga adlaw; ang iyang espiritu, pinaagi sa usa ka iglesia, usa ka organisasyon. Ug siya mahimong usa ka bigaon, ug ang tanang mga kaiglesiahanang kauban niya mamahimong mga bigaon, sama lang kaniya. Husto ba kana? [Ang kongregasyon nagaingon, “Amen.”—Ed.]

187 Ang Pinadayag 17, miingon, “Usa siya ka bigaon, ug siya ANG INAHAN SA MGA BIGAON.” Kana dili mamahimong mga lalaki. Kana’y mga babaye. Kita n’yo? Ug silang tanan gitambog, nga buhi, ngadto sa Linaw nga Kalayo, ug gilamoy. Tinuod ba kana? Tan-awa.

188 Himatikdi, sa dihang mitungha kanang Jezabel sa maong esena, may usa ka tawo nga mitungha sa pagbatok niini. Nagdala ang Dios sa usa ka tawo. Wala gani kita nakahibalo kung asa siya gikan. Wala siya’y kaagi sa ministryo. Wala gayud siya nahimong sacerdote o bisan unsa pa. Siya mitungha, nga usa ka tigulang ug kusganong taga-lasang nga ginganla’g Elias, ug iyang gipataon na ang wasay ngadto sa mga gamot sa kahoy, ug napungot sila kaniya. Dili lamang niana, apan ang iyang tibuk kongregasyon napungot kaniya.

189 Ug sa usa ka higayon nagdahum siyang siya na lang ang mibarog. Miingon Siya, “Dili, adunay pa Ko’y pito ka libo nga kauban nimo.” Kita n’yo? Kadto mao kanang piniling pundok, kita n’yo. Anaa sa kanunay kanang pundoka. Miingon, “Ayaw kahadlok, Elias. Nasayod Ako nga naghunahuna kang kamo nahurot na, tungod kay ang mga denominasyon gigukod ka didto sa ibabaw sa bungtod. Apan,” miingon, “Ako aduna pay pito ka libo nga nagatoo sa mao rang butang nga imong ginawali. Kita n’yo, anaa sila Kanako.”

190 Dayon human sa iyang adlaw, naghari ang Roma, ug kaniadto nahimong usa ka panahon nga kadto mao’y kalibutan sa babaye pag-usab, ang tanang mga urog sa—sa mga babaye, kung giunsa nga sila nanggawas nga naka-bonete ug mga butang, kita n’yo. Ug ang Dios mipatungha sa usa pa uban sa mao rang Espiritu diha kaniya, ang Espiritu ni Eliseo. Husto ba kana? Ug siya miingon, “Ang wasay gikataon na sa gamut sa kahoy.”

191 Ug dihay usa ka gamay’ng tigulang ug mapungtanon nga babaye kaniadto, nakigminyo sa iyang...gibiyaan ang iyang bana, nakigminyo sa igsoong lalaki niini, si Herodes. Si Herodias, ug siya’y usa—usa ka pinintalan nga maglilingaw niadtong adlaw, nga misayaw. Iyang gitudloan ang iyang anak kon unsaon sa pagsayaw. Siya may usa ka anak nga babaye, sa iyang ama-amahan, ang—ang ama-amahan; pinaagi sa amahan, ang igsoong lalaki niini. Si Herodias! Kadto’y anak nga dalaga sa—sa—sa maong babaye. Ug unya gitudloan niya siya sa pagsayaw, ug nahimo gayud siyang usa ka tighubohubo nga magsasayaw, sama sa iyang inahan. Ug nagdahum siya nga makaminyo pa siya sa makaupat o makalimang higayon, buhaton ang bisan unsa nga gusto niya.

192 Ug ania migawas si Herodes. Mga Judeo silang tanan, karon hinumdomi. Mga tawong iglesia sila. Ania migawas si Herodes,

ug ang iyang iglesia, aron mopatalinghug niining propetaha, ang katawhan nagtoo nga kadto maoy propeta.

<sup>193</sup> Siya milakaw deretso ngadto sa ilang mga atubangan, ug miingon, “Dili uyon sa balaod ang paghupot mo kaniya.” Ug kadto maoy nakapasilaob sa kasuko niya! Kita n’yo?

<sup>194</sup> Karon, ang kasagarang tawo tingali miingon na, “Kumosta ka, Herodias? Malipayon kaayo kaming makauban ka sa among kongregasyon karon.” Apan dili si Juan.

<sup>195</sup> Si Jesus miingon, “Kinsa bay inyong gidahum nga makita, sa dihang miadto kamo aron makita si Juan? Miadto ba mo aron makita ang usa nga binistihan ingon sa usa ka pari? Dili, niana nga, nianang matang nga nagahalok sa mga bata ug nagalubong sa mga patay.” Kita n’yo? Siya miingon, “Unsa bay inyong giadto aron makita? Usa ka hangin, usa ba ka bagakay nga gikusokuso sa bisan unsang hangin? Moingon sila, ‘Dali ngari, Juan. Bayran ka namo’g dugang kon ikaw mowali kanamo. Ug, kami, kami ang pinakadaku nga organisasyon?’” Dili si Juan. Dili, wala gayud siya miadto aron makit-an kana.

<sup>196</sup> Miingon, “Unsa bay inyong giadto nga makita, kung ingon-ana, sa dihang miadto kamo sa pagpaminaw ug sa pagtan-aw kang Juan, usa ka propeta?” Siya miingon, “Ug ako nagasulti, diha kaninyo, labaw pa sa propeta! . . . makadawat kamo niini, kini mao siya kinsa’y gisulti sa propeta nga magaabot, ‘Akong igapadala ang Akong sinugo una Kanako, ug siya magaandam sa dalan alang sa Ginoo.’” Siya mao ang sinugo sa Pagpakigsaad. Siya miingon, “Wala pay tawo, nga natawo sa usa ka babaye, nga sama ka bantugan kay kang kaniya.” Kita n’yo?

<sup>197</sup> Mao kanang matang sa tawong gipatungha sa Dios alang nianang adlaw, si Elias, usa ka tawo nga lasangnon. Si Juan, mao gihapon. Kita n’yo? Ang Espiritu ni Elias atua kang Juan. Ug Siya nagaingon, pag-abot na sa maong adlaw sa babaye na usab, kanang Espirituha motungha pag-usab, “Sa dili pa ang Pagbalik sa Ginoo, sa diha nga ang yuta pagasunogon na, ug ang matarung magalakaw ibabaw sa—sa mga abog sa dautan, maingon sa mga abog ilalum sa ilang mga lapalapa.” Iyang gisaad kini, pag-usab, niining mga panahon. Himatikdi, ang Balaang Espiritu nagsaad niana. Nagakatakdo na kini sa panahon nga atong ginapuy-an.

<sup>198</sup> Kinahanglan nga aduna gyu’y mobarog. Nga magaabot gayud, kay MAO KINI ANG GINAINGON SA GINOO, sa Malaquias sa ika-4 nga kapitulo. Mao kanay tukma gayud kon unsay Iyang giingon nga mamahimong timailhan, “sa dili pa gayud moabot ang daku ug makalilisang nga Adlaw sa Ginoo, Akong ipadala kaninyo si Elias.” Ug unsa bay iyang pagabuhaton? “Pabalikon ang mga kasingkasing sa mga anak ngadto sa Doktrina sa mga amahan, pabalikon ngadto sa Biblia,” pagawas niining mga pang-denominasyon nga paglahi-lahi, “ug

mobalik ngadto sa Biblia, balik ngadto sa Dios.” Mao kana kon unsay iyang pagabuhaton. Himatikdi kon daw sa unsa na ka mahimayaon nga panahon ang atong ginapuy-an.

<sup>199</sup> Kadtong maong mga propeta gibadlong kadtong mga modernong babaye sa ilang mga adlaw, ug pareho silang nagbayad niini sa ilang kinabuhi. Ang kasaysayan nagapamatuod nga ang matag-usa niadtong mga panahona maoy kalibutan sa mga babaye, sa diha nga ang mga babaye mao nay naghari.

<sup>200</sup> Tan-awa ang panahon karon. Magkaaduna kita’y usa, ka Presidente, usa niining mga adlaw, daw sa magakahitabo na kini sa pagkakaran. Sa tinuod, babaye na ang Presidente. Kita n’yo? Ang maong lalaki usa ra ka tawotawo. Dinhi sa dili pa lang dugay, diha sa usa sa laing mga nasud, nakaangkon ang maong babaye ug hilabihang pagdayeg ug tanan na gikan sa mga tawo, hangtud ang Presidente, mismo, miingon, “Ako ang iyang bana.” Ang Presidente sa Estados Unidos, kita n’yo. Siya nagapauso sa mga urog, ang mga kababayen-an minunot niini, kita n’yo, sama gayud sa gibuhat ni Jezabel. Inyo nang nadungog ang akong wali bahin sa *Jezabel nga Relihiyon*. Nahibalo na mo. Nasayran n’yo na ang mahitungod niini. Nakita na ba ninyo kung diin na ta karon?

<sup>201</sup> Nakita ba ninyo kung unsay nanghitabo dinhi, usa o duha na ka semana ang milabay, dinhi sa maong syudad? Ang ministro sa Faith Lutheran mingdapit sa paring Katoliko sa Sacred Heart nga moanha ug mowali alang kaniya, ug iyang gibuhat, ug ang ministro sa Faith Lutheran miadto pud ngadto sa paring Katoliko ug miwali alang kaniya.

<sup>202</sup> Ang Konseho sa mga Iglesia didto karon, nagapakigtigum sa Roma. Kining sulat nga ginasuroy nga ang akong maayong amigong, si David duPlessis; sa diha nga ako milingkod didto ug misugilon kaniya kabahin niini, sa Fourteen-Mile Creek, dili pa lang dugay; wala nahunahuna nga iyang gitugyan ang iglesia paingon mismo ngadto sa Babilonia, sa dihang ang matag-usa nagaingon, “Oh, ang tanang kaiglesiahan magakahiusa na karon.” Oo, nasayod ko niana, kita n’yo, mao gayud kon unsay tukmang nahisulat sa akong libro sa panagna sa 1933, nga manghitabo. Aba, wala ba kamo nagahunahuna nga si Satanas kanang maoy nagapanghiusa? Ang Biblia nagahisgot niana. Ug sa dili madugay, sa mubo nalang nga panahon, diha-diha nga mahimo na silang usa, nan ang pagka-interdenominasyonal human na, kita n’yo. Diha na ang inyong mahimong mao’y marka sa mapintas nga mananap, husto. Kita n’yo?

<sup>203</sup> Wala lang ako’y igong panahon sa pagpadayon niini, apan, halos kensi minutos na aron mag-alas-dose. Kita n’yo, gusto kong humanon kini, kuhaon ang punto niini. Ako lamang gilatag ang mga Kasulatan dinhi aron inyong makita ang kalagmitan

kon asa na kita, ug dayon atong humanon sa pipila na lang ka mga gutlo.

204 Karon himatikdi kon unsay nanghitabo. Ang—ang mga propeta mibadlong sa mga kababayen-an sa ilang mga adlaw ug gitawag nga “masuk-anon sa mga babaye.” Tinuod kana. Ang kasaysayan nagapamatuod nga mao kadto.

205 Karon kadali lang. Inyong ginasulat ang mga Kasulatan, angay’ng isulat ninyo ang Unang Timoteo 5:6. Ang Biblia miingon, “Ang babaye nga nagakinabuhi sa—sa kalibutanong kalipayan.” Dili mamahimong mga kalipayan nga iya sa Dios; busa nga kadto mao gyud, kita n’yo. “Ang babaye nga nagakinabuhi sa kalibutanong kalipayan patay na samtang buhi pa siya.” Mao kana’y gisulti sa propeta, ni San Pablo, “Ang babaye nga nagakinabuhi niining maong kalibutanong kahimtang patay na samtang buhi pa siya.” Ug kon isalikway niya ang kalooy, mahimong tabukon niya ang maong linyang utlanan diin wala nay lugar alang pa kaniya. Ug unya asa na siya, uban sa iyang pinintalan nga mga mata, sa iyang pinutlan nga buhok? Ug siya’y atua na tabok sa linya, nga wala nay paagi nga makabalik pa, ug kinahanglan adunay buluhaton nga mowali kaniya. Apan hinumdomi, nianang higayona, tapus na kini tanan. Human na. Usa na lamang kini ka pagduaw.

206 Magkaadunay ministryo nga magapakita ug dagkung mga katingalahan, mao’y giingon ni Joel, apan wala nay panahon alang sa katubsanan. Tapus na kini. Ang Cordero human nang gikuha ang Iyang Basahon, ug ang Iyang tinubos human na. Maingon sa unang pagwali ni Jesus ug gisalikway, ug unya miadto ug giduaw kadtong mga atua didto, miwali kanila nga atua sa bilanggoan, nga dili na makahinulsol pa, wala nay higayon alang sa kaluwasan, kanang mao gihapong ministryo kinahanglan nga buhaton pag-usab. Unsa kaha kon mao na kana ang Ikatulong Pagbira, ngadto sa mga Dayong nangalaglag na. Unsa kaha kon kini mao na? Nagalaum ako nga kini dili pa. Unsa kaha kon mao na kini? Pamalandunga kini sa makadili karon. Unsa kaha kon mao na? Dili unta itugot sa Dios. May mga bata pa ako. Kita n’yo? Apan siguradong kon tan-awon mao na gyud kini karon.

207 Nganong miabot man kining panan-awona sa batan-on pa ako? Nganong wala ko man gyud nahunahunaan kini kaniadto? Nganong kanang panan-awon miabot man kanako didto sa lawak sa miaging adlaw, nagaingon, “Mao na kini”? Sa taliwala mismo sa dili- . . .sa—sa mga kalag nga nangalaglag na. Ug si Jesus miwali ngadto kanila, misaksi, apan sila—sila wala gyud naghinulsol. Ug sa dugang ko pa nga pagwali, nagkadautan pa sila ug samot. Walay paghinulsol. Wala nay bahin alang niini.

208 Ang Cordero mikuha sa Iyang Basahon sa diha nga, ang Ikapitong Selyo andam nang pagabuksan, ang Ika-unom nga



Selyo. Hinumdomi, Iyang gililong kanato ang Ikapitong Selyo. Dili Niya himoon kini. Sa dihang nagatindog ang Manulonda, sa adlaw-adlaw, nagapahayag niini, apan unya dili Niya buhaton kini diha nianang usa. Miingon, “Adunay kahilum sa Langit.” Walay usa nga nasayod. Kini mao ang Pag-anhi sa Ginoo.

“Oh,” moingon ka, “dili mahimo kini.” Nagalaum ako nga dili unta.

<sup>209</sup> Padayonon lang nato ug diyutay pa sa unahan dinhi. Aduna ako nga gisulat dinhi, kita n’yo. Bueno.

<sup>210</sup> Hinumdomi, “Ang babaye nga nagkinabuhi sa kalibutanong kalipayan,” sa mga butang nga iya sa kalibutan, nagalihok nga sama niini. Makaadto siya sa simbahan ug molihok nga sama sa usa ka balaan, wala kana’y kalabutan bahin niini, kita n’yo, kondili, “siya patay na samtang buhi pa siya.”

<sup>211</sup> Tan-awa kon unsa ang gibuhay sa denominasyon diha sa babaye. Ila siyang gihimo ug usa ka tigdalang sa Balaang Pulong, nga supak sa Biblia. Ila siyang gihimo nga usa ka magwawali. Gidili kini sa Kasulatan. Gihimo na gani siya karon nga magmamando, mayor, mga gobernador, tanan na dinhi sa nasud, ug usa ka ministro diha sa balay sa Dios.

<sup>212</sup> Sa dihang, ang babaye mao’y sad-an sa matag nangahimong sala, siya ang hinungdan niini. Sakto. Karon, wala ako, wala ako nagahisgot bahin sa mga katungod. Siya ang sad-an. Siya mao ang hinungdan sa matag bata nga matawo nga buta. Siya ang hinungdan sa matag lubnganan nga pagakaluton. Siya mao ang hinungdan sa sala, sa balatian, sa kagul-anan. Ang ambulansya dili mahimong muugong hangtud adunay babaye nga maoy nahimong hinungdan niini. Walay krimen nga mahimong mahitabo, walay sala, walay kamatayon, walay kagul-anan, walay pag-antus, kondili ang babaye maoy nakapaingon niini. Ug ang Dios nagadili gayud kaniya sa pag-adto sa pulpito aron mowali, apan sa gihapon ila kining ginabuhay. Ang denominasyon, nakita n’yo ba kon asa na kini?

<sup>213</sup> Siya’y diosa na. Daw sa unsa ang yawa nagapanglihok! Aba, ang mga tawong Katoliko ginahimo silang, mga babaye, mga dios, moampo ngadto kanila; tinuod kana, diosang Maria, ug uban pa. Ako nang nakita diin ang Konsehang Ekumenikal miingon silang mamahitabo nga sila magaampo pa’g diyutay kang Jesus kon kini makatabang man sa pagpasulod sa mga Protestante. Kita n’yo? Kita n’yo? Oh, kanang sinapawan ug kamay! “walay kausaban,” ingon pa nila. Kita n’yo? Mao ra kini gihapong yawaa sa una. Ang Biblia miingon, “Ug gipahigayon niyang mamarkahan ang tanan diha sa ilang mga agtang, kinsang mga ngalan wala nahisulat sa Basahon sa Kinabuhi sa Cordero.”

<sup>214</sup> Ang predestinadong Iglesia ang maoy akong ginasultihan, dili ngadto kadtong didto sa gawas. Dili, sir. Gikan sa matag

grupo, Iyang gibira ang Iyang mga gipili nang daan. Mao kana kon unsay Iyang ginaanhian, sa matag kapanahonan.

215 Apan didto ang babaye nagabarog. Atua siya. Siya kana; nagawali sa Pulong, nagadala sa Pulong, nahimo'g diosa, ug ang hinungdan sa matag sala. Ang Biblia miingon, “Dili ako motugot nga ang babaye magpanudlo, o moilog sa bisan unsang katungod, kondili magmasinugtanon sumala sa giingon sa—sa kasugoan.” Kita n'yo? Ug dili niya mahimong buhaton kini. Apan gihimo nila siyang magmamando sa kayutaan, mayor, gobernador; sa dili madugay mamahimo na siyang Presidente. Sigurado. Tan-awa. Mao kana ang palakaw, mao kana ang paingnan niini, kita n'yo. Ug ginabuhat kana sa mga tawo tungod kay wala sila magtagad bahin niining Pulong. Dili gayud nila makita kini.

216 Tan-awa kadtong mga Judeo nga nagabarog kaniadto, mga iskolar, mga maayo kaayong mga tawo. Ug si Jesus miingon, “Kamo gikan sa inyong amahan, nga mao ang yawa.”

217 Unsa kaha kung gidala ko Siya karon ngadto sa usa ka pagbista sa inyong atubangan? Ato lang sulayan kini sa makadiyut, ug pasayloon ako sa Dios sa pagdapig batok Kaniya; apan sa kadali lang, aron ipakita kaninyo ang usa ka butang.

218 Unsa kaha kon ingnon mo, “Bueno, ako, kahimayaan ngadto sa Dios, nagsulti ako'g mga dila! Aleluya! Ako nasayod. Ako, Oo, ako—ako anaa na Niini. Dalaygon ang Dios. Oo!” Uh-huh, mao ba?

219 Hinumdomi silang mga katawhan sa Israel. Ang Biblia miingon, human nga gitawag Niya ang maong katawhan pagawas, ug giluwag sila pagawas sa Egipto, Iya silang gipanglaglag tungod kay wala sila misunod sa Mensahe. Kita n'yo? Nanagpangaon sila sa mga manna gikan sa Langit. Nagpangaon sila sa manna nga gipaulan sa Dios ibabaw sa yuta aron ilang kaonon, ug mibarog diha sa atubangan sa maong mensahero, ug nakita ang Haligi nga Kalayo, ug nadungog ang Tingog sa Dios, ug nakita kining gipamatud-an na. Ug unya, tungod kay sila gusto nga motoo kang Korah, “May mga balaan pang mga tawo. May ingon *niini*, *niana*, o *uban pa*. Kami kinahanglan mga balaan, usab. Kinahanglan atong tanan buhaton *kini*. Ang tibuok katawhan balaan man.”

Ang Dios miingon, “Ibulag ang imong kaugalingon gikan kanila. Pahilayo gikan dinha.”

220 Si Moises miingon, “Ang tanan nga dapig sa Ginoo, duol kanako.” Husto kana. Kita n'yo? Ug Iyang gipabuka ang yuta ug gilamoy sila. Kita n'yo?

221 Sila mga maayong tawo, usab. Sigurado, mao sila. Maayo kaayo silang mga tawo. Oo, sir, apan wala kini magpulos. “Dili ang tanan nga nagaingon, ‘Ginoo, Ginoo,’ apan ang mao lang nga nagabuhat sa kabubut-on sa Akong Amahan.” “Dili

siya nga nagasugod; kondili siya nga nagatapos.” Nga, walay pagpanglaktod; dili ka madawat sa katapusan sa lumba. Walay pagpanglaktod. Kinahanglan agihan mo ang maong dalan nga gikaingon sa Kasulatan.

<sup>222</sup> Kon Kini nagaingon, “Paghinulsol, ug magpabautismo sa Ngalan ni Jesus Cristo, ug madawat ninyo ang gasa nga Espiritu Santo,” walay pagpanglaktod, sa paglamano sa kamot, sa pagpa-apil sa iglesia o sa denominasyon. Moagi ka nianang Dalana! Gawas kon ikaw mamatay sa imong kaugalingon, ug magpakatawo sa Espiritu sa Dios, ikaw—ikaw—ikaw malaglag. Mao kana. Walay pagpanglaktod.

<sup>223</sup> Moingon ka, “Bueno, sakup man ako sa iglesia.” Nahibalo ako. Maayo kana. “Bueno, ang akong inahan. . .” Wala ko magduhaduha niana, apan ikaw kini ang akong ginasultihan. Kita n’yo? Kinahanglan kang moagi nianang Dalana, tungod kay walay laktoran; dili ka madawat didto sa Hukmanan. Moagi ka sa maong usa ka Dalan.

<sup>224</sup> Aduna lama’y usa ka Dalan, ug si Cristo kana nga Dalan. Ug si Cristo mao ang Pulong nga nagapuyo diha sa sulod ninyo, nga nagapanghimatuod sa tanang butang nga Iyang gisaad diha sa maong panahon. Kita n’yo? Inyo bang nakuha kana? [Ang kongregasyon nagaingon, “Amen.”—Ed.] Sige. Himatikdi karon.

<sup>225</sup> Ang uban nagaingon, “Kining mga tawhana maayo man.” Tinuod. Wala ko nagaingon nga sila dili maayo nga mga tawo. Wala ako nagaingon nga si Santa Cecilia ug tanan sila dili maayong mga babaye; mao man sab ang akong inahan, apan ako wala gayud nagaampo ngadto kaniya. Mao gayud. Mao gyud, daghan na ko’y nakita nga maayo kaayong mga tawo, apan dili sila mga dios-dios. Sila maoy mga babaye, mga lalaki. “Aduna lama’y usa ka Tigpataliwala sa Dios ug sa tawo.”

<sup>226</sup> Unya ngano, ngano nga ang usa ka tawo, usa ka Pentekostal, tawo sa kalibutan. . . kadtong sulat-pasuroy nga si Igsoong duPlessis, ang atong bililhong igsoon, gikinahanglan niyang ipasuroy. Tingali ang uban kaninyo nakadawat niini. Mipahiluna. . . Oo, nakadawat mo niini. Sa maong Konsehong Ekumenikal, sa kiliran sa maong papa, ug miingon, “Espirituhanon kaayo kadto.” Mao kanay pag-ila sa espiritu, dili ba? “Oh, ang Espiritu sa Ginoo anaa diha, espirituhanon kaayo.” Oo. Tan-awa.

<sup>227</sup> Ngano man? Tungod kay usa kini ka kahigayonan nga mahiusa ang mga Protestante ug niana, nga atong gipakigbatokan sa daghang mga katuigan, ug nga gibarogan sa Biblia ug gisultihan kita nga magaabot kana. Ug ang atong. . . usa sa atong pinakadaku nga mga lider miuyon dayon, miingon, “Husto kana. Mao kana’y atong ginahimo,” ug ang tibuok Protestanteng kaiglesihan nagakadani niini.

228 Ug tukma gayud, kung inyong tan-awon didto, MAO KINI ANG GINAINGON SA GINOO. Una, ang Pulong miingon niini. Dayon ang Espiritu sa Ginoo miingon, niadtong 1933, nga misugilon sa tanan niining uban pang mga butang bahin sa mga nasud nga nagapakiggubat, ug kon unsa ang mahimong mga makinarya, ug tanan na nga sama niana, miingon sa tukma gayud kon unsay magahitabo sa katapusan. Ug ania na kini karon. Wala gayud kini mipakyas. Ug karon atong makita kini nga nagakahan-ay na.

229 Inyo bang nahinumdoman ang akong wali nga *Jezebel nga Relihiyon* dili pa lang dugay? Nahinumdoman ba n'yo si Eliseo nga miadto niadtong buntaga, aron sultihan sila? Nga, miwali ako bahin niana. Kita n'yo? Ug kon giunsa nga gitagna ko dayon nga moabot ang panahon sa diha nga kining Konsehong Ekumenikal sa katapusan mamahimong marka sa mapintas nga mananap, tungod kay kini mohiusa sa mapintas nga mananap. Ginahimo na kini niini. Sa akong panahon, naabtan ko pa kini. Ug dinhi ang mga Protestante, sa minilyon, nangakabig niini. Ngano man? Mao man kana ang ilang ginapangita.

230 Mga buta sila! Gisultihan ni Jesus kadtong mga Fariseo, “Kamong buta nga mga mag-aagak sa buta. Kon ang buta mao'y mag-agak sa buta,” Siya miingon, “dili ba sila mangahulog sa gahong?” Ug mao kana'y diin sila nangahulog. Unsaon ko man paghimong toohan kanang tawhana nga mibarog uban kanako ug nakighinabi kanako, makahimo sa paglingkod ug mopahayag sa ingon niana! Kita n'yo, “Gitago kini, sa mga mata, gikan sa makinaadmanon ug sa masinabuton, ug gipadayag Kini ngadto sa mga bata nga buot makakat-on.”

231 Nahibalo ako nga sa pipila ka adlaw mamahimong kabayaran kini sa akong kinabuhi. Husto kana. Mahitabo kini, apan dinhi ang Kamatuoran napaila na. Uh-huh.

Ang unang mamatay niining plano sa Espiritu Santo,

Mao si Juan Bautista, apan siya wala molikay; maisugon siyang namatay; Dayon miabot si Ginoong Jesus, ila Siyang gilansang,

Miwali Siya nga ang Espiritu moluwas sa tawo gikan sa sala. (Husto ba kana?)

Dayon ilang gibato si Esteban, nagwali siya batok sa sala,

Napasuko niya sila ug maayo, ilang gibato siya sa ulo;

Apan namatay siya diha sa Espiritu, nabugtoan siya ug ginhawa,

Ug mipanaw tipon sa maong uban pa, kadtong tighatag sa kinabuhi.

Aduna si Pedro ug Pablo, ug si Juan nga balaan,  
 Gipangtugyan ang ilang mga kinabuhi aron madayag ang Maayong Balita;  
 (Unsay ilang gibuhat?) Ilang gisagol ang ilang dugo, Sa kanhing mga propeta,  
 Aron ang matuod nga Pulong sa Dios sa lunsay masugilon.

Mga kalag ilalum sa halaran, nagatuaw, “Unsa pa ka dugay?”  
 Sa Ginoo nga silotan ang tanang nagbuhat sa kasaypanan;  
 Apan adunay dugang pang mohatag sa ilang dugo sa kinabuhi (oo, husto kana)  
 Alang niining Ebanghelyo sa Balaang Espiritu ug sa mapula kaayong baha niini.

<sup>232</sup> Padayon pa gyud ang pagbaha sa dugo! Oo, mahitabo kini sa pipila ka adlaw, apan ako nagapaabot nianang taknaa sa dihang moundang na kini.

<sup>233</sup> Adunay igsoong babaye nga bag-o lang may usa ka damgo. Iyang gipadala kini kanako, miingon, “Ako silang nakita, ang maong iglesia nag-andam na sa pagpatay” kanako, sa hilum, sa usa ka higayon sa dihang pagawas ako sa akong sakyanan, sa pagsulod, pagaposilon gikan sa . . . Apan miingon, “Dayon ang Espiritu miingon, ‘Dili pa niining orasa, apan kini moabot sa dili madugay.’” Uh-huh.

<sup>234</sup> Dili hinaut itugot sa Dios nga maga-uyon-uyon ako diha sa bisan unsang butang. Wala koy lain pang pagpakahibalo gawas kang Jesus Cristo ug Kaniya ingon nga linansang sa krus. Kita nagakinabuhi sa usa ka makuyaw nga panahon. Ang sala maoy nakapaingon niini. Oo. Ilang—ilang gibato si Esteban. Ilang gipaputol ang ulo ni Juan, ang maong babaye mao’y naghimo. Wala ako kahibalo kon unsaon natong igatugyan ang ato, apan mahitabo kini sa umalabot nga adlaw. Bueno, Himatikdi.

<sup>235</sup> Sa San Juan, kon gusto n’yo ug Kasulatan mahitungod niana. San Juan 6:49, maoy diin sila nangaon ug manna, ug miingon si Jesus, “Ug sila, ang matag-usa, nangamatay.”

<sup>236</sup> Moingon, “Bueno, ang akong—akong igsoon, ako—akong nakita kining maong babaye nga misayaw diha sa Espiritu.” Oh, Oo. Uh-huh. “Ako silang nakita nga nagahimo niana. Ako siyang nakita nga nagasulti ug mga dila. Ako siyang nakita . . .” Oo.

<sup>237</sup> Si Jesus miingon, “Daghan unya ang magaduol Kanako nianang adlaw, ug moingon, ‘Ako nang gibuhat ang tanan niining mga butanga.’” Kita n’yo? “Sila’y nagpangaon ug manna sa kamingawan,” si Jesus miingon, “ug sila, ang matag-usa, nangahimulag sa Walay Katapusan. Mga patay na sila.” Kanang

nangawala na sa Walay Katapusan. Nangalaglag na sila mismo didto sa kamingawan.

<sup>238</sup> Inyong nahinumdoman ang sa Mga Hebreohanon sa Ika-6 nga kapitulo, “Kadtong sa makausa gipahibalo na sa Kamatuoran, ug misalikway sa paglakaw Niini, wala nay kapasayloan alang kanila.” Kita n’yo, hangtud sa utlanan lang nga magtoto- . . . Sa diha nga ang Kamatuoran napahayag na ngadto sa usa ka tawo sa katapusang higayon, ug ilang ginasalikway ang pagdawat Niini; sumala sa Basahon sa Mga Hebreohanon, kita n’yo, sila’y . . . wala na gayu’y bisan unsang butang sa kalibutan ang makaluwas pa kanila.

<sup>239</sup> Wala na sila. Wala nay kapasayloan, wala nay katubsanan, wala na gayu’y nahabilin pa alang kanila. Nahimulag na sila sa Walay Katapusan. Mao ang giingon sa Biblia, “Nagapaabot alang sa makalilisang nga kalayo ug sa kapungot nga maoy magaut-ut sa kaaway.” Ug sa diha nga ang Kamatuoran sa Maayong Balita napamatud-an na, gipanghimatud-an na sa hingpit, ug unya moliso ug talikuran Kini, sila’y wala na. Mao lang kana. Makalilisang, apan kinahanglan kong isulti kini.

<sup>240</sup> Hinumdomi ang maong mga Manulonda nga wala managpabilin sa ilang unang nahimutangan, kondili nanagpamiya hinuon niini ngadto nianang balay bilanggoan sa kangitngit, diin ang kalibutan karon nagalakaw sa mao rang bilanggoan, wala nay kapasayloan.

<sup>241</sup> Hinumdomi sa milabay nga pipila ka katuigan, giingon ko, sa paggikan ko sa Chicago, “Dawatn ba kaha Kini sa Amerika karong tuiga, o dili na gyud siya makadawat niini.” Nakita ba ninyo kung asa na siya napaingon? Oo.

<sup>242</sup> Wala ako karon masayod kung mao na ba kini ang Ikatulong Pagbira? O Dios, hinaut unta nga kini halayo pa niana! Alang na ba niana ang Ikatulong Pagbira? Mao na ba kaha kana? O, sus! Hunahuna-a kini, mga higala. Hunahuna-a kini; dili ko gusto.

<sup>243</sup> Si Jesus miingon, “Kining matang sa pagpakaaron-ingnon . . .” Kon gusto ninyong isulat kana, sa Mateo 23, siyete. Ako—akong nasulat dinhi, “basaha kana,” apan makita ninyo. “Kamong buta nga mga Fariseo!” tugoting . . .

<sup>244</sup> Aduna ba mo’y laing pipila ka gutlo pa? [Ang kongregasyon nagaingon, “Amen.”—Ed.] Atong tan-awon. Mopakli lang ta niana, kay akong giingon “basaha kini.” Adunay butang dinha nga gusto ko basahon sa dili pa gayud . . . Karon ako tingaling laktawan ang ubang bahin, apan tugoti—tugoting makuha lang nato kini sa makadiyut lamang. Sa Mateo 23, kadali lang, sige, ug sugdan nato sa Ika-27 nga bersikulo. Karon patalinghugi lang. Basaha ninyo ang maong tibuok butang pag-uli n’yo na, kon gusto ninyo. Dugang gamay na lang ka mga minuto.

245 Karon tan-awa dinhi. Mateo 23, ug sugod sa Ika-27 nga bersikulo, “Alaut kamo, mga escriba!” Karon, hinumdomi, kini maoy mga balaang tawo ang Iyang ginasultihan.

*Alaut kamo, mga escriba ug kamong mga Fariseo, mga tigpakaaron-ingnon! kay sama kamo sa pinaputi nga mga pantiyon (mga patay nga mga tawo kana, kita n'yo), pinaputi nga mga pantiyon, nga sa gawas managpakita sa katahum, apan sa sulod napuno sa mga bukog sa mga patay, ug sa tanang kahugawan.*

246 Mga pagpakaaron-ingnon ug mga kasina ug mga panag-away, diha sa sulod nila; diha sa gawas naman, “Ako mao si Doktor Niini-ug-niana.”

*Sa ingon usab niini sa gawas ninyo kamo nagapakita nga daw matarung sa atubangan sa mga tawo, (tan-awa ang maong Konsehong Ekumenikal ug ang mga Pentekostal nga nagapanglingkod didto), apan sa sulod kamo'y natugob sa kamaut ug sa kadautan.*

247 Unsa ba ang kadautan? Usa ka butang nga sa tinuod nahibaloan na nimo nga husto ug dili nimo kini buhaton. Si Jesus, karon bantayi unsay Iyang . . . kon unsang kaliwatana ang Iyang gipahinungdan niini karon.

*Alaut kamo, mga escriba ug mga Fariseo, mga tigpakaaron-ingnon! Kay ginabuhatan ninyog mga pantiyon ang mga propeta, ug inyong gidayandayanan ang mga bungdo sa mga matarung, kita n'yo, “Oh, ang mga propeta!”*

*Ug magkanayon, 'kon nakaabot pa kami niadtong mga adlaw sa among mga ginikanan, dili gayud kami moapil uban kanila sa pag-ula sa dugo sa mga propeta.*

248 “Mitoo gayud kami unta sa Pulong sa Ginoo kung buhi lang kami unta kaniadto.” Himatikdi.

*Sa ingon niini nagapamatuod kamo batok sa iyong kaugalingon, nga kamo mga anak diay niadtong mga nanagpatay sa mga propeta.*

*Sige pun-a pa gayud ninyo ang taksanan sa inyong mga ginikanan.*

249 Mao gayud kana ang nagapanghitabo. Karon tan-awa unsay Iyang ginaingon dinhi.

*Kamong mga halas, ug kaliwat sa mga bitin, unsaon ugod ninyo paghilingkawas gikan sa pagkahinukman ngadto sa inferno?*

250 Unsaon man ninyo paghimo niini? Karon Siya nagasulti ngadto sa mga ministro, tan-awa, tinuod kana, balaang mga tawo. Unsaon ninyo pagkahimong motindog ug nakahibalo na nga ang Biblia nagatagna ug ginasultihan na silang mga tawo

nga dili buhaton kana, ug kamo makahimong motindog ug makig-uyon-uyon tungod sa pipila ka walay-pulos, maangso nga mga dolyares, tungod sa popularidad, ug nga aron adunay tawong mopikpik diha sa inyong likod ug tawgon kamong usa ka “Doktor”? Unsaon man ninyo pag-ingon nga inyong ginahigugma ang mga tawo?

Ako nagawali diha sa mga teyp, usab. Kita n’yo?

<sup>251</sup> Unsaon man ninyo, unsaon man ninyo pag-ingon nga inyong gihigugma kanang mga tawhana, ug tugotan n’yong mahitabo ang butang nga ingon niana? Kita n’yo? Kamo—kamong mga Fariseo, kamong buta, kamong mga halas, kamong mga kaliwat sa mga bitin, unsaon man ninyo sa paghilingkawas sa pagkahinukman ngadto sa infierno? Sa dihang kamo. . . Unsaon man karon sa usa ka tawo, nga nasayod na nga kining mga butanga sayup, ug motindug didto aron dumalahaon ang iyang kongregasyon, aron padakuon ang iyang denominasyon, ug gipakyas ang pagsulti sa mga kababayen-an ug mga kalalaken-an? Unsaon man ninyo sa paghilingkawas sa kapungot sa infierno, sa dihang kini gihimo alang kaninyo? Unsaon man ninyo sa paghimo niini? Kita n’yo?

<sup>252</sup> Paminaw, paminawa dinhi. Kung unsay madangtan niini? “Busa. . .” sa Ika-34 nga bersikulo.

. . . *tan-awa, padad-an Ko kamog mga propeta, . . .*

<sup>253</sup> “Ako magapa,” sa umaabot. Anaa na ang inyong mga Fariseo nga nagabalik pag-usab. Kita n’yo?

. . . *mga tawong maalamon, . . . mga escriba: ug ang uban kanila inyong pagapatyon ug igalansang sa krus; ug ang uban inyong pamunalan sulod sa inyong mga sinagoga, ug pagalutoson sila gikan sa usa ka lungsod ngadto sa usa:*

<sup>254</sup> Iya nang gisulti daan nga magapadala siya’g mga propeta, nga adunay Pulong sa Ginoo. Ug unsa bay ilang buhaton? Ang mao rang butanga nga gibuhat sa ilang mga ginikanan, kay mao kana kung unsa kamo. Kita n’yo, ang mga espiritu dili nagakamatay. Ang mga tawo nga ilang ginapuy-an mao ang nagakamatay, apan ang mga espiritu dili nagakamatay. Ang Iyang giingon, “Kamo ang mga anak. Mao kamo.” Ug tan-awa lang kung unsa kining mga butanga.

<sup>255</sup> Kon giunsa nga si San Pablo mibarog didto (nagatoo ba kamo nga usa siya ka propeta?) ug gibadlong ang kababayen-an, sa pagpapatol sa ilang buhok; gipangsayaw ang ilang mga organisasyon; gimantala nga ang matag tawo nga wala pa mabautismohi sa Ngalan ni Jesus Cristo kinahanglan moduol ug magpabautismo pag-usab. Husto kana.

<sup>256</sup> Ug sa karon sila nakig-uyon-uyon ug gipatam-is pa kini. Wala sila’y kalainan, bisan pa. Makalooloy. Kon ang panahon



mahaman na, mahimo kong isulti kini, kita n'yo: mga buta sila, gikatakda nang daan nga mangabuta. Kaloy-an pa unta sa Dios. Dili nila mahimong makita kini.

<sup>257</sup> Si Jesus miingon, “Mga buta kamo. Kamong buta nga mga escriba ug mga Fariseo, kamong mga maut! Nga unta nagabasa man kamo sa mao rang Pulong nga gibasa nilang tanan, ug ania kamong nagaanhi ug ginahukman Ako. Ug Ako ang tukma gayud kung unsay giingon sa Pulong nga motungha niining adlaw. Ako mao ang gikatakda nga Mensahero niining adlaw. Ako ang Mesias,” Iyang giingon, sa ingon kadaghang mga pulong. “Ako mao ang Mesias. Napakyas ba Ako sa pagpamatuod niini? Kon wala ko nabuhat ang kon unsay nasulat na bahin Kanako, nan hukman n'yo Ako. Ug kamong buta nga mga Fariseo ginapangunahan ang inyong mga tawo palayo ngadto usa ka butang nga sama niana, ug dalhon ang tibuk panon.” Miingon, “Buena, ang buta nga nagaguyod sa buta.” Miingon, “Kamo’y . . .”

<sup>258</sup> Miingon kamo, “Oh, kon buhi lang kami niadtong panahon ni San Pablo, oo, midapig gyud unta ako ni San Pablo.”

<sup>259</sup> Kamong mga tigpakaaron-ingnon! Kita n'yo? Nganong wala man lagi kamo nagadapig sa iyang Doktrina? Inyo nang gibuhang ang samang butang kaniadto sama sa gibuhang ninyo karon, kay kamo man ang mga anak sa inyong mga ginikanan, ang inyong mga pang-organisasyon nga ginikanan: ang mga Fariseo, mga Saduceo, ug nagapakamatarung. Mao—mao kana. Uh-huh. Sultihan ko kamo, ug—ug sa maong oras nga atong ginapuy-an, ambot lang kon mao na ba kaha kini ang Ikatulong Pagbira? Kadali nalang karon, tan-awa, si Jesus miingon, “Kining maong matang magahiagum sa labi pa ka mabug-at nga hukom sa silot.” Kita n'yo? Dili ba kini makalilisang?

<sup>260</sup> Ingon nga usa ka bantugan nga Amerikano, usa ka higayon, sa diha nga ang kaaway hapit na ilogon kining nasura, adunay tawo sa panahon sa tungang gabii, milukso ibabaw sa kabayo ug gipadagan sa dalan, nagasinggit, “Ang kaaway paanhi na!” Kadto mao si Paul Revere.

<sup>261</sup> Ako usa ka Amerikano, usab. Ug ako nagapangabayo, niining orasa sa tungang gabii, dili nga nagaingon nga ang kaaway paanhi na, kondili ania na siya dinhi! Dili nga siya paanhi pa; siya ania na dinhi! Human na niya gibuntog. Ginakulbaan ako nga kini human na; nagapangbuntog, niining orasa sa tungang gabii.

<sup>262</sup> Hinumdomi, sa Tucson, ang pito ka mga Manulonda, unsang Mensahea kadto, “Ang paghuman sa tinago sa Dios.” Wala midugay human niana, sa paglugsong sa mga kabukiran . . .

<sup>263</sup> Inyo nang nadungog ang mahitungod sa maong mga bukid. Himatikdi. Nakuhaan ni Igsoong Fred ug pipila ka mga litrato kini, ug ni Igsoong Tom. Ug nagkaaduna ako’y pipila sa maong

mga litrato, pipila sa maong mga talan-awon, tanan na. Atong ipakita kini dinhi sa umalabot nga adlaw, ipakita lang kaninyo kon asa dapit. Nasayod na kamong tanan sa maong hitabo.

264 Matikdi, ang maong tulo ka taluktok. Miingon Siya, “Kana’y imong Una, Ikaduha, ug Ikatulo.

265 Ug si Igsoong Fred adunay maayo kaayong litrato niini, sa dihang milabay siya ug si Igsoong Martha. Ang mga panganud misulbong na gikan sa gabon sa yuta, ug mitabon sa uban pa kanila, ug ginapakita lang gayud niini ang maong Tulo ka mga Pagbira; ang usa *dinhi*, usa *diri*, ug ang usa *didto*. Kita n’yo? Ang maong pito!

266 Matikdi, ang Una, ang tulo. Ang tulo kahingpitan. Mao kana’y kon kanus-a misugod ang ministerio.

267 Ang Ikaduhang Pagbira mao ang pag-ila sa mga espiritu, ang pagpanagna. (Una mao ang pagpang-ayo sa masakiton.) Ang Ikaduha mao ang pagpanagna nga mitungha, ug naila niini ang mga sekreto sa mga hunahuna, sa diha nga ang Pulong Mismo nahipadayag na. Nga, kana ang grasya.

268 Apan, hinumdomi, ang ikapito maoy katapusan. Mao na ba kaha kini ang katapusang Pagbira, human na ba ang tanan? Kini na ba kaha? Hunahunaa kini karon. Hunahunaa lang. Asa na ba mo? Kita n’yo? Ang pito kanunay ang katapusan. Tulo ka mga Pagbira!

269 Ang ministeryo ni Jesus milangkub sa Tulo ka mga Pagbira. Nasayod ba mo niana? Himatikdi! Ug magmatinud-anon, kung ikaw man nagmatinud-anon gayud sa imong kinabuhi, alang karon sa usa ka minuto, sa pipila ka mga minuto.

270 Ang Iyang Unang Pagbira mao ang pagpang-ayo sa masakiton. Nahimo Siyang iladong tawo. Mitoo ang tanan Kaniya, sa ingon. Husto ba kana? Sa dihang miabot Siya sa pagpang-ayo sa mga sakit, ang tanan gusto Kaniya diha sa ilang iglesia.

271 Apan usa ka adlaw Siya’y miliso ug misugod sa pagpangpropesiya, kay Siya mao’y Pulong, ug Siya ang maong Propeta nga gihisgotan ni Moises. Ug sa dihang gipangsultihan na Niya sila, ug gisultihan sila kung unsa ang ilang pagkinabuhi, ug ang mga butang nga ilang ginapangbuhat, nahimo Siyang wala kahimut-i. Mao kadto ang Iyang Ikaduhang Pagbira.

272 Nagahunahuna ko kon wala ba kaha kini natipo pag-usab? Hunahunaa sa kadali lang. Mao ba kaha? Ang Una, pagpanambal, sa matag-usa. Ang Ikaduha: “O, mahimo nga kini Jesus Only. Mahimo nga kini si Beelzebub, Mahimo kini nga usa ka . . .” Mao ra kana gihapon ang ilang gibuhad kaniadto. Kita n’yo? Mao ra nga mga espiritu nga nagapuyo diha sa mao ra nga matang nga mga tawo, hinukman na nga mga tawong dili na

gayud maluwas pa, tungod kay sila hinukman na kaniadto pa; sila, sama kang Judas Iscariote, natawo nga anak sa kalaglagan.

Moingon mo, “Si Judas?” Tinuod.

<sup>273</sup> Hinumdomi, relihiyoso siya kaayo, apan dili siya makalahutay sa kinatibuk-an sa Mensahe. Mahimo niyang dawaton ang bahin niini, apan ang tanang uban pa niini dili niya matulon. Madawat nila ang mga pagpanambal ug mga butang nga ingon niana, apan pag bahin na gani sa pagpatungha sa Dios sa mga squirrel pinaagi sa pagsulti, nan halalum na kana kaayo alang kanila. “Dili mahimong mahitabo!” Mao kadto si Judas. Ang iyang espiritu mamahimong buhi hangtud nianang puntoha. Dili na siya makapadayon human dinha. Kita n’yo?

<sup>274</sup> Dawat nila kaayo si Moises sa dihang iyang gipabuka ang Dagat nga Mapula, ug uban pa nga ingon niana. Apan sa pag-abot na sa pagpanghisgot, ayaw na nila, nga ang tanang uban pa kanila dili angay’ng mohimo *niini* o *niana*, o ang *uban pa*: “Gihimo niya ang iyang kaugalingon nga Dios, ibabaw kanato.” Kita n’yo, dili sila makaabot dinha, si Korah ug sila. Busa, kinahanglan magkaaduna sila’y usa ka organisasyon, busa gilamoy na lang silang tanan sa Dios.

<sup>275</sup> Ang ministeryo ni Jesus, sa dihang nagapang-ayo Siya sa masakiton, “Siya’y dalayegon, kanang batan-ong Propeta sa Galilea! Aba, ginahimo Niyang makakita ang mga buta. Gibanhaw pa gani Niya ang mga patay. Aduna kita’y tulo ka mga panghitabo niini. Gibanhaw gayud Niya ang patay.”

<sup>276</sup> Apan usa niana ka adlaw miliso Siya, miingon Siya, “Kamong mga kaliwat sa bitin. Ginahimo n’yong mahinlo ang gawas sa bandihado. Nagapakita kamo nga daw balaan, apan sa sulod ninyo, walay lain kondili kamo’y pundok sa mga bitin.” Oh, sa dihang migawas na kanang maong pagpangpropesiya, ginaway kadtong organisasyon, nausab kini dayon. Sila’y nahimo nang kabatok Kaniya. Tinuod kana. Ug sa katapusan, sa pagsalikway Kaniya, ila Siyang gilansang.

<sup>277</sup> Apan dili mo mapatay ang Ministeryo. Nagapadayon nga buhi kini. Mahimo mong patulogon ang mensahero, apan dili nimo mahimo sa Mensahe. Uh-huh. Husto. Nagapadayon Siyang buhi. Ug himatikdi sa dihang miabot na ang Ikatulong Pagbira sa Iyang ministeryo. Ang Una mao ang Pagpanambal sa masakiton.

<sup>278</sup> Ang Ikaduha mao ang pagpamadlong sa mga organisasyon, ug pagpropesiya; kung unsa may ilang nabuhat, kung unsa sila, ug kung unsay moabot. Kung unsa ang karon, kung unsay karon, ang magakahitabo; ug unsay kanhi, unsay karon, ug unsay magaabot. Mao kana kung unsay Iyang gibuhat. Husto ba kana? [Ang kongregasyon nagaingon, “Amen.”—Ed.]

<sup>279</sup> Apan ang Iyang Ikatulong Pagbira maoy sa diha na nga Siya miwali ngadto sa nangalaglag na nga dili na gayud maluwas pa.

Atua sila didto diin kadtong dagkung, pinintalan nga mga mata atua, “Ooh, ooh!” Miwali ngadto sa mga kalag sa inferno, nga wala ningdawat sa kalooy, apan nahimulag sa Walay Katapusan gikan sa Presensya sa Dios. Apan sa gihapon ilang kinahanglan mailhan kini, kung unsa Siya, tungod kay gipaadto Siya sa Dios didto.

280 Ginahunahuna ko kung ang Iya bang ministeryo midangat na sa mao gihapong paagi sa katapusang mga adlaw, maingon kaniadto? “Maingon nga gipadala Ako sa Amahan, mao man usab igapadala Ko kamo. Ang mga buhat nga Akong ginabuhaton inyo man usab pagabuhaton.”

281 Ang nangalaglag na, dili na gayud mangaluwas pa. Ila nang gisalikway ang kalooy. Mao kadto’y Iyang Ikatulong Pagbira.

282 Karon aduna bay bisan unsang pangutana? Ang Iyang Unang Pagbira, nang-ayo Siya sa masakiton. Husto ba kana? [Ang kongregasyon nagaingon “Amen.”—Ed.] Ang Iyang Ikaduhang Ministeryo, Siya nagapropesiya. Ang Iyang Ikatulong Ministeryo mao ang pagwali ngadto sa mga nangalaglag na sa Walay Katapusan. Ang maong tulo ka mga bukid, ug uban pa; ang mga nangalaglag na, sa Walay Katapusan!

283 Ang ministeryo ni Noe, ang tanang mga ministeryo, naghimo sa mao gihapon. Nagwali si Noe. Ensakto gyud kana. Misulod siya sa maong arka. Ug sa dihang nakasulod na siya sa arka, adunay pito ka adlaw nga walay bisan unsang nahitabo. Ang Iyang pagpamatuod nagwali ngadto sa mga hinukman na.

284 Ang Sodoma ug Gomora! Si Jesus nagapahinungod nianang duha ingon nga pag-anhi. “Sa dili pa moabot ang Anak sa Tawo, mahisama kini sa mga adlaw ni Noe, mao man usab sa mga adlaw sa Sodoma.” Mipahinungod Siya ngadto kang Noe.

285 Si Noe adunay Tulo ka mga Pagbira, ug ang iyang Ikatulo maoy ngadto sa nangalaglag na human nga gisira na ang pultahan. Kay, gitugot sa Dios nga maingon-ani kaniadto, diin nga wala nay usa nga makasulod o mogawas. Anaa na sila sa sulod. Kay, (sama diha sa ikapitong bukid) ang maong pinakataas nga bukid, diha kon diin Niya gipahiluna ang arka, sa bukid. Kita n’yo? Husto kana?

286 Sa mga adlaw sa Sodoma, ang Unang Pagbira mao si Lot nga matarung. Ug ang Biblia miingon, “Ang mga sala sa Sodoma maoy nagsakit sa iyang matarung nga kalag matag adlaw,” kung giunsa sa kadtong mga kababayen-an paglihok ug pagpamuhat.

287 Hinumdomi n’yo, “Maingon sa mga adlaw ni Noe.” Unsa may ilang ginabuhaton kaniadto? “Nanagpangaon, nanagpang-inum, nanagpangasawa, nanagminyoanay.” Ang mga babaye, kita n’yo, ang mga babaye. Unsa man ang kaniadto sa mga adlaw sa—sa Sodoma? Ang mga babaye.

288 Ug ang Unang mensahe mao si Lot. Gikataw-an nila siya pag-ayo.

289 Dayon nagpadala pa sila ug uban pang mga mensahero, duha sila, ug miadto sila didto. Mao kadto ang Iyang Ikaduhang Pagbira alang kang Lot . . . alang sa Sodoma.

290 Apan tan-awa kadtong Usa nga miadto sa kaulahian, adunay dugang ug dugang pang kalooy. Human na kining tanan niadtong tungora, tapus na niadtong panahona. Kadtong ikatulong Mensahero nga mipaingon didto, ang maong Ikatulong Pagbira, unsa man Siya? Unsang matanga sa ministryo ang atua Kaniya? Milingkod Siya uban sa mga pinili, ug gisultihan sila sa kung unsa ang nagakahitabo sa luyo Niya. Husto ba kana? Apan sa dihang Siya milakaw paingon ngadto sa Babilonia, o ngadto sa Sodoma, gusto Niyang makita . . .

291 Bisan gani si Abraham, nagapangaliyupo, “Kon makakaplag ba ako’g kalim-an ka mga matarung?” Hangtud paubos ngadto sa “napulo ba ka matarung?”

Ang Dios miingon, “Oo, pagpangita ug napulo ka mga matarung.”

292 Tugoti kong isulti kanimo ang usa ka butang, igsoong babaye, sa kadali lang. mamahimong makinaraan ang imong urog, apan aduna kay butang nga wala sa niining mga rayna sa kaulag. Aduna kay butang nga dili gayud niya mahimong maangkon. Husto. Mamahimong makinaraang urog ang imong pagpanuot, manuot ingon sa usa ka babaye. Tingali moingon sila, “Tan-awa kanang makinaraang holy-roller.” Ayaw’g kabalaka. Aduna siya’y butang nga kanang gamay’ng babayeng rayna sa kaulag, nga ang paglantaw sa tibuk kalibutan diha kaniya, wala siya nakaangkon niini. Dili gayud siya makaangkon niini. Siya’y nalaglag na, sa Walay Katapusan. Siya hinukman na. Kita n’yo? Dili na gayud siya . . . Aduna kay pamatasan; aduna kay kaligdong. Sa iyaha walay bisan unsa. Aduna siya’y paon nga nagalit-ag sa mga nangawalang kalag ngadto sa inferno. Ang buta nagalakaw paingon niini. Karon, aduna kay butang nga naangkon.

293 Kabalo ka, wala ka tingali gani diha sa listahan sa iglesia, apan ang imong matarung nga kinabuhi tingali maoy nagapugong sa kapungot sa Dios sa kalibutan karon. Ang kalibutan dili motoo niini. Ikaw’ng babaye nga gitawag holy-roller, ikaw nga gamay’ng lalaking wala gyu’y hibangkaagan ug bisan unsa, apan ikaw nagapangaliyupo ngadto sa Dios, sa adlaw ug gabii, alang sa mga sala sa maong nasud, ikaw tingali ang usa nga nagapugong sa maong kapungot. “Kon makakaplag Ako’g napulo, pasayloon Ko kini. Kung makakaplag Ako ug napulo!” “Maingon sa mga adlaw sa Sodoma, mao usab ang mahitabo niini.” Nakita n’yo kung unsa ang gusto kong ipasabot?

294 Dili nga, “Kon Ako makakaplag ug napulo ka mga Metodista, kon makakaplag Ako ug napulo ka mga Baptist, kon makakaplag Ako ug napulo ka mga Pentecostal, kon makakaplag Ako ug napulo ka mga magdudula, kon makakaplag Ako ug napulo ka mga senador, kon makakaplag Ako ug napulo ka mga ministro.”

295 Kondili, “Kon Ako makakaplag ug napulo ka mga matarung!” Adunay Usa ka matarung, kana mao si Cristo. Si Cristo nga nagapuyo sa maong Usa, kanila nga napulo, kita n’yo, “Pagalugwayan Ko kini.”

296 Apan kanang katapusang Mensahero miwali ngadto sa mga hinukman na. Moingon ka. . . Miadto Siya didto. Ang Kasulatan wala nagahisgot sa kon unsay nahitabo, apan ang kalayo mibundak na lang pagkasunod buntag, husto, human sa Iyang pagbuhat niadtong mga timailhan, sa gilayon nga human Niyang gibuhat ang Iyang ministryo sa pagpropesiya. “Nganong mikatawa man si Sarah?”

    Miingon siya, “Wala man ako mikatawa.”

    Miingon, “Oo, mikatawa ka.” Kita n’yo?

297 Karon, dihadiha human niana, misulod Siya sa Babilonia, o miadto sa Sodoma. Wala gayud Siya’y nakaplagan diha kanila, busa mibundak ang kalayo. Iyang nakaplagan si Lot ug ang iyang duha ka mga anak nga babaye, miingon, “Panggawas kamo dinhi karon dayon.” Kita n’yo? Nanggawas kini. Miadto Siya didto. Hinumdomi, paingon na Siya didto. Nagpadala Siya ug mga mensahero una Kaniya, apan miadto Siya Mismo didto, husto, aron hibaloon kon kini tanan mao ba gayud. Ug Iyang nakaplagan kini nga puno sa unsa? Mga babayeng pinintalan ang nawong. Ang Mensahe alang ngadto sa mga hinukman na. Unsa bay ilang gibuhat? Gikataw-an kini.

298 Unsa bay ilang ginabuhat karon? Mao ra gihapong butang. “Sakup ako sa Assemblies. Sakup ako sa Oneness. Ako—ako. . . Nagsayaw ako diha sa Espiritu. Himaya sa Dios, nagasulti ako diha sa. . .” Sige, padayon ka. “Maputlan ko ang akong buhok sa gusto nako. Pagabuhaton ko *kini*. Ako—akong isulti lang *kini*. Dili ko kinahanglan magpabautismo sa Ngalan ni Jesus. Ako—ako dili nagatagad kung unsa may giingon. Si Pablo usa ka tiguwang na nga masuk-anon sa mga babaye, bisan unsa pa. Kana’y usa ka. . .” Sige, padayon ka.

299 Usa niining mga adlawa, kon wala pa nimo, pagatabukon mo gayud kanang utlanan. Dili mo na gayud tinguhaon pa ang pagbuhat sa kon unsay husto. Nadunggan ba ninyo kung unsay akong giingon? Butang nga mahinungdanon kini. Igsoong lalaki, igsoong babaye, napamalandongan ba ninyo kung unsay giingon? Pagatabukon mo kanang utlanan, ug dili mo na gayud buot pang buhaton kini. Mapatalinghugan mo sa gihapon ang maong Maayong Balita, sigurado, apan dili mo na gayud

Kini dawaton pa. Dili mo na gayud mahimong dawaton pa Kini. Apan ang maong Maayong Balita igawali ngadto sa mga hinukman na, kadtong mga nangalaglag na sa Walay Katapusan, dili na mahimong maluwas pa, dili na gayud. Anaa ka na nianang puntoha, ug wala nasayod niini. Nagahunahuna kang nagakinabuhi ka sa kalipayan, ug patay na samtang ikaw buhi pa.

<sup>300</sup> Oh, paminaw. Kadtong tanan nga nagsalikway sa Mensahe sa maong panahon, sa dili pa ang kaalautan, ang Maayong Balita gikawali sa mga hinukman na, una, sa wala pa sila miadto; nga wala na sa kalooy. Si Noe, nga gisirhan na, maoy usa ka pagpamatuod. Gisira sa Dios ang maong pultahan, human sa iyang Ikatulong Pagbira. Human sa Ikatulong Pagbira diha sa Sodoma, ang mga pultahan gisirhan na. Wala na gayuy kalooy. Ang napulo dili na mahimong makita pa. Ug nawali na ang Maayong Balita sa mga nangalaglag na, nga dili na mangaluwas pa, tungod kay kadto gayuy. . . Ingon niana na sa matag kapanahonan, ang kada kapanahonan ginasalikway ang Mensahe sa dili pa ang paghukom.

<sup>301</sup> Gibuhat ba nila kini pag-usab? Mao ba kana ang ginapakita sa usa ka Haligi nga Kalayo sa dapit dinhi nga suba? Mao ba kanay ginapakita uban sa Mensahe ang pagbadlong sa kababayan-an, ug sa pagtambog sa mga pwesto kon diin kini angay mapahimutang, ug nga ginabadlong kadtong mga ministro nga nagadapig sa denominasyon imbis nga magpabilin diha sa Pulong sa Dios? Sa dihang, ang Dios hingpit gayud nga gipanghimatud-an nga kini mao Siya, ug dili nga usa ka kabus ignoranteng walay kasayuran ingon sa usa ka tawo. Dios Kini! Ug nakaabot na ba kaha kita karon sa punto nga ang Ikatulong Pagbira mobalik na pag-usab ngadto sa mga nangalaglag na, sa Walay Katapusan?

<sup>302</sup> Mao na ba kaha kana ang diha sa panan-awon nga gihatag kanako, ingon nga usa ka gamay'ng batan-on pa kaniadto? Ug nahiadto ako sa Kasadpan, ug didto ang bulawang Krus sa Maayong Balita nga nagasidlak paubos, gipahayag ang timailhan gikan sa Langit, sa tukma gayud. Hinumdomi, ang Krus anaa sa usa ka talan-awong maanindot, sama sa usa—sama sa usa ka piramide, usab, nga nahitukod na. Kita n'yo? Mamahimo ba kini nga mao na ang bahin nga ulo diin kini nagtapus, ug misugod gikan *dinhi* ug misaka ngadto sa pagkaulo?

<sup>303</sup> Sama sa piramide, pasaka agi kang Luther, Wesley, Pentecostes, ug dayon ang pagtaklob sa pangulong bato. Mao na ba kaha kini? Kon mao na kini, asa na man kita dapit? Kini, kini mahimong mao na. Nagalaum ako nga dili pa kini unta, apan mahitabo kini gayud. Mahitabo gyud kini. Hinumdomi lang, silang mga ministryo gikinahanglan, kanunay silang

nagakadugtong sa gihapon, sa usa'g usa. Kinahanglan kini magaabot. Ug ang Dios dili nagausb. Hunahuna-a kini!

<sup>304</sup> Paaka ang inyong konsensiya pinaagi sa inyong espirituhanong mga ngipon, ug hibaloa kon asa na kita. Unsa kaha kon kini mao na karon, ug ikaw ingon niana lang gihapon? Nan maayo pay molakaw ka na . . . Tapus ka na, sila nga atua sa gawas. Human nga ang maong Basahon gikuha na sa Cordero, ang Ika-unom nga Selyo nahipadayag na ug ang tanang mga Selyo, nahuman na. Mamahimo. Nagalaum ako nga unta dili. Mamahimo kini. Bueno.

Karon, mao ba kana kon ngano nga kining Ikatulong Pagbira nagdugay pag-ayo?

<sup>305</sup> Inyong mamatikdan, ang Unang Pagbira ug ang Ikaduhang Pagbira nagsunod gikan sa usa ngadto sa usa. Akong gitagna, nahinumduman n'yo, sa dihang akong unang gisugdan, ang mahitungod sa maong Una. Ug miingon ako, "Moabot ang panahon nga mahibaloan pa Niini gani bisan ang sekreto sa mga kasingkasing." Nakahinumdum ba kamo? Pila ba? Aba, nahinumduman pa ninyo tanan kadto, sa akong mga panagtigum kung asa man. Ug usa ka gabii miadto ako sa Regina, sa ibabaw didto, ug mianha sa intablado; ug atua si Igsoong Baxter didto, pipila ka libo ka mga tawo. Ug misaka ang usa ka tawo sa intablado, [Si Igsoong Branham nagapapiti sa iyang tudlo sa makausa—Ed.] ug mao na kadto. Ug sukad niadto kini mao na.

<sup>306</sup> Apan dugay nang mga katuigan sukad miundang ako sa natad, upat, mga lima na ka tuig sukad sa akong pag-undang. Unsa man kini? Unsa may hinungdan niini? Mao na ba kana kon nganong sama kini sa sinugdanan, sa Genesis, "Ang maong pagpailub sa Dios"?

<sup>307</sup> Hinumdomi, sa dihang gibuhat Niya ang kalibutan, sa ikapitong adlaw wala Siya'y gibuhat bisan unsa. Mipahulay Siya. Kita n'yo? Ang Dios sa kaniadto mapailubon nianang Ikaunom ka tuig, wala gibuo nga adunay bisan usa nga malaglag, kondili nga ang tanan makakab-ot sa paghinulsol. Ang Dios mapailubon.

<sup>308</sup> Mao pud, usab, diha sa Genesis 15:16, kon gusto ninyong isulat kini, sa 16, 15. Iyang giingnan si Abraham, "Didto sa yuta sa mga Amorehanon, sa ilang kadautan," sa pagkakaran sila'y mga Gentil. "Dili Ko pa mahimong dalhon kamo didto sa pagkakaran, kay ang pagkadautan sa mga Amorehanon, sa mga Gentil, wala pa mapuno hangtud karon. Apan pagahukman Ko sila. Ako silang duawon sa nianang ikaupat nga kaliwatan, ug dayon Akong pagahukman kanang nasura pinaagi sa ulisi nga puthaw." Husto kana?

<sup>309</sup> Kini ba nagdugay na gyud, nga ang maong pagpailub sa Dios, ang ministryo nga walay puas, pinaagi sa teyp ug tanang uban pa, milukop na sa tibuok kalibutan, aron tan-awon kung



anaa pa bay usa? Apan mahimo nga kanang kaulahi-ang usa misulod na bag-ohay pa. Sa kadautan ba niini nga dugay—dugay na kaayo? Kon si Jesus mao ra sa gihapon, nga mao Siya, sa Mga Hebreohanon 13:8, ang Iyang Mensahe kinahanglan mao ra gihapon. (Pahuman na.) Ang Iyang pamuhat kinahanglan mao ra gihapon.

310 Kon ang Una ug ang Ikaduhang Pagbira dili kaduhaduhaan! Aduna bay pagduhaduha diha sa inyong hunahuna bahin sa Una ug Ikaduhang Pagbira? Nahitabo ba kini sama sa Iyang giingon? [Ang kongregasyon nagaingon “Amen.”—Ed.] Nan nganong pagduhaduhaan man ang Ikatulo? Kita n’yo? Nganong pagduhaduhaan pa man ninyo Kini? Ang unang duha giila pinaagi sa Kasulatan. Akong gipamatud-an kaninyo ning buntaga nga ang Ikatulo giila pinaagi sa Kasulatan, usab.

311 Tan-awa ang kalibutan, tan-awa kon diin na siya. Tan-awa kon giunsa nila pagsalikway sa Kamatuoran, ug kon giunsa kini giila sa husto, ang bahing pagpropesiya. Karon asa na ba kita? O Dios, hinaut kaloy-i! Nagapasubo kini sa akong kasingkasing sa kinasuloran. Unsaon na kini? Asa na ba kita?

312 Hinumdomi, kining pito ka mga taluktok didto, makatug-an sila kaninyo. Kini’y . . . Wala nay usa pa ka taluktok lampas niana. Atua kini sa Continental Divide. Paingon na kini mismo ngadto sa disyerto, sugod gikan didto. Ang pagka Walay Katapusan nagasulod na. Pito ka mga taluktok, didto mismo sa Continental Divide. Sa taliwala kana mismo sa husto ug sayup. Ug sa tumoy niana, ang Ikatulong Pagbira mao ang katapusang Pagbira diha sa han-ay. Husto ba kana? Kita n’yo? Bueno.

313 Si Noe misulod, unya human sa pito ka adlaw, walay bisan unsang nahitabo, kita n’yo. Sa pito ka adlaw ang paghukom miabot. Kon lamang. . . Paminawa karon, Sa pagtapos. Kon lamang, sa panahon ni Noe, nailhan lang unta nila kadtong maong timailhan! Kon nailhan lang unta nila! Karon tapuson ko na. Kon nailhan lang unta nila kadtong maong timailhan, ang kalibutan niadtong adlaw! Nga, ang Dios nagpamatuod dinhi, pinaagi sa pagbasa sa Kasulatan, dili pa lang dugay, Iyang gilaglag silang mga katawhan.

314 Dili nga walay kalooy; ang kalooy gipadala ngadto kanila pinaagi sa usa ka propeta. Dili sila motoo niini. Ang Dios maloloy-on, apan, nagpadala Siya ug kalooy apan dili nila dawaton kini. Kanunay Siyang nagapadala ug kalooy, una.

315 Unsa kaha kon ilang nailhan nga kadtong ilhanan maoy timailhan sa katapusang panahon? Ug sa dihang nakita nila, dihadhiha, ang kaluwasan mihunong na. Wala nay usa, kita n’yo. Mao gyud, nahibaloan mo na lang, sirado na ang pultahan. Kon sila. . . Aduna lamay usa ka tawo nga nakaila niadtong timailhan, kadto mao si Noe ug ang iyang pundok. Mao lang kadto ang nakaila. Sa dihang ang pultahan parehong nagsira,

nahibalo na niini si Noe. Nasayod si Noe nga kadto mao na ang pagtapos. Nasayod siya niini. Husto kana. Kon nailhan pa lamang ninyo unta ang timailhan!

<sup>316</sup> Oh, kon nasayod pa lamang unta sila niadtong timailhan, sa dihang ilang nakita kining Usa nga miabot didto, nga atua na didto pa kauban si Abraham!

<sup>317</sup> Kon nasayod pa lamang sila niana nga ang modernong Billy Graham nianang adlaw, miadto didto, siya ug ang usa ka Oral Roberts, ug miwali nianang mensahe ngadto kanilang mga gibutahan nga mga tawo! Kon nasayod lang unta sila, silang mga karaan nang mga matarung nga mga Metodista ug mga Baptist kaniadto pa maoy ilhanan na ngadto kanila nianang adlaw, si Lot, sa diha nga ang mga sala nakapasakit sa ila mismong kalag. Unya unsa ang nadangtan sa mga Metodista ug mga Baptist? Sama sa gibuhay ni Lot, mao ra gyung butanga. Apan ang matarung, gikan didto, migawas. Sigurado.

<sup>318</sup> Unsa kaha kaniadto kon si Billy Graham miadto didto, miadto alang sa mga pagdesisyon, nanggi-usap-usap sa chewing gum, nagasinumbagay sa usa'g-usa, ug nagakataw-anay, mugbo ug mga buhok, gipintalang mga nawong, ug wala bisan nala'g diyutay'ng paglihok kabahin niini. Mibalik pagkasunod adlaw, ug miingon si Billy, "Aduna ako'y katlo-an ka libo; pagbalik human sa usa ka tuig, ug wala na gani ko'y bisan nalang katlo-an kabuok."

<sup>319</sup> "Oh, nakadesisyon na ako. Ako—ako—ako dili na moadto sa inferno; paadto na ako sa Langit, tan-awa," nga padayon gihapnon nagaubog sa sala. Kon nasayod lang unta sila . . .

<sup>320</sup> Ug dayon ang maong Maayong Balita gikawali diha sa Gahum, ug mga ilhanan ug mga kahibulongan, uban sa Haligi nga Kalayo ibabaw niini, ug tanan nga nagapadayon sa tukma gayud, ug gisulti nang daan ug nahan-ay na. Kon anaa sila'y usa ka . . . Sila miingon, "Usa ka pundok sa mga holy-roller. Kini'y pagbasa sa hunahuna. Usa ka matang sa espiritistang-abat. Usa ka yawa, mao kanang tanan mahitungod Niini. Ayaw gyud pagtoo Niini. Wala kini sa atong organisasyon. Wala kita'y bisan unsang kalambigitan bahin Niana." Kon nasayod lang unta sila sa maong ilhanan! Kon nasayod pa lamang unta sila!

<sup>321</sup> Si Jesus nag-ingon, miingon, "Kon nasayod pa lang unta kamo sa inyong adlaw, Jerusalem. Kon nailhan lang unta ninyo! Apan," miingon, "karon bahala na kamo sa inyong kaugalingon." Kita n'yo? "Kon nasayod pa lang unta kamo. O Jerusalem, Jerusalem, sa makadaghang gipangandoy Ko untang tigumon kamo, maingon sa usa ka himungaan nga ginalumluman ang iyang piso, gikan sa mga paghukom nga moabot gayud! Apan wala ninyo naila ang inyong adlaw." "Kamo nga nanagbato sa mga propeta, ug nanagpatay sa matarung, kon inyo pa lang nasayran ang inyong adlaw! Kon inyo pa lang nasayran, ug

nanagpahisayod diha sa inyong Kasulatan, ug nasayod nga ang Akong pag-anhi maoy usa ka timailhan sa inyong katapusan. Karon kamo'y buta. Karon nabadlong na kamo. Ang Inyong panahon human na." Ug mao gayud. Tinuod kana. "Kon nasayod pa lang unta kamo sa maong panahon!"

<sup>322</sup> Tan-awa, sa dihang gihimo ni Jesus kanang pamahayag, nagpadayon sa gihapon ang kalibutan. Kita n'yo? Ang kalibutan nagpadayon sa gihapon, sa naandan niini. Ngano man? Tungod kay wala sila nahibalo sa ilang takna.

<sup>323</sup> Ang kalibutan nagpadayon sa gihapon, sa dihang si Noe misulod na sa arka. Nagpadayon gihapon sa paglihok ang kalibutan. Ang mga mabiyaybiayon, niadtong adlaw, aduna sila gihapon ug mga sex-party. Sila sa gihapon nanagpangaon, nanagpang-inum, nagpangminyo-ay, gihimo ang mga butang nga ginahimo nila karon. Ang katukma gayud, sa naandan. "Ha-ha! Kanang tigulang nga holy-roller gisirhan na ang pultahan. Karon, nakadungog na ba mo ug ingon nianang butang? Ha-ha! Nahibalo ba mo kon unsa ang iyang ginaingon? Kitang tanan 'mangalumoso kuno.' Binuang! Asa na man ang tubig?"

<sup>324</sup> Mga mabugalbugalon, sa mga adlaw ni Noe. "Mao man usab niini sa pag-anhi sa Anak sa Tawo." Bueno. Si Noe nahibalo sa timailhan. Mao gihapon sa mga adlaw ni Lot. Mao gihapon sa mga adlaw ni Jesus. Mao pud kini sa pagkakaran. Nanangbiaybiay sa ilang katapusang higayon. . . ? . . .

<sup>325</sup> Mao gihapon sa Sodoma, wala gyud nila naila. Sa dihang nagatindog kanang Mensahero didto, ang Mensahero gikan sa Dios, ila lamang gikataw-an kadto ug naninguha tuison kadto ngadto sa ilang kaugalingong mga buhat. Husto ba kana? "Ari mo ug tipon kanamo. Pagpakighiusa kanamo." Husto ba kana? "Ari mo ug tipon kanamo, pagpakighiusa kanamo. Mamahimo kamong usa sa maong mga kalalaken-an. Sige na, pag-tipon kanamo." Kita n'yo? Wala gyud sila nahibalo sa ilang timailhan.

<sup>326</sup> Wala sila nahibalo nga sa diha kanang Mensahero nagapadayon, nga ang pinaka. . . Dili sila makakita niini, nga ang kalayo ug kapungot sa paghukom, ingon nga ang Dios, nagasilaub nga azufreng gidagkutan sa kalangitan. Dili nila makita kini. Makita sa Mensahero. Uh-huh. Si Lot nahibalo niini, usab. Nahibalo siya nga atua kini didto. Sigurado.

<sup>327</sup> Mao gihapon sa karong panahon, mao rang butang. Ang kapungot gidagkutan na, ang bomba-atomica nahiandam na, anaa na ang tanan sa katapusan. Mao sa gihapon kini karon.

<sup>328</sup> Tan-awa, katawhan, paminawa. Nahibalo ba mo. . . Miingon kamo, "Igsoong Branham, oh, unsaon na man kini tanan?" Nahibalo mo, ang mga tawo makapadayon sa pagwali sa Maayong Balita sama sa kanunay nilang gihimo, kanang ilang gitawag nga Maayong Balita, mahimong human na kini. Gihimo

nila sa mga adlaw ni Noe. Gihimo nila sa mga adlaw ni Lot. Gihimo nila sa mga adlaw ni Jesus. Husto kana?

<sup>329</sup> Bisan pa ang mga Judeo, human nga gisulitihan sila ni Jesus nga ang kapungot . . .”Kamo’y tapus na. Kamo’y human na. Wala na. Kamo’y human na.”

<sup>330</sup> “Oh,” siya miingon, “kanang holy-roller. Unsa mang tulonghaan siya gikan? Asa man na siya gikan, niana?”

<sup>331</sup> Hinumdomi, andam na Siya kaniadto alang sa Iyang Ikatulong Pagbira. Uh-huh. Husto kana. Miingon Siya, “Sa makadaghan Kong gipangandoy nga tigumon kamo unta!”

<sup>332</sup> Gihimo ni Lot ang iyang katapusang pagtawag. . . o, pasabot ko diay, gihimo sa Manulonda, ang mensahero, kinsa man kadto Siya. Ang Dios nga girepresentar alang niining adlaw, ang Dios nga girepresentar diha sa tawhanong lawas, ang mihimo sa katapusang ilhanan, gituman ang katapusang katungdanan. Tapos na kining tanan nianang tungora.

<sup>333</sup> Giwali ni Noe ang katapusan niyang wali; ang pultahan misira sa likod niya. Mao na tanan kadto. Gikataw-an nila kini, ug gibiyabiayan kini.

<sup>334</sup> Pamalandunga, ang mga tawo makapadayon mismo sa pagwali! Ang Konsehong Ekumenikal mahimong makighiusa sa Katoliko, maingon sa ilang gisaad nga buhaton. Ang tanang organisasyon mahimong moapil, apan ang marka sa mapintas nga mananap anaa na dinha. Ila nang ginabatonan kini, pinaagi niana. Kita n’yo? Ug sila moingon, “Oh, Aleluya, dalaygon ang Dios, adunay daghang nangaluwas kagabii.” Nangaluwas ba gyud sila? “Nanggisayaw sila diha sa Espiritu. Ningsulti sila sa mga dila.” Wala kana nagapasabot sa kon unsa man. Kita n’yo? “Oh, maaghop sila ug maayohon ug mapaubsanon. Oo, sir. Aduna sila’y bunga sa Espiritu.” Dili kana’y timailhan. Wala bisa’g gamay.

<sup>335</sup> Tugoti nga ihatag ko kaninyo ang bunga sa Espiritu, tali kang Jesus ug sa mga Fariseo, tan-awa kung kinsa ang adunay bunga sa Espiritu. Unsa kaha kon ako mitindog, sama sa gisugdan ko nang isulti sa milabay’ng gutlo, batok kang Cristo karon sa makadiyut lamang? Pasayloon ako sa Dios bisan sa paglitok niini, kita n’yo, apan aron lang sa pagpakita kaninyo sa usa ka butang.

<sup>336</sup> Unsa kaha kon ako moanha kaninyo ug mosulti, “Pananglitan, kamong kongregasyon, kinsa may inyong amigo? Kinsa man ang nagapakita ug bunga sa Espiritu? Ang inyong buutang tigulang nga pari.” Kinsa man ang nagabisita kaninyo sa hospital sa dihang kamo nagmasakiton? Ang inyong maayohon’g tigulang nga pari. Husto kana. Kinsa man ang kanunay’ng nagapahulam kaninyo sa kwarta sa dihang ginaatubang n’yo na kini, diha sa usa ka mapit-os nga kahimtang? Kamong mga sakup sa iyang kongregasyon,

wala ba kamo nagaadto sa inyong buutang tigulang nga pari ug iya kamong ginapahulam sa kwarta? Kita n'yo? Kinsa man ang kanunay'ng mahigugmaon ug maloloy-on, ug nagapakita sa bunga sa Espiritu? Ang Inyong buutang tigulang nga pari.”

337 “Kinsa man kanang nagtuon sa mga katuigan ug mga katuigan, sa maong mga sinagoga dinhi, diin ang iyang kaapo-  
apo-  
apo-  
apo-  
apohan nagagikan, tanan na sila? Kinsa man kining nagtuon ug nakaangkon. . . naninguha ug ayo ug nakakab-ot sa titulo sa pagkadoktor ug PhD's ug LLD's, aron sa pagpakahibalo niining Pulong, ug nagabarug dinhi ug ginahatud kini kaninyo matag Dominggo sa buntag sa iyang kongregasyon? Ang inyong buutang tigulang nga pari.”

338 “Kinsa ba kining masinupakon, nga ginganla'g ‘Jesus’? Unsa bang tulungahaana Siya nagagikan? Unsa bang tulungahaana ang Iyang gigikanan? Asa man ang Iyang fellowship card? Unsa man nga organisasyon Siya nahisakup?”

339 “Unsa may iyang ginabuhat sa diha nga kamong tanan may panaglalis sa pamilya? Kinsa man ang nagaanha kaninyo? Ang inyong buutang tigulang nga pari, aron paninguhaon sa pag. . . Ug aduna kamo'y panaglalis batok niining silingan dinhi, ug ang inyong maloloy-on nga tigulang pari moanha ug husayon kamo. Miingon, ‘Mga anak kamo tanan sa Dios. Dili ninyo angay buhaton kana.’ Mao kana kon unsa'y iyang” . . .

340 “Unsa bay ginabuhat niining Jesus nga Nazareton? Ginabungkag ang maong mga butang. Unsa bay Iyang ginabuhat? Ginapang-ataki ang inyong organisasyon. Unsa bay Iyang ginabuhat? Gitawag ang inyong pari nga usa ka ‘buta nga mag-aagak sa buta.’ Gitawag Niya siya nga usa ka ‘bitin sa kasagbotan.’ Iyang gikuha ang halad nga gi-ordena sa Dios, ug gipangsipang ang mga lamesa, ug gipanglabay ang mga kwarta, ug gitutokan sila nga may kasuko. Nakakita na ba gyud mo sa inyong pari nga ingon niana?” Karon asa ba ang bunga sa Espiritu? Uh-huh. Uh-huh.

341 Dili pinaagi sa pagsulti ug mga dila. Dili pinaagi sa pagsayaw sa Espiritu. Dili pinaagi sa pagpasakup sa iglesia. Dili pinaagi sa bunga sa Espiritu; mahimo ang bisan kinsa sa inyo pildihon sa Christian Science niana, kita n'yo, ug ipanghimakak pa gani nga si Jesus Cristo Dios. Dili sa ingon niana.

342 Apan kini Pulong, nga buhi! Mao kana. Kon ila lamang nakita, Siya mao ang Mesias. Siya mao ang buhing Pulong, nga napadayag.

343 Ug ang tawo nga adunay Espiritu sa Dios kaniya, o babaye man, nagakinabuhi nianang Pulong, nagapuyo mismo diha kanila. Kana ang ginapitik sa kasingkasing, sa predestinado, kay ang Pulong sa Ginoo nagaabot kanila, ug sila ang Pulong ngadto sa mga tawo. “Mga gisulat nga sulat nga ginabasa sa tanang

mga tawo.” Husto ba kana? Mahimo bang nagakahitabo na ang Ikatulong Pagbira?

<sup>344</sup> Mga tawo sa teyp, mao kana kamo nga nagapaminaw niining teyp, hinaut ko untang makakita kamo niining maong kongregasyon niining higayona. Uh-huh. Nagalaum akong mao sa gihapon ang inyong pagbati.

<sup>345</sup> Unsa kaha kon mao na kini? Tan-awa ang mga Kasulatan nga naglut-od dinhi. Mao na ba kaha kini? Ang Ikatulo bang Pagbira mao ang pagwali ngadto sa mga hinukman na sa Walay Katapusan nga misalikway sa maong Mensahe sa kaluwasan?

<sup>346</sup> “Bueno,” moingon ka, “ang iglesia padayon man nga . . .” Oo, padayon lage sila. Mopadayon man sila, sa gihapon.

<sup>347</sup> Apan, hinumdomi, sa ingon niining panahona, si Noe anaa na sa sulod sa arka. Ang Pangasaw-onon naselyohan na diha kang Cristo, ang katapusang kabahin natubos na. Ang Ikaunom nga Selyo natuman na sa iyang kaugalingon niini mismo. Ang Ikapitong Selyo nagadala Kaniya pabalik sa yuta. Ang Cordero miduol ug gikuha ang maong Basahon gikan sa tuong kamot Kaniya, ug milingkod ug giangkong kon unsa ang Iyang gipanagiya, kon unsa ang Iyang gitubos na. Husto kana? Ingon na niana sukad pa ang Ikatulong Pagbira.

<sup>348</sup> Ang tulo maoy kahingpitan. Ang ministeryo nagaabot ngadto sa kahingpitan sa diha nga kini gipamunga pag-usab si Cristo diha sa natural, taliwala sa mga katawhan, sumala sa gisulti nang daan, “Maingon kaniadto sa mga adlaw ni Lot.”

<sup>349</sup> Oh, hunahunaa, ang mga tawo makapadayon mismo sa pagwali, nagadahum nga mahimo silang maluwas, nagatoo nga husto ang ilang ginabuhay, nagatoo nga ang ilang mga organisasyon nagalambo, sa tinuod, ug wala gani bisan silaw sa paglaum. Ug kon kanang panan-awona mao na kana, ug kini nahimong sukad higpit kaayo sa kababayen-an, nahiaabot na kita nianang maong taknaa. Sirado na ang pultahan, wala na, ang maong Basahon anaa na sa Iyang kamot. Hunahunaa kini.

<sup>350</sup> Tugoti kong isulti kini kaninyo sa dili pa kita magtapos karon. Patapos na ako. Kini gikasugilon na, ang mahitungod sa Ireland, nga nag-atubang sa mga katubigan. Adunay usa ka dakung kagaangan paingon sa pangpang, ug pasaka niining dakung bukid. Ug adunay usa ka tawo nga paingon, nagalakaw subay didto usa niana ka adlaw, diha gayud—gayud sa takna na sa pagtaob. Ug may usa ka halangdon nga tawo nga nagapuyo ibabaw sa maong bukid, nga nasayod niining maong mga pagtaob ug paghunas sa tubig. Nasayod siya sa takna sa adlaw diin nagaabot na kinahanglan ang pagtaob. Nasayod siya kon unsang oras sa adlaw nagahunas. Kining tawhana naman walay pagtagad sa kon unsang oras. Usa siya sa kining mga gitawag nga nahibalo-sa-tanan. Aduna siya’y iyang kaugalingong pangagpas. Usa siya ka tawong atletiko, maantigo,

tawong utokan, apan wala lang gayud siya nasayod sa pagtaob ug paghunas sa tubig. Wala siya'y kasayuran sa kaumahan. Dili siya nasayod sa maong panahon nga ang timaan mitukma na, sa diha nga ang bulan mitalikod na gikan sa kalibutan.

<sup>351</sup> Ug sa diha gani nga italikod na sa Dios ang Iyang Espiritu gikan sa kalibutan, igsoon, wala na siya, tapus na ang tanan.

<sup>352</sup> Sa diha nga ang maong bulan mobalhin na sa iyang nahimutangan, ang mga tubig motabon sa yuta sama kaniadto sa gisugdan kini sa Dios, diha sa Genesis 1. Apan ang bulan mipahiluna dinha, ug sa diha ganing iliso'g diyutay ang ulo niini, ang mga tubig mosugod na sa pagtaas.

<sup>353</sup> Kining maalamong tigulang nga tawo nga nagpuyo didto sa atubangan niini, nasayod sa unsang panahona na kadto. Kini namang tawhana wala nasayod. Wala niya gayud kini matun-i. Wala siya magtagad niini. Ug kining maalamong tigulang nga tawo midalagan pagawas, ug miingon, “Buutang tawo, ayaw pangahas gayud sa pag-adto pa sa unahan. Balik ka, dayon. Adunay pader. Dili ka makasaka sa maong pader. Mamatay ka. Ang . . . Ang mga timailhan anaa na, ang maong oras. Ang—ang dakung tubig mobul-og sa kalit, ug dili ka na makabalik pa. Ayaw na pag-adto pa sa unahan.”

<sup>354</sup> Ug milingi ang maong tawo, ug gikataw-an siya, miingon, “Sige atimana lang ang imo. Nahibalo ako kon unsay akong mahimo ug unsay dili.” Ug naabtan siya sa mga pagdaku sa tubig. Kita n'yo?

<sup>355</sup> Mahimong ulahi na kay sa atong ginahunahuna. Kita n'yo? Maabtan ka niini. Ayaw na pag-adto sa unahan pa. Ayaw gayud ninyo buhata kini, mga katawhan. Kon dugay na kamong mitoo kanako ingon nga alagad sa Dios, tohi ang akong pulong ning buntaga, kon mitoo gyud mo. Mahimong ulahi na kini kaayo. Daghan kaayong Kasulatan ang nagapakita nga ingon niana. Karon, hinumdomi, wala ako nagaingon nga mao na gayud kini. Wala ako masayod. Apan tan-awa lang.

<sup>356</sup> Ug giputol ko na ang napulo ka mga panid dinhi, nga nahadlok akong isulti kaninyo. Kita n'yo? Kita n'yo? Si Mrs. Woods makapamatuod niana, ug si Mr. Woods. Sa dihang miadto ako ganinang buntag sa pagpakigkita kanila, miingon ako, “Ako—ako dili makahimong isulti kana kanila, dili mahimong makaabot sa ingon niana. Ako lang ipahimutang kining daghang Kasulatan, ug ibilin kini diha kanila, tungod kay iga-teyp kini.” Kini'y mokaylap.

<sup>357</sup> Ug ang mga tawo mangatawa niining Mensahe. Sige lang, mamahimong ulahi na kini aron mobalik pa, sa usa niining mga adlaw. Padayon, pagpahisakup lang sa iglesia. Pagpapatul sa inyong buhok, pagpamintal sa inyong nawong. Padayon, ug dawata ang “Amahan, Anak, ug Espiritu Santo,” kon gusto ninyo, niana, himoa kining tulo ka mga Dios ug pagpaka-

pagano. Padayon, pagpabilin sa inyong organisasyon. Maoy buhata, kon inyong gusto.

358 Moingon, “Nagsayaw ako sa Espiritu, nagsulti ako’g mga dila; ako nang naangkon Kini.”

359 Nakakita na ako ug mga yawa nga nagahimo sa mao rang butang. Nakakita na ako ug mga balbal nga nagasulti ug mga dila ug ginahubad kini; ug nagasulat sa dili hisabtang mga pinulongan, nagahubad niini; kinsa miinum ug dugo nga nagagikan sa bagolbagol sa tawo, ug nagatawag sa yawa, misayaw pa sa espiritu.

360 Ang mga Mohammedan nagasayaw diha sa espiritu, sama niana, hangtud nga mahimo nilang kuhaon ang mga binuak ug ipangtusoktusok kini sa ilang mga tudlo; ug mokuha’g sundang ug ipataruy diha sa ilang nawong, sama niana, ug ibton kini, ug wala gayu’y bisan usa nalang ka tulo sa dugo nga moagas niini.

361 Ang mga Indian manglakaw diha sa kalayo, nga nakatiniil, tulo ka piye ang gilalumon; ug upat-, tulo-o upat-ka piye ang gilapdon; pahanginan, paypayan ang mga uling hangtud mamuti kini sa kainit; ug dili gayud masunog ang ilang mga tiil, ug ginasalikway nga adunay ingong butang sama kang Jesus Cristo.

362 Dili, dili, higala. Ang Pulong maoy nagasulti niini. Ang katawhan ug ang Pulong kinahanglan mahimong usa. Kita n’yo? Si Jesus ug ang Pulong mao ra; Siya mao ang Pulong. Ug sa diha nga si Jesus nagapuyo na sa tawo, nagahimo kana kaniya ug sa Pulong nga usa ra. Ayaw’g. . . Ang imong kinabuhi nagatug-an kung unsa ka.

363 Karon tan-awa lang ang imong kaugalingon sa tan-awanang salamin sa Dios, moingon, “Unsa ba akong itsura niining buntaga?” Samtang nagaampo kita.

364 [Usa ka igsoong lalaki nagasulti ug laing pinulongan. Ang usa naman ka igsoong lalaki nagahatag ug paghubad. “Akong mga anak, karon, Akong ginaingon kaninyo. Oo, Ako, ang Dios nga makagagahum sa tanan, naglantaw ibabaw sa yuta karon. Nakita Ko ang kadautan nga gidangatan niining maong kabuhatan. Oo, Akong nakita ang kasal-anan nga ang tawo, niining adlaw, gilikusan niini. Oo, wala ba kamo masayod nga nagbuhat Ako ug usa ka dakung butang alang kaninyo? Oo, Ako nagpadala ug usa ka tawo niining katapusang adlaw, oo, nga siya mamahimong usa ka tigpamaba ngadto niining kaliwatana. Apan Ako nagaingon kaninyo, niining adlaw, akong mga katawhan, daghan ang mibugalbugal niining ngalana. Oo, ilang gitalikuran ang mga butang nga iyang gipangsulti. Apan Ako nagaingon kaninyo, kadtong magapaminaw niining maong mga Pulong, Akong igabubo ang dagkung mga panalangin sa ibabaw nila. Ako ang Dios nga makagagahum sa tanan. Ako magaganti, niining adlaw, alang kadtong matinuoron nga magadawat niining mga Pulong, nagaingon ang Ginoo.”—Ed.]



Wandered far away from God,  
Now I'm coming home;

Pag-ampo, kung nakapag-ampo ka man!

Open wide Thine arms of love,  
Lord, I'm coming home.

Coming . . .

<sup>365</sup> Samtang nagapadayon kamo sa pagkanta, gusto kong pangutan-on kamo sa usa ka butang. Aduna bay bahin sa inyong kasingkasing nga daw nangitngitan sa sala? Kon anaa man, karon mao na ang panahon sa pagtanggap niini, karon na mismo, kung may kalooy pag nahabilin.

<sup>366</sup> Niini, malaumon ako, nga dili pa mao. Nagalaum ako nga wala pa kini dinha. Apan dili ba nga daw mao na kini kon tan-awon? Paminawa ang unsay giingon sa Balaang Espiritu sa taliwala sa mga tawo, sa pagkahuman nako, "Usa Kini ka Tingog diha kaninyo."

<sup>367</sup> Ug kon aduna man, kon aduna man kamo'y bisan unsa nga kangitngit sa inyong kinabuhi, dili ba kamo moanhi diri sa altar karon, samtang nagapadayon kita sa pagkanta. Karon mismo, kon may kabalaka man, kon aduna may lama, ayaw na kini langana pa.

<sup>368</sup> Nagalaum ug nagasalig nga kini dili pa gyud mao; apan mamahitabo kini, sa usa niining mga adlaw, ug kini mahimong karong adlaw.

Now, Lord, I'm come . . .

<sup>369</sup> Nga ang inyong mga gininhawa anaa na mismo diha kaninyo! Kon ang mga tawo sa teyp makakita lang unta kung unsay nagakahitabo dinhi karon; nanagdasok na lang ang usa'g-usa, nananghilak, gikan pa sa kung asang mga lugar.

<sup>370</sup> Mahimo kaha nga kadtong maong panan-awon, sa dihang batan-on pa ako, mao na ba kining orasa? Mao na ba kaha kining panahona sa dihang silang mga gibudlayan na kon tan-awon, mangiob; infiernong gimugna mismo dinhi sa yuta?

<sup>371</sup> Ang mga altar ug mga alagianan, ug tanan na, nangapuno na karon. Kon dili ka man makaduol sa altar o sa mga alagianan, bisan diin sa taliwala niining mga gatusan dinhi; pag-tindog lang, kon ginaingon mong, "Gusto kong motindog ug mag-ampo, aron lamang masayod ang mga tawo," o moluhod, unsa man ang gusto ninyo. O, sus! Karon halos wala ka nang makita ug bisa'g usa nga nagalingkod. Ang mga tawo nangtindog na bisan asa.

<sup>372</sup> Buot kong isulti kini. Dili unta itugot sa Dios, dili unta itugot sa Dios nga unsa may akong nasulti mao na karon. Hinaut akong masabtan kini, sa tanan; dili lang unta itugot kini sa Dios. Adunay. . . Aduna ako'y mga anak nga wala pa nakasulod. Aduna ako'y duha ka mga anak nga babaye ug usa

ka lalaki. Aduna ako'y mga igsoong lalaki. Adunay akong mga katawhan nga wala pa nakasulod. Dili unta itugot sa Dios nga nagbiya na ang grasya kanato; nga ang tanan niini mamahimong tigpakaaron-ingnon na lamang.

<sup>373</sup> Aduna pa ba kahay grasya nga nahabilin, Ginoo? Itugot nga nasayup ako niini, Ginoo. Itugot nga sayup kini niining higayona. Nga ako, kini'y dili pa mao, nga ang mga tawo mahimong maluwas pa. Itugot kini, Ginoo. Ako nagaampo, ug ginatugyan kining mga mananambong diha Kanimo karon, sa Ngalan ni Jesus Cristo.

<sup>374</sup> Ang tanan magaampo karon, sama sa . . . Unsa kaha kon kini mao na? Karon, wala ako masayod kung kini mao na ba, apan unsa kaha kung kini mao na? Pag-ampo kamo diha sa inyong pamaagi. Pag-ampo lang kamo diha sa paagi nga gusto ninyo sa pag-ampo. Unsa kaha kon kini mao na gyud ang kamatuoran, unsa may atong buhaton, mga higala? Unsa bay atong pagabuhaton? Unsa, unsa na may mahitabo? Karon pag-ampo, ang tanan. Pag-pangaliya lang, pag-ampo lang sa paagi nga gusto ninyo. Pagpangaliya lamang ngadto sa Dios, diha sa inyong kaugalingong pamaagi. O Dios!

Thine arms of love,  
O Lord, I'm coming home.

<sup>375</sup> “Ginoo, dugay ko na kining gustong pagabuhaton. Naglangan ba ako kaayo, Ginoo? Kini na ba, tapos na ba kini? O Dios, buksi ang Imong mga bukton sa gugma ug dawata ako. Adunay butang sa akong kasingkasing nga nagpakilooy alang niini, Ginoo. Buksi sa makausa pa. Kon ang akong ngalan anaa na sa maong Basahon sa Cordero, pakigsulti kanako karon, Ginoo. Itugot kanako nga madawat kini karon dayon. Palihog himoa, Dios.”

Coming home, coming home,  
Oh, never, I'll never no more, Lord, to more to  
roam;  
Open wide Thine arms of love,  
O Lord, I'm coming home. . .

<sup>376</sup> Ang Biblia miingon, sa dihang maila na nila si Jesus, niana, “Ang matag-usa managminatay sa paghilak sama sa namatyan sila ug bugtong nga anak nga lalake.”

. . .-ing home,

<sup>377</sup> Kamong anaa sa gawas, kamong anaa sa inyong mga sakyanan, pinaagi sa signal sa radio, kamo nga nagatindog sa palibot sa gambalay, sa kadaghanan kaninyo, iyukbo lang ang inyong ulo diha sa gambalay, moingon, “Ginoong Dios, kaloy-i intawon ako. Buk-. . .” Pagmatinud-anon gyud kaayo, mga higala! Hunahunaa unsa nang orasa ang ginapuy-an nato! Kon asa na ba kita?

. . . love  
 Lord, I'm now coming home.  
 Coming home, . . .

<sup>378</sup> Ginoong Jesus, ako nang gibuhat ang pinakamaayo nga mamahimo ko. Gibuhat ko na ang tanan nga mamahimo ko. Itugot, Ginoo, nga ang mga pultahan sa kalooy sa gihapon bukas pa. Niining mga gatasan, nga mga gatasan gayud ang nagapangita Kanimo niining higayona, tangtanga ang matag lama sa sala, Ginoo, ug pasudla sila niining adlaw.

<sup>379</sup> Ako—ako nagahangyo, sa tibuok kong kasingkasing, maingon sa among makita nga dili lamang kay kung kinsang tawo ang nagasulti, apan, ang Kasulatan Mismo ang nagahatud kanamo ngadto niining orasa. Ug nianang panan-awon, sa usa ka batan-ong lalake, nga makita kadtong mga tawo sa ingon niadtong kahimtang; ug karon, ginahunahuna, kanang infierno mismo, ang kalooy giwagtang na sa yuta, ug karon ang infierno mismo ania dinhi, ug ang mga tawo, Ginoo, ania niining makalilisang nga kahimtang.

<sup>380</sup> O Dios nga Makagagahum, sa niining Iglesiang Pinili, nagaampo ako, Dios, nga igabubo Mo ang Imong mga panalangin, aron nga ilang madawat ang usa—usa ka ministryo sa pagpamatuod, nga sama sa naangkon ni Lot, sama sa naangkon ni Noe, sama sa naangkon ni Jesus, ngadto sa mga nangalaglag na sa Walay Katapusan, kon anaa pa man; nga unta sila mismo maselyohan na ngadto sa Gingharian sa Dios, apan nagahatag ug pagpamatuod kang Jesus Cristo ingon nga mao kagahapon, karon, ug hangtud sa kahangturan. Itugot kini, Ginoo. Hinaut nga Imong dawaton ang among pagpangamuyo, samtang nagahangyo kami sa Ngalan ni Jesus.

<sup>381</sup> Pag-ampo lang sa pamaagi nga gusto ninyo sa pag-ampo karon. Ayaw pagdalidali. Ayaw pagdalidali. Unsa kaha kon ikaw na ang maong katapusan nga ngalan diha sa maong Basahon?

I'm coming home.  
 Coming home, coming home,

<sup>382</sup> Igsoong Neville, saka ka ug ampoi sila. Ang pastor magaampo na karon uban kaninyo samtang nagaampo kamo. Kantahon ko.

Open wide Thine arms of love,  
 Lord, I'm coming home.

Coming home, coming home,  
 Never more to roam; (Oo, Ginoo.)  
 Open wide Thine arms of love,  
 Lord, I'm coming home.

Coming home, coming home,  
 Never more to roam;  
 Open wide Thine arms of love,  
 Lord, I'm coming home.

<sup>383</sup> [Si Igsoong Branham ug ang kongregasyon mikanta sa kanta nga anaa sa ibabaw samtang si Igsoong Neville nag-ampo. “Dios nga Makagagahum, among Langitnong Amahan, maingon niini kaniadto, karon, kami malipayon kaayo nga Ikaw naghatag kanamo, sa ingon kaniadto, niining tipik sa panahon aron pamalandungan ang among mga gawi sa atubangan Nimo. Akong Dios, ining panahona, gikan sa kinahiladman sa among kalag, nagatuaw kami Kanimo, Ginoo, alang sa, dili lamang sa among kaugalingon, kondili ngadto sa usa’g usa. Tugoti niining orasa, Dios, ang mahimong higayon, niining buntaga, Amahan, nga Ikaw, kon nagapadayon pa ang Imong kalooy, Amahan, itugot kini, nga kining kinsang mga nagsalikway na niining adlaw sa tanan nilang mga garbo, kagustohan, ug uban pang mga butang. Ginoong Jesus, niining adlaw, nagaampo kami nga Imong itugot nga kadtong mga nangluhod, oh, ug mga nagaduko sa ilang ulo sa tibuok niining gambalay. O Dios, itugot nga ang kanang Tingog, gikan sa Langit, magapakigsulti ning buntaga. Hatagi’g kasiguruhan, Ginoo. Itugot niining mga katawhan, nga nanggipinal nga mga kalalaken-an ug kababayen-an, Jesus, tugoti nga madawat namo, niining adlaw, ang kahupayan nianang maong Saksi nga mikanaug gikan sa Langit ning buntaga. Sa Ngalan ni Jesus Cristo, kami nagapangamuyo, Ginoo, kon aduna pay paglugway sa kalooy pinaagi sa Dugo, itugot nga magaabot kini sa matag-usa, karon, sumala sa ilang pagduol. Hinaut nga mahimo kini, karon.”—Ed.]

[Si Igsoong Neville nagapadayon sa pag-ampo. “Ug hinaut nga ang matag-usa, Ginoo, natagbaw, ning adlaw, nga Ikaw maoy Dios nga Makagagahum sa tanan. Kon kini sa paglugway pa sa kalooy, itugot kini ngadto sa matag-usa, sa tagsa-tagsa.”] Itugot kini, Ginoo. [“Itugot kini karon, Amahan. Ug itugot nga ang pakigdait sa Dios, nga labaw sa tanang pagsabut, itugot kining magaabot pag-usab ngadto sa mga nagapaabot nga mga kasingkasing.”] Oo, Ginoo. [“Itugot nga mahimong mao na kining taknaa.”] Oo. [“Nagatoo kami nga Ikaw ngandungog sa Langit.”] Dios, itugot kini. [“Kon unsa may gigahin alang kanamo, kon kini man human na, nan, Ginoo, nahibalo kami kung unsa ang mahimong madangatan.”] Oo, Ginoo. [“Apan kon dili pa, itugot nga moabot ang maong Saksi.”] Oo, Ginoo. [“Itugot ngadto niining mga nangduol, itugot nga makaplagan nila ang pakigdait karong adlaw,”] Itugot kini, Ginoo. [“pinaagi kang Jesus Cristo. Ug diha sa Iyang Ngalan kami nagaampo. Amen.”—Ed.]

<sup>384</sup> Ginoong Jesus, nagaampo ako nga Imong luwason si Becky ug si Sarah ug si Joseph, ug sila, usab, Ginoo. Ayaw itugot

kini nga mahitabo sa akong mga anak, Ginoo. Ayaw itugot nga mahitabo kini sa akong mga igsoong lalaki ug sa akong mga higala. Itugot kini, Ginoo.

<sup>385</sup> Kami wala masayod, wala kami masayod, apan adunay butang nga among makita, Ginoo. Kini ba ang maoy nagatayog nga timailhan karon mismo sa among atubangan? Itugot kini, Ginoo. Paduola kaming tanan nga madinutdoton Kanimo, sa labing dali, Ginoo. Kami nahigugma Kanimo ug kami nanginahanglan Kanimo. Itugot kini, Amahan, nga ang Balaang Espiritu magahatag kanamo ug kahupayan diha sa among kasingkasing karon.

<sup>386</sup> Nagaampo kami nga mamahimo kaming mga saksi Kanimo niining orasa, kay nasayod kami nga kinahanglan mahitabo kini. Gitagna na kini sa tibuok nga mga kapanahonan, ug nga kinahanglan atubangon namo kini, nga kami ania na sa katapusang panahon sa dihang makita na namo kining mga timailhan nga nagapadayag na. Kami nasayod, ug gikasuginlan sa daghan nang mga katuigan karon, nga kining butanga mahitabo gayud. Karon amo nang makita kini mismo sa among ganghaan, ang daku'ng makusganong kapungot sa Dios nga nagalihok sa kadalanan, ginapahigawas ang mga dili sinircunsidahan. Kon diin ang walay Dugo sa pultahan, ginaduaw sa manulonda sa kamatayon; ug nagapadayon sila sa pagkinabuhi, apan patay na bisan ug buhi pa sila, wala nay kalooy, wala nay Dios, ug dili na gayud maluwas.

<sup>387</sup> Dios, daw sa unsa ang among pagpasalamat Kanimo alang niining nangaluwas na! Kung giunsa namo... Daw unsa ka dakung panalangin kini sa among mga kasingkasing, nga nahisulod na karon, ilalum sa Dugo, sa dihang kanang katapusang manulonda nagalatas sa kayutaan, ginakuha ang...

<sup>388</sup> Sa mga anaa sa gawas sa ilalum sa dugo, nangamatay sila sa walay kalooy. Mao kadto ang katapusang pagbira ni Moises. Una, usa—usa ka batan-ong lalaki nga nakigsulti ngadto sa Israel; ikaduha, miadto aron luwason sila; ang ikatulo, mao ang katapusan nang mensahe. Ang mga milagro napangbuhat na, si Moises diha na sa iyang dalan paingon sa yutang saad, uban sa mga tinubos.

O Dios, malooy Ka, ako nagaampo, sa Ngalan ni Jesus.

<sup>389</sup> Karon gusto kong ipangutana kini. Kamo nga nagaampo, kamo nga nagabating nagbaton ug kalooy, ug niana (ang Dios) inyong gibati nga anaa mo sa Gingharian sa Dios, inyong gibati nga—nga naangkla na kamo bisan unsaon pa, nga diha kang Cristo kamo adunay pagtoo aron toohan nga kamo Cristohanon, kamo'y natawo na pag-usab ug nasayod kamo nga kamo'y Cristohanon na, ug nga wala gayu'y pagduhaduha. Buot ko nga motindog kamong tanan, kamo nga nangandoy niana, nagatoo

niana, nga kanang maong kalooy milugway pa diha kaninyo karon, ug kamo mga Cristohanon, ug kamo—ug kamo nagatoo nga—nga ang Dugo giaplikar na diha sa inyong kasingkasing, ug—ug—ug nga kamo gipasaylo na sa matag sala.

<sup>390</sup> Usa kini ka malisod kaayo nga butang nga isulti kaninyong mga katawhan. Mapasalamaton ako kaayo, ug nga makita ang mga tawong nangatindog na sa tanang dapit. Ug kamo, ako—ako gayud. . .

<sup>391</sup> Wala ako masayod nga kining butanga tinuod, apan kinahanglan gayud nga maingon nianang paagiha, usahay. Kita n'yo, kinahanglan nga mosangko sa ingon niana, ug mamahimong kini mao na karon. Kita n'yo? Sa tanang paagi, ang kalibutan sa gihapon mopadayon mismo. Ang mga tawo moduol sa gihapon ngadto sa altar, mohilak sila sa gihapon, apan kini dili na magpulos. Kita n'yo? Wala na sila, kita n'yo, human na kini. Mawala na ang kalooy. Hinumduma kana. “Ug ang dapit nga balaan nahimong maaso.” “Siya nga mahugaw, magmahugaw gihapon; siya nga matarung, magmatarung gihapon; ug siya nga balaan, magbalaan gihapon.” Wala nay kalooy pa, sa diha nga ang Cordero gikuha na ang maong Basahon; mao na kini, mao na kini tanan. Ug daw sa ang tanan niini mahimong ingon na niini karon.

<sup>392</sup> Tingali aduna pa kita'y laing adlaw; tingali karon mao na kanang adlaw. Tingali ugma maoy kata-. . .Tingali ning gabhiona mao na ang katapusang gabii. Tingali mao na kini ang katapusang tuig. Wala ako masayod, mga higala. Akong ginasulti kaninyo, wala ako masayod. Dili gayud kini igasugilon kanako.

<sup>393</sup> Apan sa diha nga ginakuha na sa Dios kanang katapusang ngalan ug tuboson na kini gikan nianang Basahon sa Kinabuhi, mao na kana ang tanan. Kita n'yo, wala na gayud mahimong idugang pa, bisan unsaon. Wala na gayud mahimong idugang pa, bisan unsaon. Mao na kana tanan. Human na kini.

<sup>394</sup> Pila bay nasayod nga kini ang Kamatuoran? [Ang kongregasyon nagaingon, “Amen.”—Ed.] Bueno. Kini—kini ang Kamatuoran. Karon nga gibati gyud natong. . .

<sup>395</sup> Ug akong makita kining maong kongregasyon nga akong giwalihan ug gipasidan-an, sa sulod niining mga katuigan, ug nga makita ang Mensaheng ingon niini nga akong. . .nga ako—akong gidala kini sa pormang walay-kahanas. Ug hinumdomi lang, ginasulti ko kini aron nga inyong masabtan kini, sa pormang *walay-kahanas*; ang uban pa sa maong mga butang halos mahimong tay-ugon kamo, kita n'yo. Apan ako na lang gilaktawan kini, gibati nga himoon kini, kay dili ako sigurado. Kon dili man ako sigurado sa akong ginalaktan, hinayhinay akong magalakaw, kita n'yo, apan ginasulti ko lang kaninyo.

396 Paminaw. Wala ba mo malipay? Aduna pa bay bisan unsang butang nga mas labaw pa, nga inyong mahunahuna, nga inyong nabuhat sa inyong kinabuhi?

397 Unsa kaha kung human na kini karon? Unsa kaha kon human na kining tanan? “Oh,” moingon ka, “Igsoong Branham, tingali...” Oo, nasayod ako. Mahimong mopadayon sila. Nahimo nila, sa matag higayon. Ako na kanang gisaysay ug gipamatud-an na kini pinaagi sa Kasulatan, kita n’yo, ang kalibutan nagapadayon sa pagtuyok, apan kini human na. Kita N’yo?

398 “Ang kabuangan sa pagwali nagaluwas sa mga nangawala. Ug kabuangan kini, ngadto sa mga tawo. Kini maoy kaalam sa Dios.” Kita n’yo? Ang Dios Espiritu. Nagapanglihok Siya sa espirituhanong mga pamaagi, kita n’yo, ang Iyang mga katingalahan sa pagpamuhat; katingalahang mga pamaagi. Apan, tawhanon kita, aduna kita’y kinutuban. Wala kita masayod; nagatan-aw lamang kita sa unsay atong makita. Apan Adunay Butang ania sa sulod nato . . .

399 Sa dihang mogawas ka sa lawak dinhi, kon wala pa nimo nakita kini sa inyong kinabuhi, wala pa sukad nakita ang kahayag sa adlaw, mahibaloan mong nakalabay ka na gikan niining lawaka dinhi, ngadto sa usa ka kahayag sa adlaw o sa usa ka butang. Madilaabon kini. Mabati mo kini. Kon wala may sensya sa imong lawas nga mopahayag niini, mahibaloan nimo, oh, walay sensya sa panan-aw ang makakita niini. Walay paagi nga makita ang lunhaw nga mga kahoy, aron makita ang kinaiyahan; wala kay panan-aw, wala gayu’y usa nga nagkaaduna niini. Mahibaloan mong maanaa ka sa presensiya sa usa ka butang; ang imong pagbati mosulti kanimo niana. Mahibaloan mo kana. Kon sulayan kong isulti kanimo, “Ang adlaw kini. Nagaaninag kini. Nagapakita kini sa mga butang.” Kita n’yo, mahibaloan mo nga ania kini dinha tungod kay imo kining mabati pinaagi sa imong mga pagbati. Husto ba kana? [Ang kongregasyon nagaingon, “Amen.”—Ed.]

400 Karon, kita nasayod nga ania si Cristo dinhi. Kita n’yo? Tingali dili ninyo Siya makita sa inyong mga mata. Kita n’yo? Tingali dili n’yo makita. Apan pinaagi’g panan-awon, akong ginasulti kaninyo, Siya ania dinhi. Atong mabati Kini. Nasayod kita nga Adunay Butang dinhi nga dili mapahayag sa atong mga sensya. Ang Espiritu mao ang nagapahayag niini, nga si Cristo ania dinhi.

401 Mabati ko nga Iya na kitang gitubos. Mabati ko nga ang atong mga ngalan anaa na diha sa Iyang Basahon. Nagatoo ako nga kita gitubos na pinaagi sa Dugo sa Cordero.

Gimahal ko kamo, ug ako nasayod nga kamo nagahinigugmaay sa usa’g usa.

Oh, panalanginan unta ang higot nga  
 nagabugkos  
 Sa atong mga kasingkasing diha sa gugmang  
 Crisohanon;  
 Ang pagdina-itay sa nagkahiusang hunahuna  
 Sama sa niadtong atua sa Kahitas-an.

<sup>402</sup> Kinahanglan nga ingon-ana ang kanunay natong ginabati sa usa'g usa. Kita n'yo, kinahanglan nato, kinahanglan ingon-ana ang atong ginabati sa usa'g usa. Kita n'yo? Tungod kay, maingon nga atong ginahigugma ang usa'g usa, atong ginahigugma ang Dios. "Mahimo mo bang dumtan ang imong igsoon nga kinsa imong nakita, ug moingon nga imong ginahigugma ang Dios Kinsa wala mo nakita?" Kinahanglan nga maghinigugmaay kita sa usa'g-usa. "Walay bisan kinsa nga may gugma nga labaw pa kay Kaniya nga naghalad sa Iyang kinabuhi alang sa Iyang kaaway, aron nga sila mamahimong Iyang mga higala." Oh!

<sup>403</sup> Kabalo ba mo nianang kantaha, *Blest Be The Tie That Binds*? Dili ba kini maanindot? Hinaut nga panalanginan ang maong higot! Mahimo mo bang ihatag ang tunada niana, igsoon, dinha? Ipatukar lang kini sa makadali.

<sup>404</sup> Unsa kaha kon kini human na? Unsa kaha kon ang maong Ikatulong Pagbira, nga nagaabot na karon, mao ang pagwali ngadto sa mga nangalaglag na? Unsa kaha kon ang tanang mga katipohan mahipakita na karon? Ug kita nakasulod na, ug kita anaa na sa sulod, dili ba kana pagkamaanindot kaayo? Daw sa unsa ka matahum nga panaghiusa!

Oh, blest be the tie that binds (ania ang kon  
 unsay nagabuhat niini)  
 Our hearts in Christian love;  
 The fellowship of kindred mind  
 Is like to . . .

<sup>405</sup> Unsa man kana? Panag-ambitay sa mga kaparehong hunahuna. "Umanhi ang Imong Ginghamarian. Ang Imong pagbuot ang matuman." Kita n'yo?

<sup>406</sup> Ginapaninguhaan natong himoon ang Dios nga usa—usa ka batang mascot, usa ka sulogoon o usa pa ka butang, "Dios, himoa *kini*, himoa *kana*."

<sup>407</sup> Si Jesus miingon, "Pag-ampo, 'Umanhi ang Imong Ginghamarian. Pagabuhaton ang Imong kabubut-on sa yuta, maingon sa Langit.'" Dayon, ang Langit gipakanaog dinhi kanato, ug kita—kita ginadala ngadto sa Langit, ug kita karon napahimutang na sa Langitnong mga dapit diha kang Cristo Jesus. Kitang tanan nagatoo nianang Mensahe nga maoy Kamatuoran, nga si Jesus Cristo, ang Anak sa Dios, nagatubos kanato.

<sup>408</sup> Ipiyong nato ang atong mga mata karon ug iisa ang atong mga kamot, samtang atong kantahon kini.



Blest be the tie that binds  
 Our hearts in Christian love;  
 The fellowship of kindred mind  
 Is like . . . (Padayon sa pagpatukar.)

<sup>409</sup> Karon, walay usa nga magapahiyom. Dili kini panahon sa pagpahiyom. Dinuyogan sa tumang pagkamatinud-anon, samtang ginapatukar kanang kantaha, maglamanohay kita diha sa usa nga kaduol ninyo, ingnon, “Ang Dios magapanalangin kanimo, Cristohanon,” diha sa tumang pagkamatinud-anon.

<sup>410</sup> Ang Dios magapanalangin kanimo, Igsoong Neville. [Si Igsoong Neville nagaingon, “Panalanginan ka, Igsoong Branham!”—Ed.] Kalim-an ug siyam na ka tuig ang kagulangan. [“Tinuod kana.”] Taastaas na!

Ang Dios magapanalangin kanimo, Igsoon . . . ? . . .

Karon atong iisa ang atong mga kamot ngadto Kaniya.

When we asunder part,  
 It gives us inward pain;  
 But we shall still be joined in heart,  
 And hope to meet again.

<sup>411</sup> Karon atong iduko ang atong mga ulo, ug, nga nagkahiusa, wala nahibalo kung unsa ang kaugmaon, niining higayona, walay kahibalo kondili kung unsa nay human na. Wala ako masayod. Dili ko makasulti. Dili ko makasulti. Wala ako masayod. Apan sa atubangan sa unsay mga kalig-onan nga atong gipahayag niining buntaga, atong igaampo ang pag-ampo nga gitudlo sa Ginoo kanato. Bisan pa kon kini man maoy, “Umanhi ang Imong Ginghamarian. Mamatuman ang Imong pagbuot.” Buhaton nato kini sa dungan.

<sup>412</sup> [Si Igsoong Branham ug ang kongregasyon nagasulti sa nagsunodsunod nga pag-ampo sa dungan, gikan sa Mateo 6:9-13—Ed.]

*. . . Amahan namo nga anaa sa langit, Pagabalaanon ang imong ngalan. Umanhi ang Imong ginghamarian. Pagabuhaton ang Imong kabubut-on dinhi sa yuta, maingon sa langit.*

*Hatagi kami karon sa pagkaon namo sa matag-adlaw.*

*Ug pasayloa kami sa among mga sala, maingon nga nagapasaylo kami sa mga nakasala kanamo.*

*Ug ayaw kami itugyan sa mga panulay, kondili luwasa kami sa kadautan; Kay Imo ang ginghamarian, ug ang gahum, ug ang himaya, hangtud sa kahangturan. Amen.*

<sup>413</sup> Karon uban sa atong mga giduko nga kasingkasing. Ang Biblia miingon, “Ning-awit sila sa usa ka alawiton, ug nangadto.” Hinumdomi, sa dihang ila kanang gibuhat sa Kasulatan, tungod kay kadto ilang gilansang ang ministryo sa

Ikaduhang Pagbira sa atong Ginoo, ug ang Ikatulong Pagbira andam na kadto sa pagsulod. Pipila ka oras human niadto, Siya miadto sa infierno ug miwali ngadto sa mga nangalaglag na nga nagsalikway sa ilang kalooy.

<sup>414</sup> Ang tuno sa *My Faith Looks Up To Thee*.

My—my faith looks up to Thee,  
 Thou Lamb of Calvary,  
 Saviour Divine;  
 Now hear me while I pray,  
 Take all my sins away,  
 Nor let me . . . from this day  
 Be wholly Thine!  
 While life's dark maze I tread,  
 And grief around me spread,  
 Be Thou my Guide;  
 Bid darkness turn to day,  
 Wash sorrow, fears away,  
 O let me from this day  
 Be wholly Thine!

<sup>415</sup> Ang Dios magapanalangin kaninyo, itugot nga ang Iyang Anak ug grasya modan-ag diha kaninyo. Ug ang Ginoo magahatag kaninyo sa Kinabuhing Walay Katapusan, ug maanaa kaninyo dinhi niining panahona, ug sa palaabuton nga kapanahonan human niini. Ug, sa Kinabuhi nga Walay Katapusan, hinaut nga pagaalagaran ninyo Siya sa umalabot nga pinakataas kaayong panahon.

<sup>416</sup> Kon mao na man kining panahona, ug nakaabot na kita nianang puntoha, dili ako maulaw kon unsa may akong gikawali. Ug kon ang matag ministro gikinahanglan man motindog kauban sa iyang kongregasyon ug pagahukman, maingon sa akong nakita sa panan-awon, mapasalamaton ako alang sa maong Maayong Balita nga akong gikawali, tungod kay kini mao sa gihapon ang Maayong Balita nga gikawali ni Pablo ug nila.

<sup>417</sup> Malipayon ako alang kaninyo. Ako malipayon nga inyong gidawat na si Cristo ingon nga inyong Manluluwas. Higugmaa Siya, ug pag-ampo.

<sup>418</sup> Ug magkita ta karong hapon, kon itugot sa Ginoo, sa alas-siete, dinhi sa simbahan. Ang Dios magapanalangin kaninyo. Makapanguli na kamo.



*MGA KALAG NGA ANAA SA BILANGGOAN KARON* CEB63-1110M  
(Souls That Are In Prison Now)

Kining Mensahe ni Igsoong William Marrion Branham, una giwali sa Ingles niadtong Dominggo sa buntag, Nobyembre 10, 1963, sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2010 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)